

# Niivuru neeriwa

## Okuma

### Madhu oovolowana

Ndda niivuru na nabiili no waandana wawale nneethaniwa Okuma.

Nenddi nnanaaddeliha owelela ni ovenyawiwa aEzarayeli wEgubuddu, wewo waaliwa adhaari. Nnowoonihedha teto milili kumi mwiilaboni ya wEgubuddu. AEzarayeli edhowaga ogumana ni Mulugu oSinayi. Wewo waakeliliwa malamulo ni magano nipangano no waandana dhedho dhoonihedha wi Mulugu oli ni aliwa.

Nnowoga teto dha obaliwa wa Mozezi, orumiwa waaye ni Mulugu wi aathukule aEzarayeli aadhowena elabo eyene yavahiwe makolo eewa Abarahamu, Ezaaki ni Yakobo.

### Ogawanyeya wa niivuru

Obaliwa ni wiithaniwa wa Mozezi *1.1 ofiyedha 4.31.*

Milili wEgubuddu *5.1 ofiyedha 15.21.*

Okuma wEgubuddu, olenddo wa oMwaangoni Sinayi *15.22 ofiyedha 18.27.*

Nipangano no waandana ni Mulugu *19.1 ofiyedha 34.35.*

Omagiwa wa musasa wa Mulugu *35.1 ofiyedha 40.38.*

---

### AEzarayeli egali wEgubuddu

**1** <sup>1</sup>Baala mandina a ahima aEzarayeli, naari wi Yakobo,<sup>a</sup> ayene yavolowile wEgubuddu ni oliye, mmohi ni mmohi ni emudhi yaaye: <sup>2</sup>Rubeni, Simiyoni, Leevi ni Zhuda, <sup>3</sup>Esakari, Zebuloni ni Benzhami, <sup>4</sup>Dani ni Nafitali, Gadi ni Azeri. <sup>5</sup>Athu aatene a emudhi ya Yakobo yaali makumi matanu nameenddi (70). Mbwenye mwaanaye Zhuuze aali wEgubuddu.

<sup>6</sup>Vano ahikwa Zhuuze ni addibile aatene vamohi ni athu aatene a mudhidhi waaye. <sup>7</sup>Mbwenye aEzarayeli yahirelana wiinjiva okala akopo-

---

<sup>a</sup> 1.1 Moone Wambeela 32.28

lo vajinji. Mowindala yahidhaala mwiilaboni mule.<sup>b</sup> <sup>8</sup> Vevale ahihabawo mwene mmohiwa wEgubuddu, oyene ahaapwathile dha Zhuuze. <sup>9</sup> Mwene ole ahawaaddela athu aaye, wiira: “Moone, athu aEzarayeli ehithabwa wiinjiva, ba kopolo onikwaranya hiyo. <sup>10</sup> Nisasanye malango wi eheenjedhedheyege. Enaadhe etaganele ni amwiiddani eehu mukoddoni ewanege ni hiyo, evenyemo mwiilaboni mu”.

<sup>11</sup> Vano aEgubuddu yahaasakula asupayi a mabasa oohiddeliwa wi yaalabihege mwa owali. AEzarayeli yahimmagela Farawo<sup>c</sup> maluwa oologolelamo dhooja: Pithomi ni Ramesesi. <sup>12</sup> AEzarayeli yarabulihiwave yootthabwa wiinjiva yahimwadheyela mwiilaboni. AEgubuddu yowoopopiheya ni aEzarayeli. <sup>13</sup> Ndala yowaalabiha ni owali aEzarayeli. <sup>14</sup> Yowawooniha goyi, wawiira adhaari, yoopondda ologo, wuubaga njola ni ohidda mabasa maatene a mmiddani. Mabasa maatene yaali oorusa.

<sup>15</sup> Vevale mwene a wEgubuddu ahawiithanaga Sifara ni Puwa, anamabaliha a aHeberi, wiira: <sup>16</sup> “Mwaakamihedhaga ahiyana aHeberi, mwiing'anege. Akala mwaana-mulobwana mumpege, mbwenye akala mwaana-mwihiyana mmwihyege”. <sup>17</sup> Mbwenye anamabaliha ale yoomoova Mulugu. Kiyeerilena wona dhalamuleliwiisu ni mwene a wEgubuddu, yowaahiya ahima ni egumi yeewa. <sup>18</sup> Mwene a wEgubuddu ahawiithanaga, aliwa, wiira: “Mwaha bwaddi munaahiyeliinyu ahima muhaapaga?” <sup>19</sup> Yahimwaakulaga Farawo, wiira: “Sowi ahiyana aHeberi ba kopolo, kinafwanafwana ni ahiyana aEgubuddu. Hiyo nadhaaga nnaafwanya egaabalile aniiwa”. <sup>20</sup> Mulugu ahawiirela yapama anamabaliha. Vevale mulogo wa Ezarayeli wahinjiva okala teto wakopolo. <sup>21</sup> Vowi ahiyana ale yoomoova Mulugu, oliye ahaavaha emudhi yeewa.

<sup>22</sup> Vevale Farawo ahaalamulaga teto athu aaye aatene, eeraga: “Voobaliwa ahima anaalobwana a aHeberi, mwaavokedhege aatene mmahinjeni a muNilu. Mbwenye ahima anaahiyana aatene kamwaapege”.

### Obaliwa ni oleliwa wa Mozezi

**2** <sup>1</sup> Mudhidhi olene mulobwana mmohi a nihimo na aLeevi ahimutela mwihiyana a nihimo nendde. <sup>2</sup> Mwihiyanaaye ahirubalela, ombala mwaana-mulobwana. Vamooniligiiye wi aali ooriya, ahimulogoha mweeri miraaruru. <sup>3</sup> Mbwenye vahaandiliiye omulogoha okwaranya malabo alene, ahithukulaga muddanga wa bango, omara waatene ni yego yoobanda wona nipula<sup>d</sup> wi mahinje ehivolowegemo. Ahimuhelagamo mwaana omwihiyana mmahinjeni a muNilu, seresere weenjivile bango. <sup>4</sup> Murogoriye ahiipitaga omusugwaga wi oone yafuna omwiireyela.

<sup>b</sup> 1.7 Moone Wambeela 1.28    <sup>c</sup> 1.11 Farawo Sowi mwene a wEgubuddu.    <sup>d</sup> 2.3 Nipula nili wona mutova, naari namukuthe ootaganyihedhiwa ni makala.

<sup>5</sup>Ahivenyaga mwaana a Farawo a mwihiyana wi ahabe oNilu. Anamwali aaye ale yamwiing'anela, yeeddaga seresere ya mwihinje, mwaana a Farawo ahoonaga muddanga ogali mmahinjani. Ahimurumaga mwiimeleli aaye amwihiyana otavula. <sup>6</sup>Vathukuligiiye muddanga ole ahi-moonaga mwihima, mwaana-mulobwana anddaga mmuddangani<sup>e</sup> mule. Ahimweeddiwelaga thagaraga, wiira: “Ola mwaana a aHeberi”. <sup>7</sup>Vevale murogoriye a mwaana ole ahiwogaga ni mwaana a Farawo, wiira: “Munofuna wi gamwiithane mwihiyana mmohi muHeberi wi amulelege mwaana ola?” <sup>8</sup>Mwaana a Farawo ahimwaakulaga, wiira: “Dhowa”. Ahivenyaga namwali wawiithana amaaye a mwaana. <sup>9</sup>Ndala mwaana a Farawo ahimuwogagana, wiira: “Omuthukule mwaana ola omulelege, ginowuulivela”. Mwihiyana ole ahimuthukulaga mwaana omulelaga. <sup>10</sup>Vonnuwiliye ahimveleela wa mwaana a Farawo, ahimuthukulaga, okala wona mwaanaye. Oliye ahimuthwa ndina nowi Mozezi, wiira: “Mwaha gimutavulile mmahinjani”.<sup>f</sup>

### Mozezi ahithawela oMidiyani

<sup>11</sup>Nlabo nimohi Mozezi agonnuwile, ahivenyaga waweeddela amudhi aaye, ahoonaga wi mabasa eewa yaali agoyi. Ahimoonaga muHeberi mukwaaye addwadhiwaga ni muEgubuddu mmohi. <sup>12</sup>Ahisugwaga wula ni wula, vooniligiiye wi kanadhawo muthu, ahimpaga muEgubuddu omvuhelala vamuseengani. <sup>13</sup>Omenseloni wiwa ahivenyaga, waafwana alobwana abiili a aHeberi ewanaga. Ahimukohaga annaga mwaha, wiira: “Onamuddwadhela ddi mukwaawo?” <sup>14</sup>Oliye ahaakulaga, wiira: “Wuuvahile okala musogoleli ni muliba onithonga hiyo baani? Onafuna teto ogipe wona ompiliwe muEgubuddu ole?” Vevale Mozezi ahoovaga, wiira: “Ebaribareene ehinoniwa!” <sup>15</sup>Farawo veewiliye mwaha olena, oomusayela Mozezi wi ampe. Mozezi ahithawa, odhowa elabo ya oMidiyani. Vafiyiliye wewule, ahikaraatigi vaceelani.

<sup>16</sup>Namakutha a oMidiyani ahikalana anaaye anaahiyana atanu ni abiili. Yahidhowaga ocelani orugwa mahinje, odhaalaha mino wi yaavaha mabila ababiwa. <sup>17</sup>Mbwenye yahidhaaga amakambuzi a mabila amohi wawiiigaravo vaceelani vale. Mozezi ahivenyaga, wawaakiha, waavaha mabila mahinje, waang'wa. <sup>18</sup>Vaveleligiiwa wa babiiwa Reweli, ahaakohaga, wiira: “Peeno mwaaguvelewo ddi wiiko?” <sup>19</sup>Aliwa yahaakulaga, wiira: “MuEgubuddu dinaakihe mmadani mwa amakambuzi a mabila teto waarugwa mahinje waavaha mabila eehu”. <sup>20</sup>Ahaakohaga anaaye, wiira: “Oli wuuvi? Mwaha bwaddi mmwihiyeliinyu wewo mulobwana

---

<sup>e</sup> 2.6 *Muddanga* mu ewogelo ya eHeberi enaligana ni mwanddeya wa Nowe. Madhu mamohive. Moone Wambeela 6.14. <sup>f</sup> 2.10 *Mozezi* mu ewogelo ya eHeberi ndina nowi Mozezi nnatapulela *otavuliwa*.

oyo? Mmwiithane wi nimvahe yooja”. <sup>21</sup>Mozezi ahirumeedhaga okalaga wa Reweli. Oliye ahimvaha mwaanaye Zipora wi Mozezi amutele. <sup>22</sup>Zipora ahimbala mwihipa mwaana-mulobwana, Mozezi ahimuthwa ndina nowi Geresomi<sup>g</sup> mwaha ahiira: “Gili namadha mwiilaboni ya amohi”.

<sup>23</sup>Egavirile malabo majinji, mwene a wEgubuddu ahikwa. AEzarayeli yookuwa mwaha wowoonihiwa goyi muudhaarini, wuundda weewa wahiiweya wa Mulugu. <sup>24</sup>Mulugu veewiliye wuundda weewa, ahuu-buwelela nipangano no waandana neeriliiyena ni Abarhamu, Ezaaki, ni Yakobo. <sup>25</sup>Mulugu ahawoona aEzarayeli, Mulugu ahinona wukuuwa weewa.

### Mulugu onomwiithana Mozezi

**3** <sup>1</sup>Mozezi aajihaga mabila a mooya aaye Zhetero,<sup>h</sup> namakutha a elabo ya oMidiyani. Ahaathukulaga mabila waadhowana muwari mwa kokola, ahaafiyagana omwaangoni wa Mulugu, oHorebi.<sup>i</sup> <sup>2</sup>Mungero a NABWIYA ahimooneyelaga oliye vanlumini na munddo, vanikupuni. Mozezi ahoonaga mataakuru ehiddaga munddo, mbwenye mataakuru-ya kayalalaga. <sup>3</sup>Ndala Mozezi ahiwogaga mwa yekaaye, wiira: “Asaa! Ginaya wewule wi goone yootikiniha ele, mwaha bwaddi mataakuru ehinalaleliiwa”. <sup>4</sup>Vooniligiiye NABWIYA wi oliye onowaaddamela wi oone, vaari va nikupu Mulugu ahimwiithanaga, wiira: “Mozezi, Mozezi!” Oliye ahaakulaga, wiira: “Di miyo, gili va”. <sup>5</sup>Mulugu ahiwelelaga owoga, wiira: “Kufiye wuno, okurule satho mmanyaloni mwaawo, mwaha niburo viliiwe thi noweela”. <sup>6</sup>Ahiwogaga teto, wiira: “Miyo gili Mulugu a makolo aawo, Mulugu a Abarhamu, Mulugu a Ezaaki ni Mulugu a Yakobo”. Mozezi ahilogohaga kove yaaye, vovi owoovaga omusugwa Mulugu. <sup>7</sup>Nabwiya ahiwogaga teto, wiira: “Ebaribareene, gihoona orabuliihiwa wa mulogo waaga oli wEgubuddu. Gihiiwa wuundda weewa ni mwaha woolabihiwa ni owali. Gihinona orabula weewa. <sup>8</sup>Mowindala gihikita wi gawaakihedhe wa aEgubuddu, ni waavenyihamo mwiilaboni mule, gaadhowena elabo yapama ni yuulubale wewo oli mukaka ni enwi wona mihinje, elabo ya aKanani, aHeti, aAmori, aPerezi, aHevi ni aZhebusi. <sup>9</sup>Gihiiwa wuundda wa aEzarayeli, vano miyo gihoona orabuliihiwa weewa ni aEgubuddu. <sup>10</sup>Ginowuuruma odhowe wa Farawo, wavenyihewo mulogo waaga, aEzarayeli wEgubuddu”.

<sup>11</sup>Mozezi ahimwaakulaga Mulugu, wiira: “Miyo gili aani wi gidhowe wa Farawo gaavenyihewo aEzarayeli wEgubuddu?” <sup>12</sup>Mulugu ahimwaakulaga, wiira: “Miyo gili ni weevo. Ela enoodha ekale etoonyihedho yowi di miyo ginooruma: Wakumiha mulogo waaga wEgubuddu, onoodha

<sup>g</sup> 2.22 *Geresomi* mu ewogelo ya eHeberi nnapulela *namadha elabo emohi*. <sup>h</sup> 3.1 *Zhetero* Ole oneethaniwa teto Reweli. <sup>i</sup> 3.1 *Horebi* Mwaango olena oneethaniwa teto Sinayi.

omulabege Mulugu vamwaangoni veva”. <sup>13</sup>Mozezi ahiwogaga ni Mulugu, wiira: “Geera wi gaafwanya aEzarayeli, giira: ‘Mulugu a makolo eenyu ohugiruma wa nyoovo’, yagikoha, yiira: ‘Ndina naaye baani?’ Gawaaddele avi?” <sup>14</sup>Mulugu ahiwoga ni Mozezi, wiira: “Miyo Gili Oyene Oli Oyene. Wawaaddele aEzarayeli, weere: ‘Miyo Gili Oyene’ digirumile odha wa nyoovo”. <sup>15</sup>Mulugu ahiwogaga teto ni Mozezi, wiira: “Wawaaddele aEzarayeli, weere: ‘NABWIYA,<sup>j</sup> Mulugu a makolo eenyu, Mulugu a Abarhamu, Mulugu a Ezaaki ni Mulugu a Yakobo, digirumile odha wa nyoovo’. Ndda thi ndina naaga noohumala, ndala nyo muneerege oguubuwelelave okala ni okala. <sup>16</sup>Dhowa, waatugumanye apogo aEzarayeli, wawaaddele weere: ‘NABWIYA, Mulugu a makolo eenyu, Mulugu a Abarhamu, Mulugu a Ezaaki ni Mulugu a Yakobo ahooneyela wa miyo, eeraga: Ebaribareene gihoona, gihinona eyene muneereliwiinyu wEgubuddu. <sup>17</sup>Mowindala ghiwoga wi: Miyo ginoodha guvenyihewoni wEgubuddu wewo munarabulihwiinyu, guudhowiheni elabo ya Kanani, ya aHeti, ya Amori, ya aPerezi, ya aHevi, ya aZhebusi, mwiilaboni mwemo muli mukaka ni enwi wona mwihinje’. <sup>18</sup>Aliwa enoodha yiiwe owoga waawo. Odhowe wa mwene a wEgubuddu vamohi ni apogo aEzarayeli vano omwaaddele wiire: ‘NABWIYA, Mulugu a aHeberi, ahigumana ni hiyo. Ndala munihiye wi nidhowe mwiiddeffereni malabo maraaru wi nakuthe mukutho wa NABWIYA Mulugu eehu’. <sup>19</sup>Mbwenye, miyo gihinona wi mwene a wEgubuddu kadha oohiyani wi mudhowege vahikala owaddihedhiwa ni kopolo. <sup>20</sup>Mowindala, ginoodha gimuddwadhe Egubuddu ni kopolo dhaaga, gimoonihe dhootikiniha vaari vaaye, ndo onoodha oohiyeni wi mudhowege. <sup>21</sup>Ginoodha giirihe wi aEzarayeli erumeedhiwege pama ni aEgubuddu wi mwaadhowaga muhwenye ndo mwihinna yego. <sup>22</sup>Kadda mwihiyana amulobege mwaaddamani aaye naari namadha onakaliyena, amvahege dhoosanyiwa ni parata ni oro, amvahege guwo dhowaawariha aniinyu anaalobwana ni anaahiyana. Ndala munoodha mwawaake dhooreela dheewa aEgubuddu”.

### Mulugu onomvaha kopolo Mozezi

**4** <sup>1</sup>Mozezi ahaakulaga, wiira: “Ki yeera wi ehifunave ogiroromela naari wiiwelela owoga waaga, yiira: ‘NABWIYA kooneyele wa we’ ”. <sup>2</sup>NABWIYA ahimukohaga Mozezi, wiira: “Eyo eli mmadani mwaawo ddi?” Ahaakulaga, wiira: “Mukumbuzo”. <sup>3</sup>NABWIYA ahiiraga: “Ovokedhe vati”. Mukumbuzo wahisadduwaga nyowa. Vevale Mozezi oothawaga. <sup>4</sup>NABWIYA ahiiraga wa Mozezi: “Ohidde mwiila”. Oliye ahitadeelaga moonoo waaye ohidda nyowa ele mwiila, vano yahisadduwaga okala mu-

<sup>j</sup> 3.15 NABWIYA mu ewogelo ya eHeberi di Zhova. Zhova mu ewogelo ya eHeberi nneewe-ya wona: *Miyo gili oyene*.

kumbuzo. <sup>5</sup>NABWIYA ahiwogaga, wiira: “Ela etoonyihedho, eroromele wi NABWIYA, Mulugu a makolo eenyu, Mulugu a Abarahamu, Mulugu a Ezaaki ni Mulugu a Yakobo ahooneyela wa we”.

<sup>6</sup>NABWIYA ahiwogaga, wiira: “Ovolosihe ndada naawo omurimani”. Ahiirana ndo. Vavenyihiliyewo afwanyile nigali na maredda,<sup>k</sup> nowee-la wona maralala. <sup>7</sup>Nabwiya ahiwogaga, wiira: “Ovolosihe ndada naawo omurimani”. Mozezi ahiwelelaga ovolosihawo, vavenyihiliyewo ahoona-ga nigali wona mwakaleliwa nikupa naaye. <sup>8</sup>NABWIYA ahiwogaga, wiira: “Yahuuroromela, naari ehirumeedhela pama etoonyihedho yowambeela, mwa emohi, enoodha eroromele. <sup>9</sup>Mbwenye yahiroromela dhitoonyihedho dhedho biili, ehiiwa teto owoga waawo, orugwe mahinje a muNilu, othathiledhe vati vowumma. Mahinje ayene onaarugwiwe mwinko enoodha esadduwe ekale a mwazi vati vevale”.

<sup>10</sup>Ndala Mozezi ahiiraga wa NABWIYA: “Aa, Nabwiya! Miyo kaginonile owoga okuma omambeelelo ofiyedha peeno munawogiinyu ni miyo mwiimeleli eenyu. Vowi gili muthu ooguguma”. <sup>11</sup>NABWIYA ahimwaakulaga, wiira: “Osasanyile mulomo wa muthu baani? Naari omusasanyile muthu okala oohuwoga, oohiwa, owoona naari ohoona baani? Kahuwo miyo NABWIYA? <sup>12</sup>Dhowa dhiinoveva! Miyo ginowuukamihedha yoofwaneela owoga”.

<sup>13</sup>Mozezi ahaakulaga, wiira: “Aa, Nabwiya! Murumeni mmohi ogihiya miyo”. <sup>14</sup>Vevale NABWIYA ahitakaleliwaga ni Mozezi, wiira: “Aroni, muLeevi, kahuwo ddibilo? Gihinona wi oliye onowoga pama. Onoodha agumane ni we, oofwanya onoodha ohagalale. <sup>15</sup>Ndala onoodha omwaaddele ni omvaheedhele madhuya. Miyo ginoodha gikale ni we vamohi ni Aroni, ginoodha gusuuzihe yego munaafunigiinyu wiirana. <sup>16</sup>Aroni onoodha awoge ni mulogo vamburoni vaawo wona namafiyihedha, afiyihedhege dhoowoga dhaawo, ndala we onoodha okale wona Mulugu a oliye. <sup>17</sup>Thukula mukumbuzo ola mmadani mwaawo; mwa olena onoodha wiirena dhitoonyihedho”.

### Mozezi onowelela wEgubuddu

<sup>18</sup>Mozezi ahiwelela wa mooya aaye Zhetero, wiira: “Mugihye giwelele wEgubuddu wi gawoone addibilaga akala agumi”. Zhetero ahimwaakulaga, wiira: “Dhowa mmurenddeleni”.

<sup>19</sup>NABWIYA ahiwogaga teto ni Mozezi oMidiyani, wiira: “Dhowa owelele wEgubuddu vovi ehikwa aatene alene yafuna wuupa”. <sup>20</sup>Ndala Mozezi ahimuthukulaga mwihiyanaaye vamohi ni anaaye, waagweliha vabuuruni, owelelaga elabo ya wEgubuddu, agathukule mukumbuzo wa Mulugu mmadani mwaaye.

<sup>k</sup> 4.6 *Maredda* mu ewogelo ya eHeberi kunatoonyihedha mareddave mbwenye teto dhiiredda dhoohiyana-hiyana dha nikupa na muthu.

<sup>21</sup>NABWIYA ahimwaaddelaga teto Mozezi, wiira: “Wafiya wEgubuddu, woonihedhe wa Farawo dhootikiniha nde dhaatedhene guwiikeleliimi wi weerena. Mbwenye ginoodha gimummihe murima Farawo, ahirumee-dhele wi mulogo odhowege. <sup>22</sup>Omwaaddele Farawo, wiire: ‘NABWIYA dinawoga: Ezarayeli di mwaanaga owambeela. <sup>23</sup>Guhuwaaddela wi: Omwihiye adhowege mwaanaga adhowe agilabege. Akala we ohumu-kooddiha odhowa, ginompa mwaanawo owambeela’ ”.

<sup>24</sup>Mozezi voolenddoni, agali vamburoni voogonavo, NABWIYA ahimf-wanyaga, afunaga ompa. <sup>25</sup>Vevale Zipora ahithukulaga nibwe nowiirwa, omwiinelana mwaanaye; omukahinyana manyalo Mozezi, ahiwogaga, wiira: “Ebaribareene, we oli ndala mamuna a mwazi wa miyo”. <sup>26</sup>Ndala NABWIYA ahimwihiyaga Mozezi. Zipora ahiwogaga, wiira: “Oli ndala mamuna a mwazi” mwaha wowiinela.

<sup>27</sup>NABWIYA ahiwogaga ni Aroni, wiira: “Dhowa mwiiddereni wi wagumane ni Mozezi”. Oliye onoodha, agamfwanyile Mozezi omwaan-goni wa Mulugu; ahimulojelaga ni bezhu. <sup>28</sup>Mozezi ahimwaaddelaga Aroni madhu maatene yamurumile NABWIYA ni dhitoonyihedho dhaatedhene dhamurumiliye wiirana. <sup>29</sup>Ahivenyaga Mozezi ni Aroni, waatugumanya apogo aatene aEzarayeli. <sup>30</sup>Aroni ahawaaddelaga madhu maatene ayene NABWIYA yamwaaddeligiye Mozezi, vano ahiiragana dhitoonyihedho vaari va mulogo. <sup>31</sup>Mulogo wa Ezarayeli wahiroro-melaga. Veewiliwa wi NABWIYA ahaweeddela aEzarayeli mwa mabasa, ahoona orabulhiwa weewa, vevale mulogo wahikokoraga, omutamaala NABWIYA.

### Mozezi ni Aroni enowoga ni Farawo

**5** <sup>1</sup>Ndala ahivenyaga Mozezi ni Aroni owoga ni Farawo, wiira: “NABWIYA, Mulugu aEzarayeli dinawoga, eeraga: ‘Ohiye mulogo waaga wa Ezarayeli wi wagisasanyedhe mathanga mwiiddereni’ ”. <sup>2</sup>Farawo ahaakulaga, wiira: “NABWIYA aawo baani wi miyo gimwiwe owoga waaye, gaahiye aEzarayeli edhowege? Kagimunonile NABWIYA, kaginarumeedhela waahiya aEzarayeli wi edhowege”. <sup>3</sup>Aliwa yahiiraga: “Mulugu a aHeberi ohugumana ni hiyo. Mowindala, munihiye wi nidhowe wiiddereni malabo maraaru wi nakuthe mukutho wa NABWIYA, Mulugu eehu, ahinanidheelena dhireda naari koddo”. <sup>4</sup>Vevale mwene a wEgubuddu ahiiraga: “We Mozezi ni Aroni, mwaha bwaddi munaahiheliinyu athu olaba mmabasani mweewa? Dhowani, mwawelele mmabasani mweenyu!” <sup>5</sup>Teto Farawo ahiwogaga, wiira: “Athu ala ehiinji-va waakwaranya a mwiilaboni mu, mbwenye nyoovo munowaahiiha mabasa ewa!”

### Farawo onoweenjedhedha waarabuliha aEzarayeli

<sup>6</sup>Nlabo nendde Farawo ahaalumulaga apogo a mabasa ni asupayi, wiira: <sup>7</sup>“Wambeela peeno odhowa musogolo muhaavahege manasi athu alena oosasanyana njola wona mweeresiinyu. Aliwa yaadhowelege, etugumanyege weekiwa”. <sup>8</sup>Ahawaaddelaga teto wi wiinjiva wiwa wa njola okale wona malabo amundduli. “Muhuvuguleve! Booyere, mwahaya buuyene enawogeliisu, yiiraga: ‘Ndoweni nakuthe mukutho wa Mulugu eehu’. <sup>9</sup>Mweenjedhedhe mabasa wa alobwana ale, esugwiwege ohidda dhedho wi ehiiwelelege madhu ooratha”.

<sup>10</sup>Ndala yahivenyaga apogo a mabasa vamohi ni asupayi, waadde-la mulogo, yiiraga: “Farawo dinawoga wi nuhuuvahegeni manasi.<sup>1</sup> <sup>11</sup>Mwaadhowelege weekiinyu wewo munooniinyu. Mbwenye kilivo nneerihu nivugule va mabasa eenyu”. <sup>12</sup>Vevale athu yahimwadheyla elabo yaatene ya wEgubuddu osayela dhoolalela dha manasi baahi. <sup>13</sup>Apogo a mabasa yowaavahesa mabasa yiiraga: “Mwaaguve mmarihe mabasa eenyu wona vevale vaaliwawo manasi”. <sup>14</sup>Asupayi ayene Farawo yaasakuliye mwa aEzarayeli, yoowaxuliwa ni apogo a mabasa. Apogo ale yowaakoha, yiiraga: “Mwaha bwaddi muhumariheliinyu mabasa a ndilo naari a peeno oosasanya njola wona mweeresiinyu?”

<sup>15</sup>Asupayi aEzarayeli yahidhowa wa Farawo wiikubanyedha, yiiraga: “Mwaha bwaddi munanirabulihiinyu mowindala hiyo, anamalaba eenyu? <sup>16</sup>Manasi kinanivaha. Enoniruma teto yiiraga: ‘Musasanye njola’. Hiyo, anamalaba eenyu, nnowaxuliwa vihili mwaha, mbwenye athu eenyu bineeriha”.

<sup>17</sup>Farawo ahaakulaga, wiira: “Muli ooyere, vano muli ooyere! Veva munawogiinyu, mwiiraga: ‘Nidhowege nakuthe mukutho wa NABWIYA’. <sup>18</sup>Dhowani dhiinoveva, mwalabege. Manasi ebaribareene kamunavahiwege, mbwenye ginafuna wiinjiva wa njola okalege wona mwemule guulamuleliimini”. <sup>19</sup>Vevale asupayi aEzarayeli yahihaleeliheya mwaha dhawaaddeliwa wi: “Kagidha givugulave wiinjiva wa njola guulamuleliimini wuuba nlabo ni nlabo”. <sup>20</sup>Evenyagavo vameentoni va Farawo yahigumanaga ni Mozezi vamohi ni Aroni, ayene yaajjihedhaga. <sup>21</sup>Asupayi yahaawogana, yiiraga: “NABWIYA owoonani oothongeni, mwaha wa nyo nihiriwa ootadhiwa wa Farawo ni wa anamalaba aaye. Muhawinka mwaalago mmadani mweewa wi enipege”.

<sup>22</sup>Vevale Mozezi ahiwelelaga wa NABWIYA, wiira: “Nabwiya, munaarabulihela ddi mowindala athu ala? Vano mwagirumela ddi? <sup>23</sup>Wambeela vevale giwogiliimi ni Farawo mu ndina neenyu, oliye onorabulihave mulogo weenyu teto kamunaakamihedha athu eenyu”.

<sup>1</sup> 5.10 Manasi Yataganyihedhana, yaponddaga theya, yowuubana njola.



### Mulugu onowaakwaneliha nipangano naaye wa aEzarayeli

**6** <sup>1</sup>NABWIYA ahiwogaga ni Mozezi, wiira: “Vano onoodha woone ginafuniimi omwiirela Farawo. Ni kopolo dhaaga onoodha oohiyeni wi mudhowege, ni kopolo dhaaga onoodha owiigareni mwiilaboni mwaaye”. <sup>2</sup>Mulugu ahiwogaga teto ni Mozezi, wiira: “Miyo gili NABWIYA. <sup>3</sup>Geyooneyihile wa Abarhamu, Ezaaki ni wa Yakobo wona Mulugu oowodha-wodha, mbwenye ndina naaga nowi NABWIYA, aliwa kayaginonilena. <sup>4</sup>Gahisasanya nipangano naaga no Waandana ni aliwa wi gaavahe elabo ya oKanani, wewo wamagiliwa wona anamadha. <sup>5</sup>Ndala gihiiwa wuundda wa aEzarayeli, alene aEgubuddu yawiiriwa adhaari. Guhuubuwelela nipangano naaga no waandana ni aliwa. <sup>6</sup>Mowindala, wawaaddele aEzarayeli, wiire: Miyo NABWIYA ginoodha guuruleni sapo dha aEgubuddu, guutapuleni mudhaarini mweenyu guwooboleni ni moonoo waaga wowuuba, gaathonge aEgubuddu ni dhowiireya dha kopolo. <sup>7</sup>Ginoodha guuthukuleni mukale mulogo waaga, ginoodha gikale Mulugu eenyu. Muneere munone wi miyo gili NABWIYA, Mulugu eenyu wuurulileni sapo dha aEgubuddu. <sup>8</sup>Ginoodha guudhowiheni elabo eyene galibeleliimi waavaha makolo eenyu Abarhamu, Ezaaki ni Yakobo. Ginowuvahani, okala yeenyu. Miyo gili NABWIYA”.

<sup>9</sup>Mozezi ahawaaddelaga dhedhi aEzarayeli, mbwenye aliwa kayamwiiwelele mwaha wookathamiheya ni odhaari wa owali. <sup>10</sup>Nuwindo NABWIYA ahiwogaga teto ni Mozezi, eeraga: <sup>11</sup>“Dhowa, wamwaaddele Farawo, mwene a wEgubuddu, wi aahiye edhowege aEzarayeli mwiilaboni mweewa”. <sup>12</sup>Mozezi ahimwaakulaga NABWIYA, wiira: “Akala aEzarayeli kiiwile dhawogiliimi, ki Farawo onagiiwe addi? Teto kaginawoga pama”. <sup>13</sup>Mbwenye ndala NABWIYA ahiwogaga ni Mozezi vamohi ni Aroni wi yawaaddele aEzarayeli ni Farawo, mwene a wEgubuddu yowi: “Nihilamuliwa waavenyihamo aEzarayeli mwiilaboni ya wEgubuddu”.

### Makolo a Mozezi ni Aroni

<sup>14</sup>Ala makolo ni asogoleli a emudhi ya aEzarayeli, eharihaga abaabi ewa:

Rubeni, mwaana owambeela obaliwa a Yakobo<sup>m</sup> anna ahima ala: Hanoki, Palu, Hezironi, ni Karimi; alena asogoleli a emudhi ya Rubeni.

<sup>15</sup>Simiyoni anna ahima ala: Yemuweli, Yamini, Ohadi, Yakini, Zohari, ni Xawuli (ola amaaye yaali muKanani); alena asogoleli a emudhi ya Simiyoni.

---

<sup>m</sup> 6.14 Yakobo Naari wi: *Ezarayeli*.

<sup>16</sup> Leevi, oyene anna yaaka zana ni makumi maraaru ni yaaka tanu nabilli (137), anaaye baala, owambeela a mulubale ofiyedha oogomihedha: Gerexoni, Kowati, ni Merari.

<sup>17</sup> Ahima a Gerexoni, asogoleli a emudhi, baala: Libini ni Ximeyi.

<sup>18</sup> Kowati, oliye anna yaaka zana ni makumi maraaru ni yaaka thaaru (133), anaaye baala: Amerami, Yisari, Heboroni ni Uziyeli.

<sup>19</sup> Ahima a Merari baala: Mali ni Muxi.

Ala ba emudhi ya aLeevi wona mwa makolo eewa.

<sup>20</sup> Amerami mwihiyanaaye aali Yokobedi, muLeevi teto.<sup>n</sup> Alena yahaabala Aroni ni Mozezi. Yaaka dha Amerami dhaali zana ni makumi maraaru ni yaaka tanu nabilli (137).

<sup>21</sup> Ahima a Yisari baala: Kora, Nefege ni Zikiri.

<sup>22</sup> Ahima a Uziyeli baala: Mixayeli, Elezafani ni Sitiri.

<sup>23</sup> Aroni mwihiyanaaye aali Elixeba, mwaana a Aminadabi, murogora a Naxoni. Elixeba ahaabala Nadabi, Abihu, Eleyazari ni Etamari.

<sup>24</sup> Ahima a Kora yaali: Asiri, Elikana ni Abiyasafi. Baalena ahima a emudhi ya Kora.

<sup>25</sup> Eleyazari, mwaana a Aroni, mwihiyanaaye aali mmohi a ahima a Putiyeli, oliye ahimbala Fineyasi.

Baalena asogoleli a emudhi ya aLeevi wona mwa makolo eewa.

<sup>26</sup> Aroni ni Mozezi, baalena NABWIYA yaawogiligiyyena, eeraga: “Mwaakumihemo mu Egubuddu aEzarayeli wona mwa makuru a anyakoddo”. <sup>27</sup> Aroni ni Mozezi, baalena yawogile ni Farawo, mwene a wEgubuddu wi yaakumihemo mu Egubuddu aEzarayeli.

### Mulugu onomwiithana Mozezi ni Aroni

<sup>28</sup> Nlabo NABWIYA vawogiliye ni Mozezi mu Egubuddu, <sup>29</sup> ahimwiirelaga: “Miyogili NABWIYA. Omwaaddele Farawo, mwene aEgubuddu, dhaatedhene dhedho guwaaddeliimi”.

<sup>30</sup> Mozezi ahimwaakulaga NABWIYA, wiira: “Miyogili muthu ooguguma, Farawo oneere agiwe avi?”

**7** <sup>1</sup> Vevale NABWIYA ahiwogaga ni Mozezi, wiira: “Osugwe wi guwiirile wona Mulugu vaari va Farawo, vano ddibilo Aroni wona namavuhulela aawo. <sup>2</sup> Weevo omwaaddelege ddibilo Aroni dhaatedhene gineerigiimi guulamulelege, oliye amwaaddelege Farawo wi aahiye aEzarayeli evenyemo mwiilaboni mwaaye. <sup>3</sup> Mbwenye ginoodha gumummihe murima Farawo wi geenjedhedhe dhitoonyihedho ni dhootikiniha dhaaga mwiilaboni ya wEgubuddu. <sup>4</sup> Farawo kadha arumeedha mbwenye

<sup>n</sup> 6.20 MuLeevi teto Naari wi: Murogora a ababa aaye.

miyo ginoodha goonihedhe kopolo dhaaga mu Egubuddu. Ginoodha gikumihemo mulogo waaga, aEzarayeli, makuru aaga a anyakoddo, gaathonge ni goyi ejinji aEgubuddu. <sup>5</sup>Enoodha enone aEgubuddu wi miyo gili NABWIYA, veva ginoonihiimi kopolo dhaaga, gaavenyihagamo aEzarayeli”.

<sup>6</sup>Mozezi ni Aroni yahiirana dhedho wona NABWIYA mwaarumeliye, yahiiragana ndo. <sup>7</sup>Mozezi anna yaaka makumi matanu namaraaru (80), Aroni anna yaaka makumi matanu namaraaru ni yaaka thaaru (83) mudhidhi wawogiliisu ni Farawo.

### Mukumbuzo wa Aroni

<sup>8</sup>NABWIYA ahiwogaga wa Mozezi ni Aroni, wiira: <sup>9</sup>“Akala wi Farawo oorumani wi: ‘Mwiirena yootikiniha’, omwaaddele Aroni wi athukule mukumbuzo waaye avokedhe vinaakale Farawo. Oyene onoodha osadduwe nyowa yuulubale”. <sup>10</sup>Veva Mozezi ni Aroni yahigumana ni Farawo, wiirana wona valamuleliwiwa ni NABWIYA. Aroni ahivokedhaga mukumbuzo waaye vaaligi Farawo vamohi ni anamalaga aaye; mukumbuzo osadduwa okala nyowa yuulubale. <sup>11</sup>Farawo ahawiithana atthotho, akwiri ni amasenga aEgubuddu. Aliwa yahiirana emodha-modhave mwa masenga eewa. <sup>12</sup>Yahivokedhaga mukumbuzo dheewa mmohi ni mmohi, vano mikumbuzo dhahisadduwaga nyowa. Mbwenye mukumbuzo wa Aroni wahimira mikumbuzo dheewa. <sup>13</sup>Naari ndala Farawo murima wahimumma, kaarumeedhele wona NABWIYA mwawogeliye.

### Mulili wa mwazi

<sup>14</sup>NABWIYA ahiwogaga ni Mozezi, wiira: “Farawo murima ohumumma, onokoodda waahiya aEzarayeli wi edhowege. <sup>15</sup>Menselo bebeheene Farawo onadhowa wiiko. Wamujejihege wewo wi wagumanena. Waadhowa othukule teto mukumbuzo ole wasadduwile nyowa, vano weere: <sup>16</sup>‘NABWIYA, Mulugu a aHeberi ohugiruma odha wa nyoovo wi guwaaddeleni wi mwihye mulogo waaye wamulabe mwiiddedereni, mbwenye nyoovo nivano kamuneewave’. <sup>17</sup>Ndala NABWIYA finawogiiye wi: ‘Mwa elena onoodha onone wi miyo gili NABWIYA. Mukumbuzo ginniimina ginoddwadhana mahinje ala, vano enosadduwa ekale mwazi. <sup>18</sup>Somba dhili mmahinjeni mu dhineere okwa. Mahinje a mwihinje ola eneerege onukwa, vano aEgubuddu yaang'waga eneerege waweediha murima’ ”.

<sup>19</sup>Ahiwogaga teto NABWIYA ni Mozezi, wiira: “Omwaaddele Aroni wi athukule mukumbuzo waaye aatoonye mahinje a wEgubuddu, a mihinje dhaatedhene dhuulubale ni dhing'onong'ono, mmathiyani, ni mmaceelani, ni mwaatemwene munaaheliwa wi ekale a mwazi. Elabo yaatene ya wEgubuddu edhaale mwazi, naari mmunoni dha mithanko ni dha

mabwe”.<sup>20</sup> Mozezi ni Aroni yahiirana ndala wona NABWIYA mwaalamuleliiye. Aroni vavenyihiliye mukumbuzo, ahaaddwadha mahinje a mmwihinjeni; Farawo ni anamalaga aaye emoonaga. Mahinje maatene yahisadduwa mwazi.<sup>21</sup> Ebaribareene somba dhahikwamo mmwihinjeni vano mwihinje woonukwa nriba nootakala. Vevale aEgubuddu kayaanda ong'wa mwaha elabo yaatene ya wEgubuddu yahidhaala mwazi.<sup>22</sup> Mbwenye amasenga aEgubuddu yahiirana ndala teto mwa masenga eewa. Va mwaha olena Farawo murima wahimumma, karumedhele wona NABWIYA mwawogeliye.<sup>23</sup> Ahivenyavo Farawo ahidhowa vaade vaaye, moohupwatha.<sup>24</sup> AEgubuddu aatene yahitiba maceela seresere ya mwihinje wi efwanye mahinje apama, vovi mahinje a mwinko kaya-waakwaniha waang'wa.

### Mulili wa anamujoro

<sup>25</sup> Yavirile malabo matanu nameendi NABWIYA vaaddwadhiliye mahinje a mmwihinjeni.

**8** <sup>1</sup> Oliye ahiwogaga ni Mozezi, wiira: “Dhowa wa Farawo wamwaa-ddele, wiire: ‘NABWIYA dinawoga wi: Ohiye mulogo waaga wi wagilabege. <sup>2</sup> Wakooddiha mulogo waaga odhowa, ginoodha guurabulihe ni anamujoro elabo yaawo yaatene. <sup>3</sup> Mwihinje onoodha waatotore anamujoro ajinji. Ayene enaagwelege evolowege mba mwaawo, vakamani vaawo, ni nyuba dha anamalaga aawo, ni wa athu aawo aatene, ni mwemule munosiinyumo mikaathe dheenyu ni moopiya mweenyu. <sup>4</sup> Anamujoro enaadheege wa we, wa athu aawo ni wa anamalaga aawo aatene’ ”.

<sup>5</sup> Ahiwoga teto NABWIYA wa Mozezi, “Omwaaddele Aroni, wiire: ‘Wogoole moonoo, otoonye ni mukumbuzo waawo mihinje dhaatedhene dhuulubale ni dhing'onong'ono, ni mahinje a mmathiyani vano wabalalesele anamujoro elabo ya wEgubuddu’ ”. <sup>6</sup> Ndala Aroni ahogoolela moonoo waaye mahinje a wEgubuddu, vano yahigwela anamujoro, ohuruwe-dha elabo elene. <sup>7</sup> Mbwenye amasenga a Egubuddu yahiirana ndale teto mwa masenga eewa, yahaadhana teto anamujoro elabo ya wEgubuddu. <sup>8</sup> Farawo ahawiithana Mozezi ni Aroni, wiira: “Lobelani wa NABWIYA wi aavenyihevo wa miyo anamujoro ala ni wa athu aaga. Vano ginoodha gilamulele mulogo odhowege wi wakuthe mukutho wa NABWIYA”.

<sup>9</sup> Mozezi ahimwaakula Farawo, eeraga: “Munafuna gamulobele NABWIYA alini wi aavenyihevo anamujoro wa nyoovo ni wa anamalaga eenyu, wa athu eenyu, ni mba mweenyu wi ekale mmwihinjenive?” <sup>10</sup> Oliye ahaakulaga, wiira: “Menselo”. Mozezi ahiiraga: “Dhikale ndo wona muwogeliinyu, munone wi kalivo teto mmohi wona NABWIYA Mulugu eehu. <sup>11</sup> Enoodha evenyevo anamujoro va nyoovo, mmanyubani mweenyu, mwa anamalaga eenyu ni wa athu eenyu. Anamujoro enodha ewelele mmwihinjeni”.

<sup>12</sup> Vevale yahivenyavo Mozezi ni Aroni wa Farawo. Mozezi ahikuwa wa NABWIYA wi aavenyihevo anamujoro yamurumihedhiye Farawo. <sup>13</sup> NABWIYA ahiirana wona yooloba ya Mozezi; okwa anamujoro yaali mmamba, vaade ni mmiddani. <sup>14</sup> Athu yahawuugela milu ni milu, vano elabo yoonukwa yuudde. <sup>15</sup> Vooniliye Farawo wi yahivenyihiwavo anamujoro ale, ahummiha teto murima waaye, karumeedhele wona NABWIYA mwawogeliye.

### Mulili wa dhimbu

<sup>16</sup> NABWIYA ahiwogaga ni Mozezi, wiira: “Omwaaddele Aroni, wiire: ‘Othukule mukumbuzo waawo oddwadhe nthubi na theya wi nsadduwe dhimbu, dhikale veelaboni yaatene ya wEgubuddu’ ”. <sup>17</sup> Yahiirana ndo; Aroni ahithukula mukumbuzo waaye oddwadha nthubi na theya, vano dhahaadheela dhimbu athu ni aneenyameene. Nthubi naatenene na wEgubuddu nahisadduwa dhimbu. <sup>18</sup> Amasenga yahixixa osasanya teto dhimbu mwa masenga eewa mbwenye kayaandile. Ebaribarene athu ni aneenyama yahirijiwa ni dhimbu. <sup>19</sup> Vevale amasenga yahiwoga ni Farawo, yiiraga: “Ela mwiinya di Mulugu diirilena”. Mbwenye Farawo murima wahimumma, kaarumeedhileve wona NABWIYA mwawogeliye.

### Mulili wa gulihi

<sup>20</sup> NABWIYA ahiwogaga ni Mozezi, wiira: “Ovenye bebeheene, wagu mane ni Farawo aadhowaga ohaba wiiko, vano omwaaddele, wiire: ‘NABWIYA dinawoga wi: Waahiye athu aaga wi yagilabege. <sup>21</sup> Mbwenye waahirumeedha waahiya athu aaga, ginoodha guurumihedhe makwedda a gulihi, wa we ni wa anamalaga aawo, wa athu aawo ni mmanyubani mwaawo. Mmanyubani dha aEgubuddu mwahidhaala makwedda a gulihi, yahihuruwedha theya yaatene. <sup>22</sup> Nlabo nenddo ginoodha gitale munddile wa elabo ya oGoxeni wewo omagile athu aaga wi aliwa dhihaafwanye gulihi dhedho; vano onone wi miyo NABWIYA gili mwiilaboni mwemu. <sup>23</sup> Ginoodha gaamwalanihe athu aaga ni athu aawo. Menselo eneere yiireye etoonyihedho elena’ ”.

<sup>24</sup> NABWIYA ahiirana ndo; yahivolowa makwedda malubale a gulihi dhedhi mmanyubani dha Farawo ni dha anamalaga aaye. Dhahitakaliha elabo yaatene ya wEgubuddu. <sup>25</sup> Farawo ahawiithana Mozezi ni Aroni, owoga, wiira: “Dhowani wi mwakuthe mukutho wa Mulugu eenyu mwiilaboni mwemu”. <sup>26</sup> Mozezi ahimwaakulaga, wiira: “Dhinorumee-dheya wi hiyo nikuthe mukutho wa NABWIYA Mulugu eehu mwiilaboni elena, vovi dhili dhootadhiwa mwa aEgubuddu. Neera wi nikuthe mukutho mwemu muliwa, kinanipe ni mabwe? <sup>27</sup> Nnafuna needde olenddo wa malabo maraaru nidhowaga mwiideddereni wi nakuthe mukutho wa NABWIYA, Mulugu eehu wona munilamuleliye”.

<sup>28</sup>Ndala Farawo ahiira: “Ginowuuhiyani wi mwakuthe mukutho wa NABWIYA Mulugu eenyu mwiideddereni mbwenye muhudhowe woo-lapelawene. Mugilobebele teto miyo”. <sup>29</sup>Mozezi ahimwaakulaga, wiira: “Ginoovenyavo va nyoovo wi gamulobebele NABWIYA. Menselo makwedda alena a gulihni enoovenyavo wa Farawo, wa anamalaga eenyu, ni wa athu eenyu. Mbwenye Farawo muhuginyengethe teto wi muhaahiye athu odhowa okutha mukutho wa NABWIYA”. <sup>30</sup>Vevale Mozezi ahivenyagavo va Farawo, ahilobelaga wa NABWIYA. <sup>31</sup>NABWIYA ahiirana wona yooloba ya Mozezi. Gulihni dhahivenyavo va Farawo ni va anamalaga aaye vamohi ni athu aaye, kayahalileve gulihni, naari emohi. <sup>32</sup>Mbwenye dila ela teto Farawo ahummiha murima waaye kaahiyileve athu wi emaruwe.

### Mulili wookwa aneenyama

**9** <sup>1</sup>Nuwindo NABWIYA ahiwogaga ni Mozezi, wiira: “Odhowe wamwaaddele Farawo, weere: ‘NABWIYA, Mulugu a aHeberi dinawoga, eeraga: “Waahiye athu aaga wi yagilabege”. <sup>2</sup>Mbwenye walibihedhave waawadeeliha wi ehidhowege, <sup>3</sup>kopolo dha NABWIYA dhinoodhana yoolaga ya mulili. Ela enoodha yaape akavalo eenyu, abuuru eenyu, akamelo<sup>o</sup> eenyu, ng'ombe dheenyu, ni mabila eenyu. <sup>4</sup>Mbwenye NABWIYA onoodha agawe dhoofuwa dha aEzarayeli ni dha aEgubuddu wi dhilikwe aneenyama aEzarayeli’ ”. <sup>5</sup>NABWIYA ahitoonyaga mudhidhiya, wiira: “Menselo NABWIYA fineeriye eerena mwiilaboni mwemu”.

<sup>6</sup>Ebaribareene, omenseloni wiwa NABWIYA ahiiragana elena, vano dhoofuwa dhaatedhene dha aEgubuddu dhahikwa mbwenye dha aEzarayeli kadhakwile, naariwene emohi. <sup>7</sup>Farawo ahaarumaga athu wi yoone dhoofuwa dha aEzarayeli. Aliwa yahimwaaddelaga wi kadhakwile. Naari ndala Farawo murima wahimumma, kaahiyilege athu wi emaruwe.

### Mulili wa analibwe oopuduwa

<sup>8</sup>NABWIYA ahiwogaga wa Mozezi ni Aroni, wiira: “Muhavule mmadani mweenyu nddoora na muthukuthani, vano Mozezi avavihedhe odhulu, Farawo oonaga. <sup>9</sup>Nenddo nneere nsadduwe nikale nthubi nivavele veelaboni yaatene ya wEgubuddu. Ndda nneere osadduwa nikale analibwe enapuduwege wi ekale makwadda wa athu, ni wa aneenyama aatene a elabo ya wEgubuddu”.

<sup>10</sup>Aliwa yahithukulaga nddoora na muthukuthani, vano yahooneyihaga wa Farawo. Mozezi ahivavihedhaga odhulu, vano nahisadduwaga okala analibwe ayene yahipuduwa osadduwaga anamungovola wa athu ni wa aneenyama. <sup>11</sup>Amasenga kayaandile ofiya vameentoni va Moze-

o 9.3 Kamelo aali mwaneenyama mulubale athukula dhoobo.

zi mwaha wa analibwe oopuduwa. Yaali ni aliba masengeene wona teto aEgubuddu aatene. <sup>12</sup>Naari ndala NABWIYA ahummiha murima wa Farawo, ohurumeedhela wona NABWIYA mwawogeliye ni Mozezi.

### Mulili wa muzongwe a maralala

<sup>13</sup>NABWIYA ahiwogaga ni Mozezi, wiira: “Ovenye bebeheene, wagu-mané ni Farawo, omwaaddele, wiire: ‘NABWIYA, Mulugu a aHeberi dinawoga wi: Waahiye athu aaga emaruwe wi yagilabege. <sup>14</sup>Vano ginoodha girumihe mulili dhaaga dhaatedhene wa weevo mwiinya, wa anamalaga aawo ni wa athu aawo, onone wi mwiilaboni yaatene ya vati kalivo onafwanafwana ni miyo. <sup>15</sup>Gahaafune wuupa ni athu aawo aatene ni yoolaga ya kopolo dhaaga, wootolowa mwiilaboni ya vati. <sup>16</sup>Gahuulogolela wi gawoonihedhe kopolo dhaaga wi ndina naaga nivuwihwe mwiilaboni yaatene. <sup>17</sup>Naari ndala onowaakooddiha athu aaga wi emaruwe. <sup>18</sup>Menselo mudhidhi wowi huulena ginomurubwiha muzongwe mujinji a maralala, oyene ohunarubwege wEgubuddu wambeela vevo vipaddusiwe elabo eyo ofiyedha peeno. <sup>19</sup>Vano wavenyihevo ng'ombe dhaawo ni dhego dhaatedhene dhili ode. Athu aatene ni aneenyama waathawihedhe mba, vovi dhafwanyiwave muzongwe a maralala oyo dhinookwa’ ”.

<sup>20</sup>Anamalaga amohi a Farawo yahoovaga madhu a NABWIYA, yahaathawihedhaga mba anamalaba eewa ni aneenyama eewa. <sup>21</sup>Ale yaheewelege madhu a NABWIYA yahaahiyaga ode anamalaba eewa ni aneenyama eewa. <sup>22</sup>NABWIYA ahiwogaga ni Mozezi, wiira: “Otedeedhele moonoo odhulu, wewo onoodha odhe muzongwe mulubale a maralala emorele elabo yaatene ya wEgubuddu. Enoontha yaaddwadhe athu, aneenyama ni dhoovaha dhaatedhene dha mmiddani mwa elabo eyene”. <sup>23</sup>Mozezi ahitedeedhelaga mukumbuzo waaye odhulu, vano NABWIYA ahirumiha ozherima, maralala ni dari veelaboni. Ebaribareene NABWIYA ahimurubwiha muzongwe a maralala elabo ya wEgubuddu. <sup>24</sup>Maralala ale yaali malubale ni dari dhooharana, yaaligi yego ehineereyege wambeela vevale athu vamagiliwa wewule. <sup>25</sup>Mwiilaboni yaatene ya wEgubuddu, muzongwe ole a maralala ahiddwadha onoonga dhego dhaatedhene dhaali ode, wambeela athu, aneenyama, dhoovaha, ni mithanko dhaatedhene dha mukokolani. <sup>26</sup>Mbwenye muzongwe ole a maralala kaafiye elabo ya oGoxeni wakala aEzarayeli.

<sup>27</sup>Vevale Farawo ahimwiithanaga Mozezi ni Aroni, wiira: “Vano gihithega. NABWIYA dowogoowa, ndala miyo ni athu aaga nihikalana muladdu. <sup>28</sup>Lobani wa NABWIYA. Dhihinaakwana dari dhedhi dhuulubale ni muzongwe ola a maralala. Miyo ginoodha guuhiyeni mudhowege; kamudha mukalave mwemu”.

<sup>29</sup>Mozezi ahaakulaga, wiira: “Gaakumaga muluwani mu ginomuloba NABWIYA. Dari nda dhinomaala, ahikalewo teto muzongwe a maralala wi munone yowi elabo ela sa NABWIYA. <sup>30</sup>Mbwenye gihinona wi nyooovo ni anamalaga eenyu ebaribareene nivanove kamunamoova NABWIYA Mulugu”.

<sup>31</sup>Nthoje ni mahele dhahinoongeya, vovi dheereya mahele egamagile mihubu vano nthoje niganna todo. <sup>32</sup>Mbwenye tirigu ni dhoodhaliwa dhimohi kadhawaxuliwe vovi dhaali dhihinamele.

<sup>33</sup>Mozezi ahivenyagavo va Farawo ahikumagamo muluwani mule, otadelela moonno wa NABWIYA, olobela. Dhahimaalaga dari ni muzongwe a maralala ahiremusaga, kuhurubwaga mwiilaboni. <sup>34</sup>Vooniliye Farawo wi muzongwe ni dari dhahimaala ahiwelela othega; wummiha murima waaye vamohi ni anamalaga aaye. <sup>35</sup>Veale Farawo mwa ohaaddeleya waaye kaarumeedhele wi aEzarayeli emaruwe wona NABWIYA mwawogeliye ni Mozezi.

### Mulili wa pombo

**10** <sup>1</sup>NABWIYA ahimwaaddelaga Mozezi, wiira: “Dhowa wa Farawo ni wa anamalaga aaye, guhummiha mirima dheewa wi gawoonihedhe dhitoonyihedho dhaaga vaari veewa. <sup>2</sup>Gahiirana ndala teto wi wawaaddelege anaawo ni aniwa waavevusa waaga aEgubuddu ni dhitoonyihedho dhedho giiragana vaari veewa, enone wi miyo gili NABWIYA”.

<sup>3</sup>Mozezi ni Aroni yahidhowaga wa Farawo, wiira: “NABWIYA, Mulugu a Heberi dinawoga, eeraga: Ofiyedha alini okooddaga wiiyeviha wa miyo? Waahiye athu aaga wi edhowe yagilabe. <sup>4</sup>Wakooddave waahiya athu aaga wi emaruwe, menselo ginowuurumihedha mwiilaboni mwaawo pombo. <sup>5</sup>Dhedho dhinadha dhidhaale elabo yaatene, theya ehooneyege. Enoodha eje dhoodhaliwa dhaatedhene ni mithanko dhaatedhene dhahalile mudhidhi wa muzongwe a maralala. <sup>6</sup>Pombo dhedhi, dhinoodha dhidhaale mmanyubani mwaawo, mmanyubani mwa anamalaga aawo aatene ni mmanyubani mwa aEgubuddu aatene, yego ehinaabihege wiireya wa ababiinyu naari wa makolo eenyu, ovenya omambeelelo vamagiliwa veva ofiyedha peeno”. Mozezi ahirugunuwaga ovenyavo va Farawo. <sup>7</sup>Veale anamalaga a Farawo yahiiraga wa oliye: “Ofiyedha alini mulobwana ola anireyelaga musapa ndala? Mwaahiye alobwana ala wi yamweebedhege NABWIYA, Mulugu eewa. Kamunoona wi Egubuddu onosadduwa nddebe?”

<sup>8</sup>Mozezi ni Aroni yahidhowiwagana wa Farawo. Oliye ahiwogaga ni aliwa, wiira: “Dhowani wi mwamulabe NABWIYA, Mulugu eenyu; ki enaathowe baani?” <sup>9</sup>Mozezi ahimwaakulaga, wiira: “Nnadowawo ni azombwe eehu, ni owuuluvala eehu ni ahima eehu anaalobwana ni anaahiyana. Nnodhowana teto mabila eehu, mbuzi dheehu ni ng'ombe dheehu, vovi nnaya osasanya mathanga a NABWIYA”.



<sup>10</sup>Farawo ahiwogaga ni aliwa, wiira: “Goohiyani odhowa ni ahima, sowi NABWIYA oli ni nyoovo. Moone, obure oli osogolo weenyu. <sup>11</sup>Mudhowe alobwanave wi mwamulabe NABWIYA; siiyene, mulobiliinyu”. Ndala Mozezi ni Aroni yahiigariwaga vameentoni va Farawo.

<sup>12</sup>Veale NABWIYA ahiwogaga ni Mozezi, wiira: “Otoonye elabo ya wEgubuddu ni moonoo waawo wi dhidhe pombo mwiilaboni elena wi dhije dhoodhaliwa ni dhaatedhene dhedho muzongwe a maralala dhahiyiliye”. <sup>13</sup>Mozezi ahogoolaga moonoo otoonya elabo ya wEgubuddu ni mukumbuzo vano NABWIYA ahidhihaga pevo wewo onakuma nduwa wambeela obebehini ofiyedha omenseloni wiwa, eyene yadhiihile pombo. <sup>14</sup>Nda dhaali dhijinji dhahimorela elabo ya wEgubuddu, dhahimwadheya okuneela elabo yaatene ele. Yoopadduwa ela kinaabihege wiireya wewule ovenya omambeelelo, ofiyedha peeno. <sup>15</sup>Dhahihuruwedha elabo yaatene, vati viribaga; dhahija dhoodhaliwa dhaatedhene ni dhoovaha dha mi-thanko, dhende muzongwe a maralala dhahanoongiliye. Kayaalivo yaali ekiiti, mmithankoni ni dhoodhaliwa dhaatedhene dha mmiddani mwiilaboni ya wEgubuddu.

<sup>16</sup>Mowaaguva Farawo ahimwiithanaga Mozezi ni Aroni, wiira: “Gihi-muthegela NABWIYA, Mulugu eenyu, ni nyoovo teto. <sup>17</sup>Vano ginoloba wi mugikurumuwele yoothega yaaga olendo olena. Mulobeke wa NABWIYA, Mulugu eenyu wi agivenyihedhevo okwa wula”.

<sup>18</sup>Mozezi avenyaga vameentoni va Farawo, ahilobelaga wa NABWIYA. <sup>19</sup>Veale NABWIYA ahidhiha pevo emohi yuulubale, wewo onadhowela nduwa, eyene yavavihile pombo dhaatedhene wiithela muNyaza Yoofiila. Kawahalilege pombo emohi mwiilaboni yaatene. <sup>20</sup>Naari ndala NABWIYA ahummaha murima wa Farawo, wahirumeedhela wi aEzarayeli emaruwe.

### Mulili wa epipi

<sup>21</sup>NABWIYA ahiwogaga ni Mozezi, wiira: “Wogoole moonoo waawo otoonye odhulu. Enoodhawo wewo epipi mwiilaboni yaatene ya wEgubuddu wi athu yaababelanege”.

<sup>22</sup>Veale Mozezi ahogoolaga moonoo waaye, vano yahidhaaga epipi, oribiha elabo ele yaatene ofiyedha malabo maraaru. <sup>23</sup>Athu kayoonanaga, vano kaalivo avenyagavo vevale vakaraatiligiiye ofiyedha malabo maraaru. Mbwenye aEzarayeli aatene yahikalagana waara mumburoni mweewa. <sup>24</sup>Veale Farawo ahimwiithanaga Mozezi, wiira: “Dhowani ni mirala dheenyu mwamulabe NABWIYA, mbwenye kamuthukule mabila eenyu, mbuzi dheenyu naari ng'ombe dheenyu”.

<sup>25</sup>Mozezi ahaakulaga, wiira: “Munihiye wi nakuthe mukutho wa NABWIYA, Mulugu eehu. <sup>26</sup>Nnothukula dhifuwo dheehu dhaatedhene, vovi kinahalave ya ddoddobwa naariwene. Dhaatedhene nnothukula wi

nakuthe mukutho wa NABWIYA, Mulugu eehu, vovi kaninonile eneriihu namulabegena NABWIYA wewo onayiihu”.

<sup>27</sup>NABWIYA ahummihave murima wa Farawo ohurumeedhela wi emaruwe. <sup>28</sup>Farawo ahiwogaga ni Mozezi, wiira: “Ogivenyedhevo, wiyii-nanele teto kuwele wona kove yaaga. Wawelave ginowuupa”. <sup>29</sup>Mozezi ahaakulaga, wiira: “Ohuwoga pama. Kagidha teto goona kove yaawo”.

### Ovuwihiwa wa mulili wookwa ahima owambeela obaliwa

**11** <sup>1</sup>Vevale NABWIYA ahiwogaga ni Mozezi, wiira: “Ohukalawo mulili woogomihedha gineeriimi gimwiirele Farawo ni a wEgubuddu. Ndo onoodha oohiyeni wi mudhowege, mbwenye oneere owiigareni mwaatene muhuwele. <sup>2</sup>Wawaaddele athu wi alobwana aatene yaalobege amwaaddamani eewa, ahiyana aatene yaalobege amwaaddamani eewa, dhego dhoosanyiwa ni parata ni oro”. <sup>3</sup>NABWIYA ahiirana wi a Ezarayeli erumeedhiwege pama ni a wEgubuddu. Mulobwana ole Mozezi aali oovuweya mwiilaboni ya wEgubuddu, oovuweya wa anamalaga a Farawo ni wa athu aatene.<sup>p</sup>

<sup>4</sup>Mozezi ahiwogaga, wiira: “Ndala NABWIYA dinawoga wi: Vaari ni vaari va mahiyu ginoodha gimweeddelele Egubuddu. <sup>5</sup>Dhowambee-la obaliwa dhaatedhene dhinoodha dhikwe, wambeela wa mwaana a Farawo, oyene onalamula, ofiyedha mwaana owambeela a mwihiyana mudhaari, oyene oli vasiloni. Enoodha ekwe teto aneenyama oofuwiwa aatene owambeela obaliwa. <sup>6</sup>Onoodha wiiweye wuundda wuulubale mwiilaboni yaatene ya wEgubuddu, wuundda wewo ohunaabihege wiireya, kudha wiireya teto dila emohi. <sup>7</sup>Mbwenye wi munone yowi NABWIYA ohaahiyaniha aEgubuddu ni aEzarayeli, kadha awoopopiha aliwa naari aneenyama, naariwene mwanabwa kadha awoobela muriga”. <sup>8</sup>Vevale Mozezi ahiwogaga teto, wiira: “Enoodha egifwanye anamalaga aawo alena aatene egikokorele, yiiraga: ‘Mvenyemo, we vamohi ni athu aawo aatene yuuharege’. Egeereyile ela fineeriimi givenye”. Mozezi ootakaleli-weene ahivenyavo va Farawo.

<sup>9</sup>Ndala NABWIYA ahiwogaga ni Mozezi, wiira: “Farawo kadha owiiwani wi dhootikiniha dhaaga dheenjedhedheye mwiilaboni ya wEgubuddu”. <sup>10</sup>Mozezi ni Aroni yahiiirana dhootikiniha dhedhi dhaatedhene vameentoni va Farawo, mbwenye NABWIYA ahummiha murima wa Farawo, kaarumeedhile wi aEzarayeli emaruwe mwiilaboni mwaaye.

### Paxkwa

**12** <sup>1</sup>Mwiilaboni ya wEgubuddu NABWIYA ahiwogaga ni Mozezi vamohi ni Aroni, wiira: <sup>2</sup>“Wa nyoovo mweeri olena oneere okale

<sup>p</sup> 11.3 Ofwanafwanihe ni Abarahamu muniivuru na Wambeela 12.3.

mweeri wowambeela wa yaaka. <sup>3</sup>Mwaaddele mulogo waatene wa Ezarayeli, mwiire: Wa malabo kumi a mweeri olena, kadda muthu vaade vaaye athukulege nibila nimohi va emudhi yaaye. <sup>4</sup>Veemudhini yaahinjivavo athu, egawanenge nibila nimohi ni owaaddamanana eewa wona viinjiveliwa, mooligana ni majelo a kadda muthu. <sup>5</sup>Muthukulege nibila naari mbuzi, mbwenye ekalege yowaakwanela, yapogo emalile yaaka emohi. <sup>6</sup>Mulogolele ofiyedha yaakwanaga malabo kumi ni mannayi a mweeri olena. Vevale mulogo waatene wa Ezarayeli funeeriiwa wiibegge ociguwoni. <sup>7</sup>Muthukule mwazi mudholihe vamulago wula ni wula ni vadhuluviwa, nyuba dhedho munaatakuniwege nyama ya aneenyama ale. <sup>8</sup>Mahiya alene mutakune nyama yowoosiwa veeko vamohi ni mikaathe dhoohuheliwa emela teto ni mataakuru oowaawa. <sup>9</sup>Ehikalevo muneerinyu mutakune ekiiti, naari yoopiyiwa ni mahinje, mbwenye yowoosiwa veeko. Mutakune teto muru ni meddo ni mirubo. <sup>10</sup>Mutakune yaatene ehihalege; yeera ehala mmenseloni mwiwa mpahege veeko. <sup>11</sup>Mutakune mugawarile dha voolenddoni ni satho dheenyu, mukogodho weenyu ogali mmadani. Muje mowaaguva; di Paxkwa a NABWIYA. <sup>12</sup>Sowi mahiye ayene ginoodha givire mwiilaboni ya wEgubuddu, vano ginoodha gaape mwiilaboni mwemo ahima aatene owambeela obaliwa, a athu ni aneenyama. Ginoodha gaathonge ni wawooniha goyi amilugu aatene a wEgubuddu. Miyo gili NABWIYA!

<sup>13</sup>“Mwazi oneere okale etoonyihedho ya nyuba muneeriinyu mukalemo. Goonave mwazi kaginaavire wa nyoovo vano kudha wudheelani mulili wootolosa, gineeriimi gaape athu mu Egubuddu. <sup>14</sup>Nlabo nenddi nneere nikale noothabela vano munoodha mwiirena wona mathanga malubale a NABWIYA; anamabaliwelamo eenyu a musogolo teto enoodha yiiregena wona nlamulo noohumala. <sup>15</sup>Malabo matanu nameenddi munoodha mujege mikaathe dhoohuheliwa emela. Nlabo nowambeela mvenyihagemo emela mba mweenyu, vovi oyene oneere aje yego ya emela, ovenya nlabo nowambeela ofiyedha nlabo na neetanu nameenddi, muthu oyene onoodha avenyihiwemo mwa Ezarayeli. <sup>16</sup>Nlabo nowambeela ni nlabo na neetanu nameenddi okalegewo otugumana woweela wa nyoovo. Kamwihiddege mabasa, ehili osasanya dhooja. <sup>17</sup>Ndala mwiirihedhege mathanga a mikaathe dhoohuheliwa emela, vovi thi nlabo nenddo gaavenyihiliimi makuru eenyu a anyakoddo mwiilaboni ya wEgubuddu. Mowindala, muubuwelelege nlabo nenddi nyoovo ni anamabaliwelamo eenyu a musogolo wona nlamulo noohumala. <sup>18</sup>Mujege mikaathe dhoohuheliwa emela, wambeela ociguwoni wa nlabo na neekumi nennayi na mweeri wowambeela, ofiyedha sumaana yaatene. <sup>19</sup>Wa malabo alena matanu nameenddi, kamuhelege mba mweenyu yego ya emela; oyene oneere aje elena, naari agali namadha naari mwanamurala, onoodha avenyihiwemo munlogoni mwa Ezarayeli. <sup>20</sup>Kamujege

yego ya emela. Munlogoni mweenyu mwaatemwene mujege mikaathe dhoohuheliwa emela”.

<sup>21</sup> Mozezi ahawiithanaga apogo aatene aEzarayeli, wiira: “Emudhi ni emudhi musakulege nibila wi mupele Paxkwa. <sup>22</sup> Mmaganye matadu, mbwinihe mbasiyani muli mwazi wa nibila, mudholihege mmilagoni mweenyu, wula ni wula ni vadhuluviwa. Ahikalevo oneere akumemo mba mwaaye ofiyedha mmenseloni mwiwa. <sup>23</sup> Vowi NABWIYA onovira wi aape aEgubuddu. Vwoona vamulago vigadholihiwe mwazi, NABWIYA onoodha avire vevale vano kadha amurumeedhiha muliba otolosa wi avolowe mmanyubani mweenyu wi ape. <sup>24</sup> Muharihege malamulo alena mudhidhi waatene, nyoovo ni aniinyu. <sup>25</sup> Mwafiya elabo eyene NABWIYA eneeriye oovaheni wona mwawogeliye, muharihege malamulo alena. <sup>26</sup> Ahima yookohagani, yiiraga: ‘Mabasa baani alaya?’, <sup>27</sup> Mwaakulege, mwiiraga: ‘Ola mukutho wa Paxkwa<sup>q</sup> a NABWIYA, oyene avirile vadhulu va nyuba dha aEzarayeli nigali wEgubuddu. Vevale vaapiliye aEgubuddu, oobola mirala dheehu’ ”. Athu yahikokoraga omutamaala NABWIYA. <sup>28</sup> Vevale aEzarayeli yahidhowaga wiirana wona mwemo NABWIYA mwamulamuleliye Mozezi ni Aroni.

#### Mulili wookwa ahima owambeela obaliwa

<sup>29</sup> Efiyedhaga vaari ni vaari va mahiyu, NABWIYA ahaapa ahima aatene owambeela obaliwa a elabo ya wEgubuddu, wambeela wa mwaana Farawo, oyene alamula, ofiyedha wa mwaana a oyene akala mukaambura; vamohi ni aneenyama aatene owambeela obaliwa. <sup>30</sup> Farawo ahivenya mahiyu, vamohi ni anamalaga aaye ni aEgubuddu aatene. Wahiiweya kutho yuulubale mu Egubuddu vovi kuwahalile nyuba mwahaali muthu ookwa. <sup>31</sup> Mahiyu alene Farawo ahimwiithanigha Mozezi ni Aroni, wiira: “Mvenyemo mwiilaboni mu, nyoovo vamohi ni aEzarayeli. Mudhowege mwamulabege NABWIYA wona munawogeliinyu. <sup>32</sup> Muthukule teto dhoofuwa dheenyu dhaatedhene wona muwogeliinyu. Maruwani mudhowege, mweera ndo mugireelihe miyo teto”. <sup>33</sup> AEgubuddu yowawii-garaga aEzarayeli efunaga wi yaaguve ovenyemo mwiilaboni mweewa, yiiraga: “Nnokwa hiyo aatene!” <sup>34</sup> AEzarayeli yahithukulaga saambale nookandda na mikaathe noohuheliwa emela mukarikoni, ohuruwe-dha ni guwo okapatha. <sup>35</sup> AEzarayeli yahaalobaga aEgubuddu dhego dhoosasanyiwa ni parata ni oro, vamohi ni dhoowara, wona Mozezi mwawogeliye. <sup>36</sup> NABWIYA ahiiraha wi athu aaye erumeedhiwe pama ni aEgubuddu, yowaavahaga dhedho dhalobigiiwa. Ndala yahawaaka dhego dhijinji aEgubuddu.

<sup>q</sup> 12.27 Paxkwa mu ewogelo ya eHeberi nnapulela ovira vadhulu.

### Okuma wa aEzarayeli mu Egubuddu

<sup>37</sup>Ndala yahimaruwaga aEzarayeli, nluwa no oRamesesi odhowaga murudda wa oSukoti ni meddo, wiinjiva wiwa waali macikwi mazana matanu ni zana nimohi (600.000) alobwanave yaanda owana koddo, dhiheelengiwe mirala. <sup>38</sup>Yahitaganyihedheyaga teto ni athu amohiwa ajinjeene, ayene yamaruwiliwana vamohi, yahaathukulaga mabila ni ng'ombe dhijinji. <sup>39</sup>Yahoosaga mikaathe dhedho dhadhiliwana wEgubuddu ehilile emela, mwaha wowiigariwa kayamusasanyedhe pooso.

<sup>40</sup>Mudhidhi wamaliliwa wEgubuddu aEzarayeli dhaali yaaka mazona mannayi ni yaaka makumi maraaru (430). <sup>41</sup>Vaakwaniliwa yaaka dhedhi nlabo nendde makuru maatene a anyakoddo a NABWIYA yahivenyagamo mu Egubuddu. <sup>42</sup>Mahiyu alene NABWIYA ahawaang'anela aEzarayeli ekumaga mu Egubuddu; ala bi mahiyu a NABWIYA aEzarayeli eneriwa ethabelege ying'anelaga ni anamabaliwelamo eewa.

### Magano a Paxkwa

<sup>43</sup>NABWIYA ahiwogaga teto ni Mozezi ni Aroni, wiira: “Ala magano oja mathanga a Paxkwa: kakalevo mmarala oneere aje mathanga a Paxkwa. <sup>44</sup>Mbwenye mudhaari ooguliwa ni korowa, aabihege wiineliwa wi ajege mathanga a Paxkwa. <sup>45</sup>Anaweendda naari elabaga vevo kijewene. <sup>46</sup>Nibila nitakuniwege mu nyuba emohive, kamudhowegena mburo mmohi naari opwesa nikuvaniwa. <sup>47</sup>Mulogo waatene wa aEzarayeli othabelege mathanga ala a Paxkwa. <sup>48</sup>Eera akalavo namadha mwa nyoovo afunaga omwiirana Paxkwa oomuthithimiha NABWIYA, mwambeelege wawiinela alobwana aatene a veemudhini viwa, vevale fi-neeriye arumeedhiwe ofiya amwiirena. Mmwiire wona mwanamurala a mwiilaboni mwemu, mbwenye ahiineliwa kamujuwene. <sup>49</sup>Malamulo ala bi mamohive wa anamurala a mwemu naari wa anamadha enakala mwa nyoovo”.

<sup>50</sup>AEzarayeli yahiiiragana ndala wona mwemo NABWIYA mwamulamuleliye Mozezi ni Aroni. <sup>51</sup>Nlabo nendde NABWIYA ahaavenyihamo mu Egubuddu aEzarayeli, eharihaga makuru eewa a anyakoddo.

### Oveleeliwa wa ahima owambeela obaliwa

**13** <sup>1</sup>NABWIYA ahiwogaga ni Mozezi, wiira: <sup>2</sup>“Mugivelelelele ahima a aEzarayeli aatene anapongwe owambeela obaliwa, baaga. Teto aneenyama apogo aatene owambeela obaliwa, baaga”.

<sup>3</sup>Mozezi ahiwogaga ni athu, wiira: “Muubuwelelege nlabo nenddi, mmaruwiliinyu wEgubuddu wewo mwaaliinyu adhaari. Vowi NABWIYA ahuuvenyihani mwiilaboni mule ni moonu wa kopolo, ndala muhujega mukaathe wooheliwa emela. <sup>4</sup>Peeno veva munakumiinyu mu Egubuddu

thi nlabo na mweeri wa Abibi.<sup>r</sup> <sup>5</sup>NABWIYA onowuufiyihani mwiilaboni ya aKanani, aHeti, aAmori, aHevi ni aZhebusi. Eyene NABWIYA yaalibeleliye waavaha makolo eenyu. Elabo eyene eli yowiinjiva mukaka ni enwi wona mihinje, mwafiya mwathabele mathanga ootamaala mweeri olena. <sup>6</sup>Malabo matanu nameendi mutakunege mikaathe dhihilihiwe emela. Nlabo na neetanu nameendi musasanyege mathanga oomuthithimiha-na NABWIYA. <sup>7</sup>Malabo alena matanu nameendi mutakunege mikaathe dhihilihiwe emela; mwiilaboni mweenyu mwaatemwene ehifwanyeyemo emela. <sup>8</sup>Nlabo nendde mwawaaddelihege aniinyu, mwiiraga: ‘Nnowiirana nda mwaha wa eyene NABWIYA yaniireliye nikumaga mu Egubuddu’. <sup>9</sup>Mabasa ala enoodha ekale wona etoonyihedho eli mmadani mwaawo naari vayuuji vaawo wi muwogege malamulo a NABWIYA malabo maatene, vowi ni moonoo wakopolo NABWIYA ahuuvenyihawoni wEgubuddu. <sup>10</sup>Ndala mulogolege magano ala mwa mudhidhiya wi muthabelege yaaka ni yaaka.

<sup>11</sup>“NABWIYA oofiyihani elabo ya aKanani yalibeleliye wuuvahani nyoovo vamohi ni makolo eenyu, <sup>12</sup>mwaavelelege ahima aatene owambeela obaliwa wa NABWIYA. Dhowambeela obaliwa dhaatedhene dhapogo dhoofuwa dheenyu sa NABWIYA. <sup>13</sup>Wa mwanamwana owambeela obaliwa a buuru, mmoobolege ni nibila. Mwahiirana ndala mmukotholege nikohi. Mwawoobolege teto aniinyu anapongwe aatene owambeela obaliwa. <sup>14</sup>Musogolo aniinyu yuukohagani, yiiraga: ‘Dhedhi dhinatapulela ddi?’ munoodha mwawaakulege, mwiirege: ‘NABWIYA ni moonoo waaye wakopolo danivenyihile wEgubuddu, wewo waaliihu adhaari. <sup>15</sup>Wahooneya wi Farawo ahummiha murima waaye kaafuna onihya wi nivenyemo mwiilaboni mule, NABWIYA ahaapa ahima aatene owambeela obaliwa a elabo ya wEgubuddu, ahaapa owambeela obaliwa aatene athu ni aneenyama. Va mwaha olena nneerege okutha mukutho<sup>s</sup> wa NABWIYA wa alobwana owambeela obaliwa aatene teto nneerege wawoobola ahima eehu aatene owambeela obaliwa’. <sup>16</sup>Mabasa ala enoodha ekale wona etoonyihedho eli mmadani mwaawo, naari va yuuji vaawo wi NABWIYA ni moonoo wakopolo, danivenyihile wEgubuddu”.

### Mulugu onwaasogolela athu aaye

<sup>17</sup>Farawo agahiyile mulogo wi odhowege, Mulugu kaavirihile dila yavira wa aFilisti, naari yaalive yavakuukuvi, oliye ahuubuwelaga wi athu

<sup>r</sup> 13.4 *Mweeri wa Abibi* wambeela vakukuuve omagomelo wa mweeri wa Marusu ni omambeelelo wa mweeri wa Abirili, mudhidhi woohadda dhilo waaddamelaga.

<sup>s</sup> 13.15 *Mukutho* Mukutho ola yaali yooofwanafwaniha baahi, kahuwo wi yoompa mwaana emukutha, mwaha wowi Mulugu ahikooddhiha ofiyedha waalaga aKanani. Moone Deteronomiyo 12.29-31; Zheremiya 19.5.

enooopiheye ni koddoo ewelele wEgubuddu. <sup>18</sup>Vevale Mulugu ahaaviriha dila ya mwiiddedereni yoogoromba yoodhowa Nyaza Yoofiila. Mulogo wa Ezarayeli ovenyaga wEgubuddu wahitadaana wowiisasanyedheleene owana. <sup>19</sup>Mozezi ahaathukulaga makuva a Zhuuze, vovi Zhuuze ahaalibeliha aEzarayeli wi yiirena ndo. Zhuuze teto ahiwoga, wiira: “Ebaribareene Mulugu onoodha ookamihedheni. Eera ndo, mwaadhowaga mwaathukule makuva aaga”.

<sup>20</sup>Vavenyiliwa oSukoti yahimaga misasa dheewa wEtamu, waaddamela mwiiddedereni. <sup>21</sup>NABWIYA owaasogolela aliwa mutana ni murabo wowimela dhololo, vano mahiyu owaasogolela ni munddo wowimela dhololo wi yeeddege mutana ni mahiyu. <sup>22</sup>Murabo ni munddo kawaahiyave moweedda mweewa, mutana ni mahiyu.

### Farawo onowaathamagela aEzarayeli

**14** <sup>1</sup>NABWIYA ahiwogaga ni Mozezi, wiira: <sup>2</sup>“Wawaaddele aEzarayeli wi ewelele mundduli, yamage misasa dheewa osogolo wa Pi-Hayiroti vaari ni vaari va Migidoli ni nyaza, waaddamela wa Bahala-Zefomi. <sup>3</sup>Vano Farawo onoodha oobuwele dha aEzarayeli, eerege: ‘Ehiholowa mwiiddedereni’. <sup>4</sup>Ginoodha gimummihe murima Farawo wi oothamagelegeni, vevale fineeriimi githithimihiwe mwa Farawo ni anyakoddo aaye aatene. AEgubuddu enoodha enone wi miyo gili NABWIYA”. AEzarayeli yahiiragana ndale. <sup>5</sup>Vaaddeliwiye mwene a wEgubuddu wi mulogo ohuthawa, yahicinja moobuwelelo mamohi a Farawo ni wa anamalaga aaye, wiira: “Elaya niirilihu ddi? Waarumeedhela aEzarayeli, naahiya odhowa; kaninna oonilabela?”

<sup>6</sup>Vevale Farawo ahisasanyedhaga gareeta dha koddoo dhaaye vamo-hi ni anyakoddo aaye. <sup>7</sup>Ahithukulaga magareeta a koddoo oororomeleya mazana matanu nammohi (600), vamohi ni magareeta mamohi a koddoo a wEgubuddu. Magareeta eli maatene yalamuliwa ni mpogo a anyakoddo. <sup>8</sup>NABWIYA ahimummihaga murima Farawo, mwene a wEgubuddu, wi aathamagele aEzarayeli, yeedda moogonjiha. <sup>9</sup>Anyakoddo a wEgubuddu ni akavalo eewa yowaathamagihaga aEzarayeli ni magareeta a koddoo maatene a Farawo. Yahaafwanyaga aEzarayeli egakaraatile seresere ya nyaza waaddamela o Pi-Hayiroti osogolo wa Bahala-Zefomi. <sup>10</sup>Farawo agawaaddamele, aEzarayeli yahawoonaga aEgubuddu yaathamagelaga. Vevale yahoovaga ebaribareene, wambeela okuwa wa NABWIYA. <sup>11</sup>Yahiwogaga ni Mozezi, wiira: “WEgubuddu yeere ohukalawo masiye owaakwana oologohiwawo hiyo, onidheelana okwela mwiiddedereni mu? Ki elaya eniireliiwe ddi, onivenyiha wEgubuddu? <sup>12</sup>Kahuwo elena nawogesiihu wEgubuddu, niiraga: ‘Onihiye naalabege aEgubuddu?’ Yaali yapama waalaba aEgubuddu ohiya okwela mwiiddedereni mu”.

<sup>13</sup>Mozezi ahaakulaga mulogo, wiira: “Kamoove. Mukurumule mirima, moone ovulumusa wa NABWIYA oneeriye owiireleni peenova. AEgu-

buddu alene munawooniinyu kamudha teto mwawoona. <sup>14</sup>NABWIYA onoodha awane ni aliwa vamburoni veenyu, mbwenye nyo mwiirege woonela baahi”.

### Ovira wa aEzarayeli vaari va Nyaza Yoofiila

<sup>15</sup>NABWIYA ahimukohaga Mozezi, wiira: “Mwaha bwaddi onagikuweeliwe miyo? Wawaaddele aEzarayeli yambeelee weedda. <sup>16</sup>Weevo wogoole moonoo ni mukumbuzo waawo otoonye nyaza, eneere ogawanyeya wi aEzarayeli evire vaari va nyaza vowummavene. <sup>17</sup>Ginowummiha mirimadha aEgubuddu wi yuuthamagihegeni ofiyedha evolowe munyaza. Ginoodha githithimihiwe mwa Farawo ni anyakoddo aatene, ni magareeta a koddo eewa ni akavalo eewa. <sup>18</sup>AEgubuddu enoodha enone wi miyo gili NABWIYA, gathithimihiwa mwa Farawo vamohi ni magareeta a koddo aaye ni akavalo aaye”.

<sup>19</sup>Vevale mungero a Mulugu oyene eedda osogolo wa mulogo wa Ezarayeli ahiviraga okala mundduli mweewa; vano teto murabo oyene waali osogolo weewa, wahiviraga okala mundduli mweewa. <sup>20</sup>Wali vaari va misasa dha aEgubuddu ni aEzarayeli. Wa aEgubuddu murabo wahisadduwaga epipi, mbwenye wa aEzarayeli wahikala waara. Vevale mahiyu maatene aEgubuddu kayaandile waafwanya aEzarayeli.

<sup>21</sup>Mozezi ahogoolaga moonoo waaye otoonya nyaza, vano NABWIYA ahisusihaga nyaza ni pevo yowuuba, yadheelaga wewo onakuma nduwa, eyene yavireliwe mahiyu maatene yoobaga, yahiriha wi nyaza erugunuse theya yowumma. <sup>22</sup>AEzarayeli yahivolowaga munyaza, oviraga mowumma-mwene, vano mahinje yaali wona nsiri, omoononi wooja ni woong'oto.

<sup>23</sup>AEgubuddu yowaathamagelaga mundduli, ofiyedha ovolowa teto munyaza. Akavalo aatene a Farawo, ni magareeta a koddo aaye ni aliba weeddiha aaye yahifiyaga vaari va nyaza. <sup>24</sup>Oyaaga omaselo NABWIYA mmuraboni ni munddo wowiimela dhooloolo ahawoona aEgubuddu, ahaasimwelihaga, <sup>25</sup>ahaaddorihaga mapera a magareeta eewa kayaandaga weedda. AEgubuddu yahiiiraga: “Naathawe aEzarayeli! NABWIYA onowaakamihedha owana ni hiyo”.

<sup>26</sup>NABWIYA ahiwogaga ni Mozezi, wiira: “Wogoole moonoo waawo otoonye nyaza wi mahinje ewelele mumburoni mweewa, yaamire aEgubuddu ni magareeta eewa ni aliba weeddiha eewa”.

<sup>27</sup>Bebeheene Mozezi ahogoolaga moonoo waaye otoonya nyaza, vano mahinje yahivelelaga mumburoni mweewa. AEgubuddu efunaga othawa yahidhowihiwaga ni mahinje, vevale NABWIYA ahaapa aEgubuddu mu nyaza. <sup>28</sup>Mahinje yahaamiraga anyakoddo a Farawo, vamohi ni magareeta a koddo eewa ni akavalo eewa. Kaahalileve naari mmohi mwa ayene yavolowile mu nyaza yaathamagelaga aEzarayeli. <sup>29</sup>Mbwenye



aEzarayeli yahivolowaga mu nyaza oviraga mowumma-mwene, vano mahinje yaali wona nsiri nowiimela moonoo weewa wooja ni woong'oto.

<sup>30</sup>Nlabo nendde NABWIYA ahaavulumusa aEzarayeli mwa kopolo dha aEgubuddu. AEzarayeli yahawoonaga aEgubuddu egakwele seresere ya nyaza. <sup>31</sup>AEzarayeli yahoonaga kopolo dhuulubale dha NABWIYA dhaagonjihiliyena aEgubuddu. Athu egoonile nde yoomoova NABWIYA, yoomuroromela oliye vamohi ni Mozezi, namalaba aaye.

### Njibo na Mozezi

**15** <sup>1</sup>Ndala Mozezi ni aEzarayeli yahiibaga njibo ndda wa NABWIYA, yiiraga:

“Ginomwiibela NABWIYA  
vowi ohuvuwa,  
ohaavokedha munyaza akavalo  
ni aliba weeddiha.

<sup>2</sup> NABWIYA dili kopolo dhaaga  
ni wiiba waaga,  
oliye digivulumuse.  
Oliye di Mulugu aaga,  
ndala miyo gineerege omuthithimiha,  
oliye di Mulugu a baba aaga,  
vowindala gineerege omvuwiha.

<sup>3</sup> “NABWIYA di muliba koddoo,  
NABWIYA thi ndina naaye.

<sup>4</sup> Ohuvokedha munyaza  
magareeta a Farawo ni anyakoddo aaye;  
asogoleli aaye akoddo oororomeleya  
yahimiriwa muNyaza Yoofiila.

<sup>5</sup> Karo dheewa dhahibundamuwa,  
obwina vati wona mabwe.

<sup>6</sup> “Aa! NABWIYA, moonoo weenyu  
bwa nthithimiho ni wa kopolo,  
moonoo weenyu onowaasanya amwiiddani.

<sup>7</sup> Munowaapideedhela vati amwiiddani eenyu  
ni wunnuwa wa opogo weenyu.  
Owali weenyu onohidda,  
onowaapaha wona manasi.

<sup>8</sup> Mahinje yahitugumana  
ni mvumelo wa owali weenyu.  
Othamaga wa mahinje

wahiimela wona nsiri,  
mahinje a vati va nyaza  
yahisadduwa nibwe.

9 Mwiiddani ahiniharaga, eeraga:  
‘Ginowawiigara, gaafwanye,  
gawaake dhooreela dheewa,  
gigawe.

Murima waaga onoodha orubale.  
Ginoodha githukule mwaalago waaga,  
ni moonoo waaga ginoodha gaatolose’.

10 Mwahaatongwihedha mu nyaza  
ni pevo yeenyu, NABWIYA,  
mahinje waahuruwedha,  
omireya wona nsilo<sup>t</sup>  
mmahinjeni ooddiha.

11 Aa! NABWIYA, amilugu baani  
enafwanafwana ni nyo?  
Oli wona nyo baani?  
Muli ootikiniha moweela weenyu,  
owoopiha mwa nthithimiho neenyu,  
mwihirana dha malavi!

12 Muhogoola moonoo weenyu,  
elabo yahaamira amwiiddani eenyu.

13 Mwa oromeleya weenyu  
mwahaasogolela athu eenyu mwawooboliinyu.  
Muhaafiyiha omburoni weenyu woweela  
ni kopolo dheenyu.

14 Malogo yahiiwaga, ogurumelaga.  
Woova wahaamorelaga aFilisti.

15 Mamwene a wEdomu yahukuuwaga,  
apogo oMowabe yahirenjeyaga,  
aKanani yakulege weekwe.

16 Wahaamorela otikina ni woova.  
Yahimaala wona nibwe  
ni kopolo dha moonoo weenyu  
ofiyedha ovira mulogo weenyu,  
NABWIYA, ofiyedha ovira  
mulogo weenyu wooboliinyu.

17 Nyo munoodha mwaavolosihe  
ni waakaraatiha omwaangoni weenyu,

---

<sup>t</sup> 15.10 *Nsilo* Naari wi: *Xumbu*.

mburo musasanyedhiinyu, NABWIYA,  
 wi mukalegevo,  
 mburo woweela, Nabwiya,  
 madada eenyu ekaraatihiiwa.  
<sup>18</sup> NABWIYA dinalamula okala ni okala”.

### Njibo na Miriyamu ni ahiyana aatene

<sup>19</sup> Vevale akavalo a Farawo, ni magareeta aaye a koddo ni aliba weeddihaya vamoreligiwa munyaza, NABWIYA ahaawelihedha mahinje mumburoni mwiwa. Mbwenye aEzarayeli yahiviraga vaari vanyaza manyalo eewa ehinyethile.

<sup>20</sup> Miriyamu, namavuhulela, murogora a Aroni, ahithukulaga ng'oma yaaye; vano ahiyana aatene yahimuharaga egathukule teto ng'oma dheewa yiinaga. <sup>21</sup> Miriyamu owawaakulelaga, eeraga:

“Mwiibeleni NABWIYA  
 mwaha ohuvuwa,  
 ohaathathilela munyaza akavalo  
 ni aliba weeddiha”.

### Mahinje oowaawa

<sup>22</sup> AEzarayeli egalabuwile Nyaza Yoofiila, Mozezi ahaasogolela mwiiddeddereni ya oXuri. Mwemo yaheeddaga malabo maraaru eha-woonile mahinje. <sup>23</sup> Yahifiyaga oMara, mbwenye kayaandile ong'wa mahinje a oMara vowi yaali oowaawa. (Va mwaha olena fineethaniwiiwa Mara, sowi owaawa.)

<sup>24</sup> Athu yoomwaabaga Mozezi, yiiraga: “Nneere ning'we ddi?” <sup>25</sup> Ndala Mozezi ahikuwelaga wa NABWIYA, vano NABWIYA ahimoonihaga mu-thanko. Okothola ovokedha mmahinjeni, vevale mahinje yahikala oodhiva. Vevale NABWIYA ahaavahaga magano owaweeha, wiira: <sup>26</sup> “Mweera wi mvuruwanaga pama owoga wa NABWIYA Mulugu eenyu, mwiiragana ofuna waaye, ni wiiwelela malamulo aaye ni oharihamo magano aaye maatene, kagidha guudheelihani maredda wona ale gaadhiiheliimi aEgubuddu. Miyo gili NABWIYA, ginayiliha dhoovoreya dheenyu”. <sup>27</sup> Ndala yahifiyaga oElimi, wewo waali ceela kumi nabiili dha mahinje, ni akanjesa wiinjiva wiwa yaali makumi matanu nameenddi (70). Yahimaga misasa dheewa vevale.

### Mulugu onowaavaha manaa ni dhibuudhi

**16** <sup>1</sup> Mulogo waatene wa aEzarayeli wahivenyaga oElimi wahifiyaga mwiiddeddereni ya oSini, ogali vaari va Elimi ni Sinayi. Ela yeereyile egamalile malabo kumi ni malabo matanu a mweeri wa nabiili, wambeela vevale vamaruwiligiwa wEgubuddu.

<sup>2</sup>Mulogo waatene wa aEzarayeli womwaabaga Mozezi ni Aroni mwiiddedereni, <sup>3</sup>wiiraga: “Yaali pama NABWIYA ahaanipe wEgubuddu; wewule wakaraatiliihu, nitakunaga nyama ni mikaathe dhedho dharubaliihu. Mbwenye nyoovo munidhiilena mwiiddedereni mu wi mwaape dala athu ala aatene”. <sup>4</sup>Vevale NABWIYA ahimwaaddelaga Mozezi, wiira: “Ginoodha gimorihe mikaathe dhodheela odhulu. Athu eddoddelege malabo maatene, dhowaakwana nlabo ni nlabo wi gawehe gawoone akala enoweedda mmasuuzihoni mwaaga. <sup>5</sup>Nlabo na neetanu ni nimohi etugumanege ni osasanyedha mikaathe dha malabo meenddi”.

<sup>6</sup>Vevale Mozezi ni Aroni yahawaaddelaga aEzarayeli, yiiraga: “Ciguwo muneere munone wi NABWIYA duuvenyihileni elabo ya wEgubuddu, <sup>7</sup>vano obebehini muneerege woona nthithimiho na NABWIYA. Oliye owuwiiwani waaba weenyu. Hiyo nili aani wi munaabege?” <sup>8</sup>Mozezi ahawaaddelaga teto, eeraga: “Ciguwo NABWIYA onoodha oovahegeni nyama wi mutakunega, vano obebehini onoovahegeni mikaathe ofiyedha dhuuhabalegeni. NABWIYA owuwiiwani waaba weenyu. Hiyo nili aani wi munaabege? Kamwanaaba hiyo, mbwenye mwamwaaba NABWIYA”.

<sup>9</sup>Mozezi ahimwaaddelaga Aroni, wiira: “Waaddele mulogo waatene wa aEzarayeli, wiire: ‘Mmwaaddamele NABWIYA vovi ohiiwa waaba weenyu’ ”. <sup>10</sup>Aroni ahiwogaga ni mulogo wa aEzarayeli, wahisugwaga wiiddedereni, vevale yahoonaga nthithimiho na NABWIYA nigali vamuraboni.

<sup>11</sup>NABWIYA ahimwaaddelaga Mozezi, wiira: <sup>12</sup>“Ginowiiwa waaba wa aEzarayeli. Wawaaddele wi: ‘Waasiguwaga munatakunega nyama, vano obebehini dhinoohabalegeni mikaathe. Munoodha munone wi miyo gili NABWIYA Mulugu eenyu’ ”.

<sup>13</sup>Ociguwoni dhahidhaaga dhibuudhi vaade vaatevene, vano obebehini mowaapeelela, noovahavo ningame. <sup>14</sup>Nommaga, dhoohalavo dhego dhing'onong'ono dhoovevuwa wona koko yoorala yamorela vati. <sup>15</sup>Vowoona aEzarayeli yookohanaga, yiiraga: “Elaya ddi?” Vovi kayanonile. Mozezi ahawaaddelaga, wiira: “Ola mukaathe oyene NABWIYA wuuvahiliiyeni wi mutakunega. <sup>16</sup>Siilena NABWIYA yuulamuleliiyeni, ‘Mwaaguddelege mmohi ni mmohi wona majelo aaye, wona teto ni wiinjiva wa athu a vaade vaaye, maniituru meenddi kadda muthu’ ”.

<sup>17</sup>AEzarayeli yahiirana ndale, vano yowaaguddela, amohi majinji, amohi vang'ono. <sup>18</sup>Vevale yaapima, oyene aaguddela majinji kayahala, ole aaguddela vang'ono yowaakwanela. Kadda muthu aaguddela wona majelo aaye. <sup>19</sup>Mozezi ahawaaddelaga, wiira: “Ahikalevo oneere aalogo-lelege ofiyedha omenseloni wiwa”. <sup>20</sup>Naari ndala amohi kayamwiiwelela Mozezi, yoologolela nde ofiyedha mmenseloni mwiwa. Dhoosadduwa miingu onukwaga dhabure. Mwa ela Mozezi ahitakaleliwaga. <sup>21</sup>Bebehi

ni bebehi yooguddela, kadda muthu wona majelo aaye. Wadha oviha dhoonyenyeya.

<sup>22</sup>Nlabo na neetanu nammohi yooguddela dhooja dila biili, kadda muthu maniituru mannayi. Apogo yahidhaaga wa Mozezi omwaaddela elena. <sup>23</sup>Oliye ahawaakulaga, wiira: “Ela si eyene NABWIYA yawogiliye, eera: ‘Menselo nlabo noovuma, nlabo noweela na NABWIYA. Dhooja munaafunigiinyu woosa, naari munaafunigiinyu opiya mwiiregena, eyene enaahale mulogolege wi ekalege ya omenseloni wiwa’”. <sup>24</sup>Yahilogolela ya omenseloni wiwa wona Mozezi mwalamuleliye, mbwenye kayanukwa naari okalana miingu. <sup>25</sup>Mozezi ahiiraga: “Jani peeno vowi nlabo noovuma na NABWIYA, peeno kamuddoddele dhooja. <sup>26</sup>Malabo matanu nammohi muddoddelege dhooja dhoomora odhulu, mbwenye nlabo na neetanu ni meenddi thi nlabo na NABWIYA, muhuddoddelege dhooja”.

<sup>27</sup>Nlabo na neetanu ni meenddi amohi yahivenyaga wi yaddoddele, mbwenye kayafwanyilege. <sup>28</sup>Vevale NABWIYA ahiwogaga ni Mozezi, wiira: “Munaahiye alini okoodda okameela malamulo aaga ni masuuziho aaga? <sup>29</sup>Muubuwelege wi NABWIYA ohuuvahani nlabo noovuma, mowindala ohuuvahani yooja ya malabo meenddi nlabo na neetanu nammohi. Kadda muthu akalege vevale viliye nlabo na neetanu nabili”. <sup>30</sup>Vevale athu yahivuma nlabo na neetanu nabili.

<sup>31</sup>AEzarayeli yahithwa ndina na yooja ele mukaathe, “manaa.”<sup>u</sup> Yaali wona namuranga, yoweela, yatidelana odhivawa wona mikaathe dhoozasanyiwa ni enwi. <sup>32</sup>Mozezi ahiiraga: “NABWIYA dalamulele ela, eera: ‘Mulogolege maniituru meenddi a manaa wi aniinyu a musogolo yoone yooja eyene gooleliminaani mugali mwiiddedereni, goovenyihiliimini wEgubuddu’”. <sup>33</sup>Mozezi teto ahiiraga wa Aroni: “Othukule manaa maniituru meenddi, ohele mbiyani, ohiye vamburoni voweela va NABWIYA wi ekale oologoleleya wa anamabaliwelamo eenyu a musogolo”. <sup>34</sup>Wona mwemo NABWIYA mwamulamuleliye Mozezi, ndala teto Aroni ahihela vamburoni noweela wi elogoleye. <sup>35</sup>AEzarayeli yaaja manaa yaaka makumi mannayi, ofiyedha oddemulela mmavade. Yowaaja ofiyedha oKananani. <sup>36</sup>(Mpimo mwaaheliwa weethiwa dila kumi wi ofiyedhe lanta nimohi.)<sup>v</sup>

### Mahinje a vanibweni

(Numero 20.1-13)

**17** <sup>1</sup>Mulogo waatene wa aEzarayeli wahivenyaga mwiiddedereni mwa oSini, weeddaga wona NABWIYA mwaalamuleliye. Yahima-

<sup>u</sup> 16.31 *Manaa* mu ewogelo ya eHeberi nnapulela *Elaya ddi?* <sup>v</sup> 16.36 *Lanta nimohi* Elena yeethaniwa *efa* mu eHeberi. Yaneekumi yeewa yeethaniwa *omeri*.

gaga misasa niburo na oRefidimi, mbwenye kayaalivo mahinje wi athu eng'wege. <sup>2</sup>Mulogo woomunyanyuwelaga Mozezi, wiiraga: “Onivahe mahinje ning'we”. Mozezi ahaakulaga, wiira: “Mwaha bwaddi munaginyanyuweleliinyu miyo? Mwaha bwaddi munamweeheliinyu NABWIYA?”

<sup>3</sup>Vevale mulogo ni mwaha wa nthona womwaaba Mozezi, wiiraga: “Onithukule wEgubuddu wi anipe nthona, vamohi ni ahima eehu ni dhoofuwa dheehu?”

<sup>4</sup>Mozezi ahikuwaga wa NABWIYA, eeraga: “Gawiirena avi athu ala? Ehalile vang'ono ogipa ni mabwe!”

<sup>5</sup>NABWIYA ahaakulaga, omwiirela Mozezi: “Dhowa, wakale osogolo wa aEzarayeli. Waathukule apogo amohi, othukule mukumbuzo waawo oyene waddwadhiliwena Nilu, weedde. <sup>6</sup>Ginowiimela vameentoni vaawo vanibweni na oHorebi. Oddwadhe nibwe. Mwa nenddo nnookuma mahinje wi athu eng'we”. Mozezi ahiiragana ndale, apogo a aEzarayeli yoonaga. <sup>7</sup>Ahithwaga niburo ndde Masa ni Meriba,<sup>w</sup> mwaha woonyanyuwa wa aEzarayeli teto ni mwaha woomweeha NABWIYA yiiraga: “NABWIYA oli ni hiyo naari kali ni hiyo?”

### Owana wa Amaleke ni aEzarayeli

<sup>8</sup>Yahidhaaga aAmaleke ni athu eewa owanaga ni aEzarayeli niburo na oRefidimi. <sup>9</sup>Vowindala Mozezi ahimulamulaga Zhouzuwe, wiira: “Waasakule alobwana wi evenye yawane ni aAmaleke. Menselo ginoodha gikale vadhulu va mwaango, vano mukumbuzo wa Mulugu oneere okale mmadani mwaaga”. <sup>10</sup>Zhouzuwe ahiiragana ndale wona Mozezi mwamulamuligiye, vano ahiwanaga ni aAmaleke. Mbwenye Mozezi, Aroni ni Huri yahigwelaga vadhulu va mwaango. <sup>11</sup>Mozezi avenyihaga moonoo waaye, aEzarayeli yowaagonjihaga athu a Amaleke. Aakitihaga, athu a Amaleke yowaagonjihaga aEzarayeli. <sup>12</sup>Mozezi agagomile ni moonoo, Aroni ni Huri yahimukaraatihaga vanibweni. Yahihiddeelaga moonoo dhaaye, mmohi moonoo ola, vano mmohiya moonoo mmohi. Vevale moonoo dhaaye dhaaligi dhowiimeladhene ofiyedha nduwa odhowa. <sup>13</sup>Ndala Zhouzuwe ahaagonjihaga aAmaleke ni athu aaye okoddoni.

<sup>14</sup>Vevale NABWIYA ahiwogaga ni Mozezi, wiira: “Olebe elena mu-niivuruni wi ekale yowuubusedha, omwaaddele teto Zhouzuwe, wiire: ‘Ginoodha gaatolose athu a Amaleke, eddiwaaliwe mwiilaboni’”. <sup>15</sup>Mozezi ahisasanyaga ebuwa yoohelavo mukutho, othwa ndina nowi, “NABWIYA banddeela naaga”. <sup>16</sup>Ahiiraga teto: “Vowi yahiwana ni NABWIYA,<sup>x</sup> enoodha ekalewo koddoo ya NABWIYA ni athu a Amaleke malabo maatene”.

---

<sup>w</sup> 17.7 Masa ni Meriba Masa sowi weeha, Meriba sowi onyanyuwa. <sup>x</sup> 17.16 Yahiwana ni Nabwiya mu ewogelo ya eHeberi kineeweya pama. Makalelo mamohi ootapulela Venyihani banddeela ya NABWIYA.

### Zhetero onomweedela Mozezi

**18** <sup>1</sup>Zhetero, muliba a mukutho a oMidiyani, mooyaaye Mozezi, ahiwaga dhego dhaatedhene Mulugu dhamwiireliye Mozezi ni aEzarayeli athu aaye, NABWIYA mwaavenyiheliye wEgubuddu. <sup>2</sup>Zhetero, mooyaaye Mozezi, ahimudhaagana Zipora mwadha Mozezi, oyene amwihiyiligiye owani. <sup>3</sup>Ahaadhaagana teto anaaye abiili, ayene mmohi eethaniwa Geresomi (sowi namadha a wewo) vovi Mozezi ahiira: “Gali namadha mwiilaboni ya amohi”, <sup>4</sup>mmohiwa teto Eliyezeri (sowi Mulugu aaga dinagikamihedha) vovi ahiira: “Mulugu a ababa digikamihedhe, vano digivulumuse wa mwaalogo wa Farawo”.

<sup>5</sup>Ahifiyaga Zhetero mooyaaye Mozezi egali vamohi ni ahima a Mozezi ni mwihiyanaaye. Yahimfwanyaga Mozezi mwiiddedereni vamusasani waaddamela mwaango wa Mulugu. <sup>6</sup>Ahimwiithanighaga Mozezi, wiira: “Miyo, mooyaawo Zhetero, gihidha wa weevo ni mwihiyanaawo vamohi ni anaawo abiili”. <sup>7</sup>Mozezi ahivenyaga omuharelaga mooyaaye, omulojela ni nthithimiho, ombezhari, vano eselusanaga mmohi ni mukwaaye, yahivolowaga mmusasani. <sup>8</sup>Mozezi ahimwaaddelaga mooyaaye dhaatedhene NABWIYA dhamwiireliye Farawo ni aEgubuddu, mwaha wa aEzarayeli, ni dhookathamiha dhaatedhene dha mundila, ni mwemo NABWIYA mwanivulumuseliye.

<sup>9</sup>Ahigagalalaga Zhetero mwa dhapama dhaatedhene NABWIYA dhamwiireliye aEzarayeli, awoobolaga mmadani mwa aEgubuddu. <sup>10</sup>Ahiiraga: “NABWIYA athithimihiwe, oyene wuwoobolileni mmadani mwa aEgubuddu ni wa Farawo. NABWIYA oyene oobolile mulogo warabulihwiwa ni aEgubuddu. <sup>11</sup>Ayene yeethukulela wa aEzarayeli. Vano gihinonaga wi NABWIYA ohaakwaranya amilugu aatene”. <sup>12</sup>Ndala Zhetero, Mozezi mooyaaye, ahithukulaga nibila wi akuthe mukutho wa Mulugu teto ni dhooveleela dhimohi. Aroni ahidhaaga ni apogo aatene aEzarayeli wi eje vamohi ni mooyaaye Mozezi vameentoni va Mulugu.

### Osakuliwa wa aliba okamihedha

*(Deteronomiyo 1.9-18)*

<sup>13</sup>Omenseloni wiwa Mozezi ahikaraatigi wi aathongege athu. Athu yomwiing'anelaga egeemelile momwaapeelela Mozezi, wambeela bebeh ofiyedha nduwa odhowa. <sup>14</sup>Agoonile nde mooyaaye, ahimukohaga, wiira: “Elaya eneereliwe mulogo ddi? Mwaha bwaddi weevo onakaraatiwe, vano athu yimelaga wambeela bebeh ofiyedha nduwa odhowa?”

<sup>15</sup>Mozezi ahimwaakulaga mooyaaye, wiira: “Sowi athu enadha wa miyo wi ewoge ni Mulugu. <sup>16</sup>Yakalana muladdu weewa, enadha wa miyo wi gaathongege mmohi ni mukwaaye teto gaatapulele malamulo a Mulugu ni magano aaye”.

<sup>17</sup>Vevale mooyaaye Mozezi, ahiiraga: “Kiriye eneeriwe. <sup>18</sup>Ginororomela wi onogoma mowaaguva weevo vamohi ni athu alena yinniiwena. Ela eli yonyemelesesa wa weevo, vano we kunaande wiirana. <sup>19</sup>Ndala ogivuruwane yoolaga yaaga, vano Mulugu akale ni we. Owoge ni Mulugu mu ndina na mulogo, othukulelege dhookathamiha dheewa wa oliye. <sup>20</sup>Osuzihege mathongelo ni masuziho a Mulugu, ononiha dila yapama yoweeddamo, ni mabasa yinniiwana owaahidda. <sup>21</sup>Waasakule mwa athu alobwana oofwanelela, omoova Mulugu, oororomeleya, oohurumedha onyingaliwa. Waavahe othonga wa athu cikwi (1.000), amohi yaalamulege athu zana (100), amohi athu makumi matanu (50) ni amohi athu kumi. <sup>22</sup>Ayene yaalamulege athu alena mudhidhi dhaatedhene. Miladdu dhoorusa edhegena wa we, mbwenye miladdu dhimohi ayene ethongege. Ndala oneerege wona okweya teto eneerege wuukamihedha. <sup>23</sup>Weeragana ndo, onoodha waande ebaribareene, vano si eyene Mulugu enafuniye. Athu ala enoodha ekale mmurenddeleni”.

<sup>24</sup>Mozezi ahiiwelelaga madhu a mooyaaye, wiirana ndala wona mwamusuuziheliye. <sup>25</sup>Mozezi ahaasakulaga alobwana oofwanelela a mwa aEzarayeli aatene, ahaavahaga okala asogoleli a mulogo; asogoleli a athu cikwi (1.000), a athu zana (100), a athu makumi matanu (50), a athu kumi. <sup>26</sup>Ala yowaathonga athu nlabo ni nlabo. Miladdu dhoorusa yoodhana wa Mozezi, mbwenye dhaatedhene dhookweya ayene bathonga. <sup>27</sup>Ndala ahimpaganyaga mooyaaye Mozezi, owelelaga elabo ya owaniwa.

### Mulugu onowoga ni Mozezi oMwaangoni Sinayi

**19** <sup>1</sup>AEzarayeli yahifiyaga mwiideddereni ya oSinayi nlabo nowambeela na mweeri wa neethaaruu egakumile wEgubuddu. <sup>2</sup>Vavenyiligiwa oRefidimi yahimagaga misasa mwiideddereni ya oSinayi seresere ya mwaango. <sup>3</sup>Mozezi ahivenyaga ogumana ni Mulugu, omwaangoni wewo NABWIYA ahimwiithanaga, wiira: “Waaddele emudhi ya Yakobo, osorihe wa aEzarayeli, wiire: <sup>4</sup>‘Mwahoona eyene gawiireliimi wa aEgubuddu, gudhaaganaani wa miyo wona mpungu munaathukuleliye anaaye mmompeloni. <sup>5</sup>Vano mweera mwiiwelelaga madhu aaga, ni waakwanihedha waandana woopangana waaga, veva munoodha mukale athu aageene oosakuliwa wa athu aatene. Elabo ya vati yaatene saaga. <sup>6</sup>Munoodha mukale wa miyo a muumweneni wa anamakutha ni mulogo woweela’. Ba alena madhu oneeriwe wawaaddelege aEzarayeli”.

<sup>7</sup>Ahidhaaga Mozezi, wawiithana apogo aatene aEzarayeli, wawaaddeliha madhu maatene NABWIYA yamulamuleligiye. <sup>8</sup>Ndala mulogo waatene wahaakulaga vamohi, wiira: “Dhaatedhene NABWIYA dhiwogiliye nnowiirana”. Mozezi ahimwaaddelaga NABWIYA madhu athu yaakulili-



giisu. <sup>9</sup>NABWIYA ahiwogaga ni Mozezi, wiira: “Ebaribareene ginoodha gidhe wa weevo mmuraboni wooriba wi athu yiiwege gawogaga ni weevo wi athu yuuroromelege”. Mozezi vamwaaddeligiiye NABWIYA madhu a athu aaye, <sup>10</sup>NABWIYA ahiwogaga teto ni oliye, wiira: “Dhowa wa athu, waweelihe peeno ni menselo. Efule dhoowara dheewa, <sup>11</sup>ekale owiisanyedheene, vovi nlabo na neethaaru NABWIYA onoodha akitele wa athu aatene oMwaangoni Sinayi. <sup>12</sup>Olebemo munddile wowaapeela mwaango wi athu ehilupe. Wawaaddele, wiire: ‘Pole-pole wi muhugwele mwaango naari ohidda mwemu mugomeliwamo. Oyene oneere ahidde onoodha apiwe. <sup>13</sup>Onoodha avonyiwe ni mabwe naari ni mathere, mbwenye ahikalevo oneere amwihidde. Naari agali muthu, naari agali mwaneenyama kadha akalawo. Yarumave palaza moodidela, mudhowe omwaangoni’ ”.

<sup>14</sup>Mozezi ahikitaga omwaangoni odhowa wa mulogo weeliha vano yahifula dhoowara dheewa. <sup>15</sup>Mozezi ahiwogaga ni athu, wiira: “Mwiisanyedhe vovi nlabo na neethaaru, vano kammukahinye mwihiyana”.

### Ogumana wa mulogo ni Mulugu

<sup>16</sup>Njijiji noomaselo wa nlabo nendde na neethaaru, wahiweyaga okukuma ni dari; vano vadhulu va mwaango vahikalaga murabo wooriba ni oruma wuulubale wa palaza, vevale athu mmavade mweewa yoogurumelaga. <sup>17</sup>Mozezi ahaathukulaga athu mmisanani mwiwa, edhowa ogumana ni Mulugu, vano yahiimelaga waapeelela mwaango. <sup>18</sup>Mwaango wa Sinayi waatene wahikuneeleyaga ni mwiisi vovi NABWIYA ahikelagavo mwa muundo; mwiisi waaye wahigwelaga wona mwiisi wa thukutha vano mwaango waatene woothikeyaga. <sup>19</sup>Oruma wa palaza woowenjhedheyaga. Mozezi awogaga, Mulugu oomwaakulaga mwa okukuma.

<sup>20</sup>Vookita NABWIYA vaMwaangoni Sinayi ahimwiithanaga Mozezi wi agwele vadhulu va mwaango. Oliye ahigwelaga, <sup>21</sup>NABWIYA ahiwogaga ni Mozezi, wiira: “Okite, wawaaddele athu wi ehilupe munddile efunaga ogoona, vovi yeera ndo enoodha etolowe. <sup>22</sup>Anamakutha ayene enagaaddamela, yiyeelihe wi miyo NABWIYA gihaape”.

<sup>23</sup>Vevale Mozezi ahiwogaga ni NABWIYA, wiira: “Athu kidha egwela vaMwaangoni Sinayi, vovi nyoovo mwahinaaddele, mwiiraga: ‘Mweelihe mwaango, osanyedhe munddile wowaapeelela’ ”.

<sup>24</sup>NABWIYA, ahiwelelaga owoga, eeraga: “Okite, weera ndo ogwele weevo ni Aroni. Mbwenye anamakutha ni athu, ehilupe munddile efunaga

ga ogoona, wi gihaape”. <sup>25</sup>Mozezi ahikitelaga wa athu, wawaaddela dhaatedhene dhedhi.

**Malamulo kumi**  
(*Deteronomiyo 5.1-21*)

- 20** <sup>1</sup>Mulugu ahiwogaga madhu maatene ala, eeraga:  
<sup>2</sup> “Miyo gili NABWIYA, Mulugu aawo, guuthukule mwiilaboni ya wEgubuddu wewo waaliwe mudhaari.  
<sup>3</sup> “Ohukalena mulugu mmohi, ahili miyo.  
<sup>4</sup> “Ohiisasanyedhege engamuthu yoosemiwa, naari yoofwanafwaniha emohi ya yego eli odhulu, naari va elabo ya vati, naari dha mmahinjeni vati va elabo. <sup>5</sup>Ohukokorelege dhedho naari weebedha; vowi miyo gili NABWIYA, Mulugu aawo, Mulugu ahaje. Ginowawooniha goyi ayene enagithegela ofiyedha wa ahima, a aniwa teto ni aniiwa. <sup>6</sup>Mbwenye ginowawooniha odhivela waaga wooromeleya wa athu ajinji<sup>y</sup> enagifuna ni ohariha malamulo aaga.  
<sup>7</sup> “Kuromolege ndina na NABWIYA, Mulugu aawo ebeweene, vowi NABWIYA onomooniha goyi oyene onaromola ebeweene ndina naaye.  
<sup>8</sup> “Wuubuwelege weeliha nlabo noovuma.<sup>z</sup> <sup>9</sup>Malabo matanu nammohi ohidde ni omariha mabasa aawo maatene. <sup>10</sup>Mbwenye nlabo na neetanu nabiili thi nlabo noovuma na NABWIYA, Mulugu aawo. Kuhiddege mabasa: naari weevo, naari mwaanawo mwaana-mulobwana naari mwaana-mwihiyana, naari mwiimeleli aawo a mwaana-mulobwana ni a mwaana-mwihiyana, naari aneenyama aawo naari namadha onakala ni we. <sup>11</sup>Sowi mwa malabo matanu nammohi NABWIYA ahisasanya dha odhulu ni dha elabo ya vati, nyaza ni dhaatedhene dhili mwemo, vano ahivumaga nlabo na neetanu nabiili. Vowindala NABWIYA ahireeliha nlabo ndde wi nikale noweela.  
<sup>12</sup> “Waariihege ababo ni amaayo wi malabo aawo yinjive mwiilaboni NABWIYA, Mulugu aawo yuuvahiliye.  
<sup>13</sup> “Kumpe muthu.  
<sup>14</sup> “Kuraruwe.  
<sup>15</sup> “Kawiiye.  
<sup>16</sup> “Kumwiinkedhe mukwaawo.  
<sup>17</sup> “Kukalelege nrima nyuba ya mukwaawo. Kumukalelege nrima mwadha mukwaawo, naari mwiimeleli aaye a mwaana-

<sup>y</sup> **20.6** *Wa athu ajinji* Naari wi: ofiyedha wa anamabaliwelamo oohelelengeya. <sup>z</sup> **20.8** *Nlabo noovuma* Mwa aEzarayeli naali nendde nneerihi nlabo nooweruwa, naari wi sabuddu.

mulobwana, naari a mwaana-mwihiyana, naari ng'ombe yaaye, naari buuru aaye, naari yego emohi ya mukwaawo”.

### Woova wa mulogo

<sup>18</sup> Athu aatene yowiiwaga okukuma ni dari, ni oruma wa palaza, yagoonaga teto mwaango othuwaga mwiisi. Vooniligiiwa yahoovaga, othawa okala woolapela. <sup>19</sup> Yahiwogaga ni Mozezi, wiira: “Nyoovo muwogege ni hiyo nneerege wuwiiwani. Mbwenye Mulugu ahiwogege ni hiyo nnokwa”.

<sup>20</sup> Mozezi ahaakulaga, wiira: “Kamoove. Mulugu ohudha wa nyoovo wi oweeheni, mmoovege wi muhuthegege”. <sup>21</sup> Athu yaaligi woolapela-wene; mbwenye Mozezi ahaaddamelaga vamuraboni wooriba vale vaaligi Mulugu.

### Malamulo a ebuwa ya mukutho

<sup>22</sup> NABWIYA ahiwogaga ni Mozezi, wiira: “Wawaaddele ndala aEzarayeli, wiire: Muhoona wi miyo gihiwoga ni nyoovo odheela odhulu. <sup>23</sup> Muhugifwanafwanihe ni amilugu amohi. Muhaasanyege amilugu a parata naari a oro. <sup>24</sup> Mugisasanyedhele ebuwa ya theya vookutha mukutho weenyu, vevo muneerigiinyu musasanyegevo dhooveleela dheenyu dha mabila ni ng'ombe ni ohelavo dhooveleela dha murenddele. Mumburoni mwaatemwene munasakuliimi wi mugeebedhegemo, ginoodha gikale ni nyoovo vano ginoodha guureeliheni. <sup>25</sup> Mwaagisasanyedhelaga ni mabwe ebuwa ya mukutho, muhasanyege ni mabwe oosemiwa, vovi mwavirihavo migogo dhoosemana, munogithegela. <sup>26</sup> Muhasanyege teto voogwela wooviha wi muhooneyege omadave weenyu mwaagwelaga sikaadda”.

### Gano dha adhaari

(*Deteronomiyo 15.12-18*)

**21** <sup>1</sup> “Gano dhineeriwe wawaaddelege si nda: <sup>2</sup> Muthu amugula mudhaari a muHeberi, aakwanihege yaaka tanu nammohi alabaga. Mbwenye yaaka ya neetanu nabiili amutapulege odhaari waaye vano ahimulivihege. <sup>3</sup> Akala avolowile odhaari agali muddiye, atapuliwege agali muddiye. Akala ahitela, atapuliwege teto odhaari waaye ni mwihiyanaayene. <sup>4</sup> Nabwiya aaye amwinka mwihiyana, aabalana ahima anaalobwana ni anaahiyana, nlabo noomala odhaari waaye, mwihiyanaaye ni ahima enaakalege a nabwiya aaye, mbwenye oliye akume yeeka. <sup>5</sup> Mbwenye mudhaari ole awoga, eera: ‘Miyo ginamfuna nabwiya aaga, vamohi teto mwihiyanaaaga ni anaaga, kaginafuna okuma muudhaarini’. <sup>6</sup> Ndala nabwiya aaye amudhowihe vamburoni va Mulugu. Egafiyile, nabwiya aaye onoodha amutorole nibaru ni perepeso va-

mulago naari vamavolowelo, vano ndo onaakale mudhaari aaye malabo maatene.

<sup>7</sup>“Muthu amuguliha mwaanaye a mwaana-mwihiyana wi ateliwe,<sup>a</sup> ola kanakuma wona vinakumeliwa adhaari anaalobwana. <sup>8</sup>Eera ahimuhagalalihaga nabwiye, oliye ahimurumeedha omutela, nabwiya aaye amwihiyane wi amudhi aaye emoobole. Ahimugulihedhe teto muthu mmoheene, eera ndo ohumunyoza. <sup>9</sup>Mbwenye eera wi ateliwa ni mwaana a nabwiya aaye, akamihedhiwege wona mwaana a vaade vevo. <sup>10</sup>Avalaanya, ahimunyozege mwihiyana owambeela ole, naari omwaaka dhoowara ni dhooja dhaaye, amvahege dhoofwanelela wona mwihiyanaaye. <sup>11</sup>Ahimwiirelaga dhego dhedhi thaaru, mwihiyana ola onoodha avenyemo muudhaarini waaye ahimulivile korowa nabwiya aaye.

### Gano dha athu oowali

<sup>12</sup>“Muthu amporosa mukwaaye, akwa, ole omporosile mukwaaye akwe teto. <sup>13</sup>Mbwenye ampa moohufuna, akala di Mulugu orumeedhele wi akwe, muliba ompa athawele elabo gineeriimi gitoonye. <sup>14</sup>Ampa mukwaaye yapudha mootakaleliwa, naari agathaweleve omburoni wa mukutho, athukuliwegewo wi apiwe.

<sup>15</sup>“Ole onamporose babe naari maaye, ola teto apiwe. <sup>16</sup>Ole onamwihidda mukwaaye wi amugulihe naari omwiira mudhaari aaye, ola teto apiwe. <sup>17</sup>Ole onamudduba babe naari maaye, ola teto apiwe.

<sup>18</sup>“Yeera wi athu abiili ewanaga, mmohi amporosa mukwaaye ni nibwe naari ni madada, ola aahikwa, mbwenye abulelaga, <sup>19</sup>ayila eeddaga ni mukogodho, muliba omporosa kanakalana muladdu mulubale. Mbwenye alive malabo alene yaliye voolilini, vano amukamihedhe wi ayile pama.

<sup>20</sup>“Muthu amuddwadha ni emiri mudhaari aaye a mulobwana naari a mwihiyana, ofiyedha ompa, ola teto oonihewege goyi. <sup>21</sup>Mbwenye eera amala malabo meenddi naari maraaru abulelaga, muliba oddwadha kanoonihewege goyi vovi diyelele korowa dhaaye.

<sup>22</sup>“Yiira alobwana ewanaga, emporosa mwihiyana a wari, oliye abala mwaha wooddwadhiwa, chipadduwavo yego yootakala, aliba omuddwadha enoodha emulive korowa muliba mwihiyana vinafuneliye. Enoodha emulive wona munapimele anamathonga. <sup>23</sup>Mbwenye yeera epadduwavo yego emohi yootakala, ndala vinoodha vikale oliva egumi ni egumi, <sup>24</sup>niinto ni niinto, niino ni niino, ndada ni ndada, nnyalo ni nnyalo, <sup>25</sup>ampaha, ni oliyeene teto apahiwege, aporosa, ni oliyeene teto aporosiwege, amuddwadha ni oliyeene teto addwadhiwege.

<sup>26</sup>“Muthu ampwesa niinto mudhaari aaye a mulobwana naari a mwihiyana, ahoonaga, ola amutapule odhaari waaye wi adhowege mwaha wa niinto

<sup>a</sup> 21.7 Wale yaali elemelelo ya abaabi oorabula waagulihaga aniiwa anaahiyana wa alobwana ooreela wona ahiyaniwa.

naaye. <sup>27</sup>Eera wi ni owali waaye muthu amukula niino mudhaari aaye, ola amutapule odhaari waaye wi adhowege mwaha wa niino naaye nikuliwe.

### Gano dha aneenyama owaafuwa oowali

<sup>28</sup>“Ng’ombe emulata ni manyaga mulobwana naari mwihiyana akwa, ng’ombeya evonyiwe ni mabwe ofiyedha ekwe, mbwenye ehitakuniwe. Mwiinya kanakalana muladdu. <sup>29</sup>Mbwenye yeera wi ng’ombeya mwiinya aganonile wi enowaalatesa athu ni manyaga, ahimagelela, empa muthu, mulobwana naari mwihiyana, ng’ombeya evonyiwe ni mabwe, mwiinyaya teto apiwe. <sup>30</sup>Mbwenye alamuliwa wi eyoobole, vamburoni va okwa onoodha alive dhego dhedho dhinaathongeliwiye oliva. <sup>31</sup>Ng’ombe yamulata ni manyaga mwaana-mulobwana naari mwaana-mwihiyana, ng’ombeya vamohi mwiinya oneere othongiwa mooligana ni mukalelo mmohive wa nlamulo ndde. <sup>32</sup>Ng’ombe yamugudhula mudhaari a mulobwana naari a mwihiyana, onoodha aliviwe mpimo wa korowa<sup>b</sup> makumi maraarua dha parata wa mwiinya a adhaari vano ng’ombeya enoodha evonyiwe ni mabwe efiyedhe okwa.

<sup>33</sup>“Muthu atiba muliddi ahivuhelala, emorelamo ng’ombe naari buuru, <sup>34</sup>muliba otiba onoodha alivege korowa wa mwiinya a mwaneenyama ookwa ole, mwaneenyama ole akalege a muliba muliddi.

<sup>35</sup>“Ng’ombe epa ekwaaye, egulihewege. Korowadha egawanega ni muliba ng’ombe epiwe. Ng’ombe ekwile, egawaniwe teto. <sup>36</sup>Mbwenye ng’ombeya epile ekwaaye akala yahinoniwa wi yaali yoowali, vano mwiinya ohiyile yapudha ahimagelela, ola onoodha alivege ni ng’ombe yameentweene. Ele ekwile ehale ni muliba oliva.

### Gano ya yego ya mwiinya

**22** <sup>1</sup>“Muthu eeya ng’ombe naari nibila, apa naari aguliha, vamburoni va ng’ombe emohi alivege ng’ombe tanu, vamburoni va nibila nimohi alivege mabila mannayi.

<sup>2</sup>“Muthu amfwanya muliba wiiya agujulaga nyuba, emuddwadha akwa, muliba ompa kanakalana muladdu wovuuviha mwazi. <sup>3</sup>Mbwenye akala mutana, onokalana muladdu.

“Muthu eeya, awelihege dhego dhaatedhene. Aahikalana yooliva onoodha agulihewege mwiinyeene wi alive ele yiyiliye. <sup>4</sup>Eyene yeeyiliye yafwanyiwa yameentweene, akala ng’ombe, naari buuru, naari nibila, oneere awelihe biili wa eyene yeeyiliye.

<sup>5</sup>“Muthu aajihaga aneenyama aaye, elupela mmiddani mwa mukwaaye, dhinoonga dhilo, onoodha alivege ni dhilo dhookwaranya dha mmiddani mwaaye.

<sup>b</sup> 21.32 *Mpimo wa korowa* Mpimo ola weethaniwa siikulu malabo awale; wanyemela vakukuve garama kumi.

6“Muthu ahiddiha munddo, olupa, otadeya, opaha dhilo naari mudda wa mmohi, muliba ohiddiha onoodha alivege dhilo dhaatedhene dhedho dhizhile ni munddo.

7“Muthu amwinka mukwaaye korowa naari dhego dhimohi wi alogolele, dhiiyiwa, ahiddiwa muliba wiiya, onoodha alivihwiyege dila biili. 8Aahihiddiwa muliba wiiya, veva muliba ologolela dhego nde onoodha adhowiwegena vamburoni va Mulugu wi akohiwe akala ohuthukulavo yego.

9“Yego eyene enakanganeliwa, ng'ombe naari buuru naari nibila naari guwo naari yego emohi yoorimeela, eyene muthu mmohi, eneriye, wi: ‘Ela saaga’, mmohi teto, eeraga: ‘Saaga’, edhowiwegena wa aliba othonga vamburoni va Mulugu. Oyene Mulugu oneeriye amfwanyena mwaha, onoodha alivege dila biili.

10“Muthu amwinklela mukwaaye buuru, ng'ombe, nibila, naari mwaneenyama mmohi, ole akwa, naari aporeya, naari athukuliwa, ahikalavo omoonile 11veva onoodha okalevo omulibela NABWIYA mmohi ni mukwaaye wi kathukulileve yego yamukwaaye. Mwiinya arumeedha, muladdu kunakalavo. 12Mbwenye akala kaamukameele ebaribareene wiire wiiyiwa, amulive mwiinya. 13Enahiddiwa ni mwaneenyama ooguwa, aadhena makuvaya, veva muladdu kunakalavo.

14“Muthu amboliha mukwaaye mwaneenyama, aporeya naari akwa mwiinya ahilivo, onoodha amulive mwiinya. 15Mwiinya akala vevo, kanaliviwa. Akala ambolihhege ni korowa, yoolivelaya eneere ekale elene.

### Gano ya mukalelo wa athu

16“Muthu amunyengetha namwali, ohumunonile mulobwana, naari ohuthomeliwe, agonana, vano alivege teto korowa dha omvalulana, amuthukule akale mwihiyanaaye. 17Ababe yahirumeedha ovaluliwa wi amuthukule, onoodha alive korowa wona enaliveliwa namwali ohumunonile mulobwana.

18“Mukwiri ahikalewo, akwe. 19Muthu oomurarusa mwaneenyama, akwe ebaribareene. 20Oyene oneere akuthe mukutho wa amilugu amohi woohukala wa NABWIYA, onoodha atolosiwe.

21“Ohumukubanyihe naari omoonihaga goyi namadha, vovi mwaali anamadha mwiilaboni ya wEgubuddu. 22Muhaakubanyihege amaamukwele naari anakwaadhuni. 23Mwaakubanyihaga mwawoonihaga goyi ayene yuundda wa miyo, ginoodha gawiiwe aliwa. 24Oludduwa waaga onoodha onyahuwe vano ginoodha gaape ni mwaalago. Ahiyana eenyu enoodha ekale amaamukwele ni aana eenyu ekale anakwaadhuni.

25“Wafiyaariha korowa wa athu aaga, wa muliba oorabula oli ni weevo, ohujejihedhe owelihedhiwa ni yoweenjedhedhavoya. 26Wathukula

yoowara ya mukwaawo wona yoohiddeelela, naari ahilivile omuweli-hedhege yoowara yaaye nduwa nihinadhowe. <sup>27</sup>Vowi oneekuneelana eyene. Oneere agone avi? Akuwa wa miyo ginoodha gimwiiwe vovi gili oweeddiwa thagaraga.

<sup>28</sup>“Kumunyemule Mulugu naari omudduba musogoleli a mulogo waawo. <sup>29</sup>Kuribeliwe odhiha yoovelela ya dhoovaha dhapama dhoo-hadda ni dha mmiddani mwaawo. Mugivelelelele teto aniinyu owambeela obaliwa. <sup>30</sup>Mwiiregena emodha-modhave teto ni ng'ombe dheenyu ni mabila eenyu, munoodha mugivelelele; yabaliwa emalege mala-bo matanu ni meendi egali ni mmeenya, nlabo na neetanu natharu mugivelelelele.

<sup>31</sup>“Mwivelelelege wa miyo okala athu oweelihiwa; kammujege mwanee-yama apiwa ni aneenyama ooguwa. Ela mwaavahege anabwa.

### Gano dha othonga

**23** <sup>1</sup>“Ohiirele onamoona wooratha, ohumukamihedhe muthu othegile omwiirelaga onamoona wootakala. <sup>2</sup>Ohaarumeedhele athu owiinjiva wi waahare yadhowaga wiira yootakala. Naari kwiirele onamoona yego ehiireyile, waarumeedhelaga athu ale yakoromanihaga onamoona mooratha. <sup>3</sup>Ohukoromanihe muladdu wi omudhivelihe muthu oorabula.

<sup>4</sup>“Wafwanya ng'ombe naari buuru a mwiiddani aawo egaholowile, ovelelele wa mwiinya. <sup>5</sup>Wamfwanya buuru a muthu onooharahara agatongwile, akokora, omukamihedhe omvenyihe.

<sup>6</sup>“Ohukoromanihe muladdu wa muthu aawo omwiirelaga orabula. <sup>7</sup>Ohiye wawiinkedha athu. Ohuthonge wi apiwe muthu ahinna muladdu naari vihili ebaribari, vovi kagidha gimulevelele oyene winna muladdu. <sup>8</sup>Kurumeedhege onyingaliwa, vovi onowaapiba athu wiintoni, otakaliha muladdu wa ebaribari.

<sup>9</sup>“Ohumurabulihege namadha, vovi nyoovo teto mwaali anamadha mwiilaboni ya wEgubuddu, vano muhunona dha okala wiwa.

### Gano dha ovuma

*(Levitiku 25.1-7; 23.3)*

<sup>10</sup>“Yaaka tanu nammohi odhalege ni ohadda dhoolima dhaawo. <sup>11</sup>Mbwenye yaaka ya neetanu nabiili, ohiye wi theya evume ohulime, dhahalamo pwedheyela, athu oorabula efwanyegemo dhooja, naari teto aneenyama. Ndo wiiregena midda dhaawo ni dhoochala dhaawo.

<sup>12</sup>“Malabo matanu nammohi ohiddege mabasa aawo, mbwenye na neetanu nabiili ovumege. Teto ovumihege ng'ombe dhaawo ni abuuru aawo wi dhikalena kopolo dhixa, mwiimeleli a mulogo waawo ni namadha.

<sup>13</sup>“Mukale owiwelela mwa dhaatedhene guwaaddeliimini. Ohuromoleve ndina na amilugu amohi naari wawuubuwelela.

### **Mathanga malubale maraaru**

(Okuma 34.18-26; Levitiku 23.4-21,33-44; Deteronomiyo 16.1-17)

<sup>14</sup>“Vayaakani othabelege mathanga maraaru: <sup>15</sup>Okameelege Mathanga a Mikaathe Dhoozuheliwa Emela. Malabo matanu nameendi ojege mikaathe dhoozuhela emela, wona goolamuleliimi. Wiiregena mudhidhi githomiliimi mweeri wa Abibi,<sup>c</sup> vowi bu oyene wakumiliwe wEgubuddu. Kakalevo oneere adhaaga wa miyo athukulaga yego. <sup>16</sup>Okameelege mathanga a namulibu wa dhendo wadhaliiliwe mmiddani. Okameelege teto mathanga mamohi a dhoohadha dha vayaakani a dhoovaha dhaatedhene. <sup>17</sup>Alobwana aatene edheege emweebedhege NABWIYA, mwiinya a dhaatedhene, dila thaaruu vayaakani.

<sup>18</sup>“Waakuthaga mukutho wa mwazi malabo a mathanga oohiyana-hiyana, ohudhegena mikaathe dhinna emela. Naari yoonuna ehihalege mahiyu maatene ofiyedha obebehini wiwa.

<sup>19</sup>“Odhegena mu nyuba ya NABWIYA Mulugu aawo namulibu a dhoohadha dha mwiilaboni. Ohumpiyege mwaana mbuzi ni mukaka wa amaaye.

### **Mungero a NABWIYA**

<sup>20</sup>“Ginomuruma mungero wi oosogolege ni wuukamihedha mundila, mwaatemwene ofiyedha niburo nendo guusasanyedhiimi. <sup>21</sup>Omvurwanege ni omwiwelela ohumvaanyege, vowi oliye onalaba mu ndina naaga kadha alevela dhoothega dheenyuu. <sup>22</sup>Mbwenye wewelelave madhu aaye ni wiirana dhaatedhene dhedho guwaaddeliimi, ginoodha gikale mwiiddani a amwiiddani aawo, ni waaliga ayene enooliga. <sup>23</sup>Mungero aaga onoodha akale ni weevo, vano onoodha oosogolege elabo ya aAmori, aHetii, aPerezi, aKanani, aHevi ni aZhebusi. Miyo ginoodha gaape aliwa. <sup>24</sup>Va mwaha ola kamwaalabege<sup>d</sup> amilugu eewa naari waakokorela ayene, ohuhiddegeve mabasa eewa. Waabwanyule ayene aatene teto waapwese abodho oweela eewa.

<sup>25</sup>“Omulabege NABWIYA Mulugu aawo, vano oliye onoodha areelihe mukaathe waawo ni mahinje aawo oong'wa, onoodha teto avenyihevo dhoovoreya dhaawo. <sup>26</sup>Mwiilaboni mwaawo kadha akalamo mwihiyana onaathathilege, naari oohubala. Onoodha ologele mwiilaboni. <sup>27</sup>Ginoodha gawoopopihe athu aatene a mwiilaboni eyene oneeriwe ovolowemo, vano

<sup>c</sup> 23.15 Abibi mweeri wa Abibi wambeela vakukuuve omagomelo wa mweeri wa Marusu ni omambelelo wa mweeri wa Abirili, mudhidhi woohadha dhilo waaddamelaga.

<sup>d</sup> 23.24 Moone Okuma 20.5



amwiiddani aawo aatene enoodha ewelele mundduli. <sup>28</sup>Ginoodha girumihe dhwoopiha wi dhawiigarege mwiilaboni mu aHevi, aKanani, ni aHeti, wawoonaga. <sup>29</sup>Kaginawiiigaremo aatene yaaka emohive wi ehiale elabo muhumagiwe teto wi aneenyama ooguwa ehirelanemo okwaranya weevo. <sup>30</sup>Vang'ono-vang'ono gineerege wawiiigara, ofiyedha murelane muthukule elabo yaatene ekale yeenyu. <sup>31</sup>Ginoodha gitale munddile dhaawo wambee-la Nyaza Yoofiila ofiyedha nyaza ya wa aFilsti, vano teto wambeela wiiddedereni ofiyedha mwihinje Ewufarati. Ginoodha gaavelele mmadani mwaawo athu emagilemo wi wawiiigaremo. <sup>32</sup>Ohaandane ni aliwa naari amilugu eewa. <sup>33</sup>Aliwa ehimage mwiilaboni mwaawo wi ehuuthegihe; waalabave amilugu eewa onoodha oholowe”.

### Nipangano no waandana waaye Mulugu ni aEzarayeli

**24** <sup>1</sup>Mulugu ahiwogaga ni Mozezi, wiira: “Gwela wi wagumane omwaangoni ni NABWIYA, weevo ni Aroni, ni Nadabi, ni Abihu vamohi ni apogo aEzarayeli makumi matanu nameenddi. Mbwenye mugeebedhe mugali woolapela. <sup>2</sup>Mozezi yeeka dinaagwele wi awoge ni NABWIYA. Amohi ehifiyewo naari athu ehimuhare aagwelaga”.

<sup>3</sup>Vevale Mozezi ahawaaddelaga athu madhu maatene a NABWIYA ni magano aaye maatene. Ndala mulogo waatene wahaakulaga vamohi, wiiraga: “Dhaatedhene NABWIYA dhiwogiliye nnowiirana”. <sup>4</sup>Mozezi ahilebaga madhu maatene a NABWIYA. Agavenyile bebeh, ahisasanyaga ebuwa yookuthavo mukutho, seresere ya mwaango. Ahawiimesagavo mabwe kumi nameenddi yeemelela mahimo kumi nameenddi aEzarayeli. <sup>5</sup>Ahaarumaga azombwe aEzarayeli, opa ng'ombe, okutha mukutho wa murenddele ni NABWIYA. <sup>6</sup>Mozezi ahithukulaga mwazi vaari ni vaari ohela mmabasiyani, wahalilege akuthulelege veebuwani ya mukutho. <sup>7</sup>Ahithukulaga niivuru na nipangano no waandana aheelengaga mulogo, wiiwaga. Aliwa yahaakulaga, wiira: “Dhaatedhene NABWIYA dhiwogiliye nnowiirana vano nneerege wiiwelela”.

<sup>8</sup>Vevale Mozezi ahithukulaga mwazi ole waamidhela athu, wiira: “Ola mwazi wowaandana, wewo NABWIYA onasasanyiiye ni nyoovo mwa madhu ala maatene”.

<sup>9</sup>Mozezi ahigwelaga omwaangoni ni Aroni, Nadabi, Abihu, vamohi ni apogo a Ezarayeli makumi matanu nameenddi. <sup>10</sup>Yahimoonaga Mulugu a Ezarayeli. Vati va manyalo aaye vahikalaga yego wona voonyingalavo va mabwe a safira, owi mbee wona odhulu. <sup>11</sup>Oliye kaawiiirelege yootakala athu ale oosakuliwa aEzarayeli. Yahimoonaga Mulugu kuhukwa, yahija ong'wa.

### Mozezi oMwaangoni Sinayi

<sup>12</sup>NABWIYA ahiwogaga ni Mozezi, wiira: “Gwela odhe wa miyo omwaangoni, okale wewuno wi guwinke mabwe oosemiwa gitopiliimi-

vo malamulo ni magano aaga wi waasuuzihege aEzarayeli”.<sup>13</sup> Mozezi ni namalaba aaye Zhouwe yahivenyaga odhowa omwaangoni wa Mulugu.<sup>14</sup> Yahiwogaga ni apogo aEzarayeli: “Munijejihege veva ofiyedha niwelewo. Aroni ni Huri enohala; akalavo winna mwaha waaye adhowege wa aliwa”.

<sup>15</sup> Mozezi vagweliligiiye, murabo wahihuruwedhaga mwaango.<sup>16</sup> Nthithimiho na NABWIYA nahikaraatigi vaMwaangoni Sinayi. Mwaango wahihuruwedheyaga ni murabo ofiyedha malabo matanu nammohi. Nlabo na neetanu nabili NABWIYA ahimwiithanaga Mozezi mmuraboni mule.<sup>17</sup> AEzarayeli yahoonaga nthithimiho na NABWIYA, nafwanafwanaga ni munddo woohidda vadhulu va mwaango.<sup>18</sup> Mozezi ahigwelaga omwaangoni, ovolowa vaari va murabo, ahikala wewo malabo makumi mannayi mutana ni mahiyu.

### Dhoovaha dha vamburoni woweela

(Okuma 35.4-9)

**25** <sup>1</sup>NABWIYA ahimwaaddelaga Mozezi, wiira: <sup>2</sup>“Waarume aEzarayeli edhena dhoovaha dheewa. Aatene ayene enarumedha ni murima weewa edhena dhoovaha dheewa. <sup>3</sup>Mvahidha muneerinyu mwaakelege si dhi: oro, parata, ni mukuwa; <sup>4</sup>osalu wamataakuru,<sup>e</sup> waroxa, ni woofiila; osalu wa nthoje nookwima, ni mooya a mbuzi; <sup>5</sup>makupa a mabila ookathiwa wi ekale oofiila, makupa a aneenyama amwinko, ni mithanko dhoosema dha akaasiya, <sup>6</sup>makura a mpantini ni dhoonukwela pama dhootaganyihedhana makura oosakuleliwana mabasa, dhoonukwela pama dha libani; <sup>7</sup>ni mabwe oofuneya eneethaniwa onikisi ni mabwe a misawo-misawo teto oosemiwa oowomihana yoo-wara ya anamakutha: efodi<sup>f</sup> yoo-wara ya omurimani. <sup>8</sup>Mugisasanyedhe musasa woweelihiwa wi gikalege vaari veenyu. <sup>9</sup>Musasanye ndala wona ginowoonihiimi makaleloya, a musasa waaga oyo vamohi ni dhookalamo dhiwa”.

### Kaxa ya nipangano no waandana

(Okuma 37.1-9)

<sup>10</sup>“Musasanye kaxa ya mithanko dha akaasiya, olapa wiwa ekale meeturu nimohi ni meya (1,5m), orambalala wiwa ekale vaari ni vaari wa mpimo wowambeela (75cm), otaama wiwa teto okale wooliganiha (75cm). <sup>11</sup>Muhuruwedhe kaxa eyo ni oro apama, ode ni muwari ekale yootopiwa. <sup>12</sup>Munyunguluse teto mangoosa mannayi a oro wi muhele mmondndoni mwa kaxa; mangoosa meenddi epaddi ya kaxa, meenddi teto

<sup>e</sup> 25.4 *Nthoje* mu ewogelo ya Ezugu nneeriwa *liinyu*. <sup>f</sup> 25.7 *Efodi* yaali maleya owaakapatha wona avintalo. Moone Okuma 28.6-14.

epaddi emohi. <sup>13</sup>Musasanye teto dhimiri dha mithanko dha akaasiya vano muhuruwedhe ni oro. <sup>14</sup>Mvolosihedhe muwari mwa mangoosa a kaxa wi ni dhimiri ndo, ovenyihedhe. <sup>15</sup>Dhimiri dhedho dhikalege mmangoozani mwemo, dhihivenyihewegemo. <sup>16</sup>Muhelemo mabwe ayo ootopiwa a nipangano no waandana mukaxani mwemo, ayene gineeriimi guwiikeneni.

<sup>17</sup>“Musasanye teto yookuneelanaavoya, ni oro apama, ekalena meeturu nimohi ni meya (1,5m) olapa wiwa ni orambalala wiwa okale vaari ni vaari va mpimo. (75cm). <sup>18</sup>Musasanye ni oro oohaniwa dhoopaddusiwa dha odhulu dha mompelo<sup>s</sup> mwaahela ayo wula ni wula wa yookuneelanaavo. <sup>19</sup>Mmohi mmuhele omagomelo wa epaddi wa yookuneelanaavo mmohiya teto omagomelo wiwa. <sup>20</sup>Dhoopaddusiwa dha odhulu ndo mompelo eewa yaatapulele vadhulu, ekuneele vayookuneelana yaatene, dhisugwanenge mmohi ni mukwaaye egaworomihedhe kove dheewa vayookuneelana. <sup>21</sup>Muhelemo muwari mwa kaxa mabwe ootopiwa a nipangano no waandana, vano mukuneelevo. <sup>22</sup>Gineerege ogumana ni weevo vaari vevale, va dhoopaddusiwa dha odhulu dha mompelo. Vevale gineerigiimi guwaaddelegevo dhego dhaatedhene ginoolamuleligiimi wi aEzarayeli yiiregena”.

### **Meeza a mikaathe dhowooniha okalavo wa Mulugu**

*(Okuma 37.10-16)*

<sup>23</sup>“Musasanye teto meeza ni mithanko dha akaasiya. Ekalena olapa wiwa meeturu nimohi, orambalala wiwa meya ya meeturu, ni otaama wiwa masentimeeturu makumi matanu nameenddi ni masentimeeturu matanu (75cm). <sup>24</sup>Muhuruwedhe yaatene ni oro apama, vano ekalena kara yootopiwa ya oro mowaapeeleliha mwiwa. <sup>25</sup>Mowaapeeleliha musasanyedhe mukaleloya wa masentimeeturu matanu ni meenddi (7cm). Musasanye kara wa mukalelo mootopiwa. <sup>26</sup>Musasanyedhe teto mangoosa mannayi mwaahela moomelela meddo, <sup>27</sup>waaddamela kara, vikale nikungu moovira dhimiri dhoothebana. <sup>28</sup>Dhimiri dhoothebana meeza dhisasanyiwe ni mithanko dha akaasiya vano teto muhuruwedhe ni oro. <sup>29</sup>Musasanyedhevo teto ni oro apama miziwo dhiwa ni biya dhiwa vamohi ni milinga ni mihadha dhoohelamo mvahi dhookuthula. <sup>30</sup>Vameezava dhikalegevo malabo maatene mikaathe dhowooniha Okala Waaga ni nyooovo”.

### **Extanti voohela panti**

*(Okuma 37.17-24)*

<sup>31</sup>“Musasanye teto extanti voohela panti ni oro apama oohaniwa. Okalena nthiwa, mulongothi, kopo, dhiwuduburu ni tododhiwa wona dha

---

<sup>s</sup> 25.18 *Dhoopaddusiwa dha odhulu dha mompelo* mu ewogelo ya eHeberi *akeerubi*. Dhaali musawo wa angero. Moone Wambeela 3.24.

muthanko wa amendowa, dhaatedhene dhisasanyedhiwe yego emohive eyene. <sup>32</sup>Okalena teto mijindda dhiwa mitanu ni mmohi: dhedho dhinaa-kale miraaru epaddi emohi, miraaru epaddi emohiwa. <sup>33</sup>Mujindda ni mujindda, okalegena kopo thaaru ni mukalelo wona dhiwuduburu ni todo dha amendowa. <sup>34</sup>Vamulongothini wa extanti voohela panti ela ekalegena kopo nnayi dha mukalelo wona dhiwuduburu ni todo dha amendowa. <sup>35</sup>Ohelegevo dhikopo thaaru munaamelege mapura a mijindda miinddi. <sup>36</sup>Mijindda ni dhiwuduburu dhisasanyedhiwe yego emohive eyene, extanti yaatene ohane wa yego emohive eyene ni oro apama. <sup>37</sup>Osasanye mijindda moohela panti, tanu nabiiwi wi dhimoneyelege dhipaddi dhoosogolo. <sup>38</sup>Dhoohiddihana ni dhoothimihana dhiwa, dhikale dha oro apama. <sup>39</sup>Wi mwaakwanelihe osasanyiwa wa extanti yaatene ni dhookamihedha dhiwa, muthukule oro onyemela onakwaranya kilu makumi maraaru. <sup>40</sup>Osugwe pama wi wiirena mukalelo ola ginowoonihiimi omwaangoni wuno”.

### Masasanyedho a musasa wa Mulugu

(Okuma 36.8-38)

**26** <sup>1</sup>“Osasanye musasa wa Mulugu ni guwo kumi dha nthoje na mutheengo wookwima<sup>h</sup>, dhisasanyiwe ni osalu wamataakuru, waroxa ni woofiila. Waabordari dhoopaddusiwa dha odhulu dha mompele, oosasanyedhiwa ni orandda. <sup>2</sup>Olapa wiwa wa guwo ni guwo okalege meeturu kumi ni mannayi ni meya (14,5m). Orambalala wiwa okalege meeturu meenddi (2m). Guwo dhaatedhene dhifwanafwanenge. <sup>3</sup>Guwo tanu dhiluddeleliwe, dhimohi tanu teto dhiluddeleliwe. <sup>4</sup>Mmagomelo moolapa mwa guwo tanu ni tanu mukalege makaando a guwo yamataakuru. <sup>5</sup>Osasanye makaando makumi matanu (50) ohele omagomelo wa guwo emohi, osasanye teto makaando makumi matanu (50) ohele omagomelo wa guwo emohiwa, makaando ala esugwanenge nimohi ni nikwaaye. <sup>6</sup>Osasanye teto dthingowo makumi matanu (50) dha oro, ogu-manihena guwo ndo ni dthingowo. Ndala dhaatedhene nda onakala musasa mmohi.

<sup>7</sup>“Oluwe dhookuneelana kumi nammohi dha mooya a mbuzi dhookuneelana musasa. <sup>8</sup>Olapa wiwa wa yookuneelana ni yookuneelana okalege meeturu kumi ni matanu (15m). Orambalala wiwa okalege meeturu meenddi. Dhaatedhene kumi ni mmohi dhifwanafwanenge. <sup>9</sup>Oluddelele vamohi tanu, wamala oluddelele dhimohi tanu nammohi. Ela ya neetanu nammohi okune vadhulu osogolo wa musasa. <sup>10</sup>Osasanyedhe makaando makumi matanu (50) ohele omagomelo wa guwo emohi, osasanye teto makaando makumi matanu (50) ohele omagomelo wa guwo emohiwa.

<sup>h</sup> 26.1 Nthoje mu ewogelo ya Ezugu nneeriwa *liinyu*.

<sup>11</sup> Osasanye teto dthingowo makumi matanu (50) dha mukuwa, ongowena makaando ala. Ndala dhaatedhene nda onakala musasa mmohi. <sup>12</sup> Guwo eyene enaahale, okuneelena odduli wa musasa. <sup>13</sup> Dhipaddi dha guwo dhinaahale dhinafiya vati wi dhikuneele musasa waatene.<sup>i</sup>

<sup>14</sup> “Osasanye yookuneelana ya musasa ole ni makupa ookathiwa a mabila wi ekale oofila, vadhuluviwa okuneele ni makupa a aneenyama a mwinko”.

### Abodho a musasa

<sup>15</sup> “Osasanye mithanko dha akaasiya wi dhikale abodho owiimesana musasa ole. <sup>16</sup> Olapa wiwa bodho ni bodho okalege meeturu matanu (5m), orambalala wiwa masentimeeturu makumi matanu nameenddi ni matanu (75cm). <sup>17</sup> Bodho ni bodho akalegena dhoohiddeelana dhiwa biili wi dhoogumanihana abodho aatene a musasa. <sup>18</sup> Wiinjiva wa abodho a musasa a epaddi ya wewo onadheela pevo ya murubi ekale makumi meenddi. <sup>19</sup> Waasanyedhe mathiwa a parata makumi mannayi wi bodho ni bodho vativiwa akalegena mathiwa meenddi. <sup>20</sup> Epaddi ya wewo onadhowela pevo ya murubi ekalewo teto abodho makumi meenddi, <sup>21</sup> ni mathiwa a parata, makumi mannayi bodho ni bodho vativiwa ekalegevo mathiwa meenddi. <sup>22</sup> Odduli wa musasa, wewo onadhowela nduwa, waasanyedhelewo abodho atanu nammohi, <sup>23</sup> waasanyedhe abodho abiili a mmwenddoni. <sup>24</sup> Ala abiili elibihiwe ni mithanko dhimohi vano emagiwe ni mapago odhulu ni vati. <sup>25</sup> Ndala ekale abodho atanu nathaaru ni mathiwaya a parata kumi ni matanu nammohi vativiwa.

<sup>26</sup> “Osasanye mapago matanu a mithanko dha akaasiya wi ehideele abodho a nikukuru na musasa, <sup>27</sup> osasanye teto matanu wi ehiddeelege bodho a musasa vaputuni amohiwa teto matanu wi ehiddeelege bodho a musasa a vaputuni epaddi, onadhowela nduwa. <sup>28</sup> Nipago na vaari nivire nafiye omakuthulo wa abodho. <sup>29</sup> Waahuruwedhe abodho ni oro, vano osasanyedhe mangoosa ni oro wi ehiddeelege mapago. Mapagoya ehuruwedhiwe teto ni oro. <sup>30</sup> Ndala wiimese musasa wona guwoonihiliimi omwaangoni wuno.

### Magawelo a musasa wa Mulugu

<sup>31</sup> “Osasanye teto guwo yoogawa ni guwo dha nthoje na mutheengo wookwima, na maganga na mataakuru, na roxa, ni noofiila. Maganga-ya ekale a dhoopaddusiwa dha odhulu dha mompelo oosasanyedhiwa ni orandda. <sup>32</sup> Otomeye ni dthingowo dha oro mwaabodhoni annayi a mithanko dha akaasiya teto ehuruwedhiwe ni oro. Abodho ala ekale muwari mwa mathiwa mannayi a parata. <sup>33</sup> Guwo yoogawa ela etomeyiwe ekale munddile wa Mburo Woweela ni Mburo Wowelesesa. Kaxa

<sup>i</sup> 26.13 Ela enatapulela wi guwo ela ya mooya a mbuzi yahitthabwa olapa ohiyana ni ya nthoje ele, yoofiya vati putu dhuulubale dha musasa.

ya nipangano no waandana<sup>j</sup> ekale muwari, odduli wa guwo yoogawa. <sup>34</sup>Omburoni Wowelesesa, vadhulu va kaxa ya nipangano no waandana, viheliwe yookuneelana voolobavo okurumuweliwa. <sup>35</sup>Meeza waahlele ode wa guwo enagawa. Extanti voohela panti ohele epaddi ya wewo onakuma pevo ya murubi. Waahlele meeza mowaang'anana ni extanti, epaddi ya wewo onadhowela pevo ya murubi.

<sup>36</sup>“Osasanyedhele teto guwo yuulubale vamavolowelo wa musasa, ni osalu wamataakuru, waroxa ni woofiila ni osalu wa nthoje nookwima, mabasa a namaborodaari oorandda. <sup>37</sup>Osasanyedhele abodho atanu a mithanko dha akaasiya ehuruwedhiwe ni oro wi etomeyiwegevo guwo vamavolowelo. Dhingowodha dhikale dha oro, mathiwaya matanu ekale a mukuwa”.

### Niburo na mukutho dhoopaha dha aEzarayeli

(Okuma 38.1-7)

**27** <sup>1</sup>“Osasanye niburo na mukutho dhoopaha ni mithanko dha akaasiya. Olapa wiwa ni orambalala wiwa ofwanafwanege, meeturu meenddi ni meya (2,5m), otaama wiwa okale meeturu nimohi ni meya (1,5m). <sup>2</sup>Otogole mithanko dhiwa wona manyaga<sup>k</sup> mannayi mmagomelo mwiwa, ohuruwedhe ni mukuwa. <sup>3</sup>Ni mukuwa osasanye teto biya dhoohelamo nddoora, apaya, mabasiya, magaarufu oolapa, ni biya dhoohelamo makala. Osasanye dhaatedhene nda dhikale dha mukuwa. <sup>4</sup>Osasanyedhevo olalo wa mukuwa okalena mangoosa mannayi mmondtoni mwiwa. <sup>5</sup>Oka-raatihe olalo ola muwari mwa niburo na mukutho, ekale vaari va odhulu ni vati. <sup>6</sup>Osasanyedhele teto dhimiri dha mithanko dha akaasiya, ohuruwedhe ni mukuwa. <sup>7</sup>Niburo na mukutho naathukuliwaga, dhimiri dhedhi dhivirihiwege muwari mwa mangoosa, nimohi epaddi ela nimohiya teto epaddi emohi. <sup>8</sup>Osasanye niburo na mukutho ni matabwa, muwari mukale niku-ngunene wona guwoonihiliimi omwaangoni wuno”.

### Cinga na nthaddo na musasa wa Mulugu

(Okuma 38.9-20)

<sup>9</sup>“Osasanye cinga na musasa wa Mulugu. Epaddi ya wewo onakuma pevo ya murubi, osasanyedhewo guwo yowiimela ya nthoje na mutheengo wookwima, olapa wiwa meeturu makumi matanu (50m). <sup>10</sup>Abodhoya ekale makumi meenddi ni mathiwaya teto makumi meenddi, esasanyiwe ni mukuwa. Dhingowo dha ni dhoolibihana dhikale dha parata. <sup>11</sup>Emodhamodhave teto, epaddi ya wewo onadhowela pevo ya murubi, olapa wiwa wa guwo okale meeturu makumi matanu (50m). Abodhoya makumi meenddi

<sup>j</sup> 26.33 *Kaxa ya nipangano no waandana* Yoologoleliwamo mabwe oolebiwa owiirela onamoona waandana woopangana Mulugu ni mulogo. <sup>k</sup> 27.2 *Manyaga* mBibiliyani ena-tapulela owodha. Mwazi wa mukutho oli waatene wadhohiwa vamanyagani alena.

ni mathiwaya teto makumi meenddi dhikale dha mukuwa, vamohi ni dhi-ngowo ni dhoolibihana dha parata. <sup>12</sup>Orambalala wiwa wa cinga, epaddi ya wewo onadhowela nduwa, ekalewo guwo ya meeturu makumi meenddi ni matanu (25m), ni abodhoya kumi ni mathiwaya kumi. <sup>13</sup>Epaddi ya wewo onakuma nduwa, cinga nikale meeturu makumi meenddi ni matanu (25m). <sup>14</sup>Vamavolowelo nikukuru na moonoo wooja guwo yowiimela ekalena meeturu matanu nameenddi ni meya (7,5m); abodhoya ekale araaru ni mathiwaya maraaru. <sup>15</sup>Ekale teto ndala nikukuru nimohiniwa guwo yowiimela ekalena meeturu matanu ni meenddi ni meya (7,5m); abodhoya ekale araaru ni mathiwaya teto maraaru. <sup>16</sup>Vamavolowelo vikale guwo ya meeturu kumi (10m), ya nthoje na mutheengo wookwima ekale yooborodaariwa ni osalu wamataakuru, waroxa, ni woofila esasanyedhiwe ni orandda. Abodhoya ekale annayi ni mathiwaya mannayi. <sup>17</sup>Abodho aatene a cinga elibihiwe ni parata, ni dhi-ngowo dha parata, mathiwaya ekale a mukuwa. <sup>18</sup>Cinga ndda nikalena olapa wiwa meeturu makumi matanu (50m), orambalala wiwa meeturu makumi meenddi ni matanu (25m), otaama wa guwo ya nthoje nookwima meeturu meenddi ni meya (2,5m). Mathiwaya ekale a mukuwa. <sup>19</sup>Dhookamihedha dhaatene dhinalaba mmusasani, ni dhi-komo dhoolibihana musasa, ni dhikomo dha cinga dhikale dha mukuwa”.

### Makura a panti

(Levitiku 24.1-4)

<sup>20</sup>“Waalumule aEzarayeli wi edhena makura apama azeeti wi ehiddihegena panti mahiyu maatene. <sup>21</sup>Aroni ni anaaye ekamihedhege ni ohiddiha panti ciguwo ni ciguwo wi dhimoneyelege vameentoni va NABWIYA ofiyedha obebehini wiwa.<sup>1</sup> Panti nde dhikale muwari mwa musasa woogumanamo ni Mulugu, osogolo wa guwo yoogawa, odduli wa okale kaxa yowaandana. Ndda thi nlamulo noohumala na aEzarayeli ni aniiwa ni anamabaliwelamo eewa”.

### Dhoowara dha anamakutha

(Okuma 39.1-31)

**28** <sup>1</sup>“Mwa mulogo wa Ezarayeli ogaaddamelihe ddibilo Aro-ni, vamohi ni anaaye, Nadabi, Abihu, Eleyazari ni Etamari wi egihiddelege mabasa a onamakutha. <sup>2</sup>Omusasanyedhele dhoowara dhooweelihiwa ddibilo Aroni wi avahiwege nthithimiho ni oriye-la. <sup>3</sup>Owoge ni athu aatene oorandda, ayene gadhaalihiliimi muneba woononesesa wi esone guwo dha Aroni wi asakuliwe naari wi eelihiwe, agihiddelege mabasa a onamakutha. <sup>4</sup>Dhoowaradha dhoosona si nda:

<sup>1</sup> 27.21 Obebehini wa malabo maatene panti dhookumihiwa wi dhifufuthiwege ni odhaaliha ni makura nihinafiye ciguwo nimohi.

yoowara ya omurimani, efodi,<sup>m</sup> maleya oolapa, mukanjo wooborodaari, leeso na mmuruni, ni muddiddi woomagela. Oorandda ale esone dhoo-wara dhooweelihiwa dha ddibilo Aroni vamohi ni anaaye wi egihiddelege mabasa a onamakutha. <sup>5</sup>Oorandda ethukule osalu wa oro, wamataakuru, waroxa, ni woofiila, ni guwo dha nthoje na mutheengo wookwima.

<sup>6</sup>“Esasanye efodi ni osalu wa oro, wamataakuru, waroxa, ni woofiila, ni guwo dha nthoje na mutheengo wookwima, esasanyedhiwe ni orandda. <sup>7</sup>Ekalena mingoyi dhiwa miinddi dhoomagana mmafuddini. <sup>8</sup>Muddiddi woosoneliwa efodi osasanyedhiwe ni orandda, guwo emohive elene ni osalu wa oro, wamataakuru, waroxa, woofiila, ni nthoje nookwima.

<sup>9</sup>“Othukule mabwe meenddi oofuneya eneethaniwa onikisi, otopevo mandina a ahima a Ezarayeli, <sup>10</sup>mandina matanu nammohi nibwe nimohi, mandina matanu nammohi, nibwe nimohiniwa, oharihaga obaliwa weewa. <sup>11</sup>Oorandda etope mabwe mameenddeene mandina a ahima a Ezarayeli, wona olebiwa wa karimbu. Waahuruwedhe mmagomelo mwiwa ni oro. <sup>12</sup>Waamagelele mabwe ala meenddi mmingoyini ya mmafuddini. Mabwe ala eneere ekale yowuubusedha ya aEzarayeli. Aroni aawarege mandina alena wi ekale yowuubusedha vameentoni va NABWIYA.” <sup>13</sup>Osasanye teto ni oro pethe biili, <sup>14</sup>mingoyi miinddi dhoopothiwa ni oro apama, omagena pethe dhiwa.

<sup>15</sup>“Osasanye teto ni orandda guwo yoowara ya omurimani ya musogoleli a anamakutha wi anonege ofuna wa Mulugu. Osasanye yoowara ele wona musasanyeliwe efodi ni osalu wa oro, waroxa, ni woofiila, ni guwo dha nthoje nookwima. <sup>16</sup>Mpimoya okale, ndada nimohi mmagomelo mwaatemwene yakuniwa. <sup>17</sup>Otademo mabwe oofuneyesesa mizele minnanyi. Muzele wowambeela okalena rubi, topaziyu ni ezhimiralida. <sup>18</sup>Muzele wa nabiili okalena mabwe a turekesa, safira ni diyamanti. <sup>19</sup>Muzele wa neethaaruu okalena zhasintu, agata ni ametixta. <sup>20</sup>Muzele wa nennayi okalena kirisolitu, onikisi, ni zhaxipe. Mabwe maatene ala ehiddeleliwe ni oro. <sup>21</sup>Mabweya ekale kumi nameenddi wona mandina a ahima aEzarayeli. Waatope mandinaya wona olebiwa wa karimbu, wa mulogo kumi ni miinddi dha aEzarayeli, kadda mulogo ndina neewa.

<sup>22</sup>“Osasanye kurenti ya oro apama osonele va yoowara ya omurimani. <sup>23</sup>Osasanyedhevo teto pethe biili va yoowara ya omurimani, ohele pethe nde omwaango mmagomelo mwa yoowara ya omurimani. <sup>24</sup>Ndala omagelele makurenti meenddi a oro mpetheni biili mmagomelo mwa yoowara ya omurimani, <sup>25</sup>omagelele makurenti mmagomelo mwa ma-

<sup>m</sup> 28.4 Efodi yaali maleya owaakapatha wona avintalo. Moone Okuma 28.6-14.

<sup>n</sup> 28.12 Mandina ala yawariwa ni musogoleli a anamakutha wooniha wi yawiimelela mahimo maatene aEzarayeli vameentoni va Mulugu.



fuddi a efodi. <sup>26</sup>Osasanye pethe dhimohi biili dha oro, ohele mmagomelo mwa yoowara ya omurimani. <sup>27</sup>Osasanye pethe dhimohi biili dha oro, omagelele muddibani mwa yoowara waaddamela ni musono vadhulu va muddiddi wa efodi. <sup>28</sup>Ogumanihe yoowara ya omurimani ni pethe dha efodi ya onamakutha vadhulu viwa ekalena mungoyi wamataakuru wi okalege vadhulu va muddiddi wa efodi ya onamakutha; ndala yoowara ya omurimani, kinaahiyege efodi ya onamakutha.

<sup>29</sup>“Ndala Aroni aathukulege mandina alena a ahima a Ezarayeli va yoowara ya omurimani yoononiha efunelo ya Mulugu omurimani waaye, aavolowaga Mburo Woweela, ekale youwubusedha mudhidhi waatene vameentoni va NABWIYA. <sup>30</sup>Ohele va yoowara ya omurimani ela yoononiha efunelo ya Mulugu, mabwe Uriimi ni Tumiimi,<sup>o</sup> wi dhikalege omurimani wa Aroni, mudhidhi onaavolowigiye owoga ni NABWIYA. Ndala Aroni onaathukulege mudhidhi dhaatedhene mabwe ale owaakula dhookoha dha aEzarayeli vamurimani vaaye vameentoni va NABWIYA”.

### Dhoowara dhimohi dha anamakutha

<sup>31</sup>“Osone maleya oolapa a efodi ni guwo yamataakuru yaatene. <sup>32</sup>Vaari va maleya ala vikale paga voovirihavo muru, paga ela ekale yoopide-liwa ni osalu wooliba wi ehitaleyege. <sup>33</sup>Mowaapeleliha mwa maleya epaddi ya vati, ohelevo teto furuuta dhineethaniwa dhiroma<sup>p</sup> ni osalu wamataakuru, waroxa, ni woofila teto ohele dhooruma dha oro vaari va dhiroma. <sup>34</sup>Dhiroma ni dhooruma nda dhilapelanenge, mowaapeleliha va maleya epaddi ya vati. <sup>35</sup>Maleya ala ewariwege ni Aroni amweebdhaga Mulugu. Ndala dhirumege avolowaga ni aakumaga Omburoni Woweela vameentoni va NABWIYA wi ahikwe.

<sup>36</sup>“Valeesoni na mmuruni osasanyedhevo ecapa ni oro apama, otopevo madhu owi: ‘Dhoosakuleliwa NABWIYA’<sup>q</sup> wona olebiwa wa karimbu. <sup>37</sup>Omagelele ni osalu wamataakuru osogolo wa leeso ndde. <sup>38</sup>AEzarayeli yaveleelaga dhoovaha dheewa dhaatedhene wa NABWIYA, Aroni athukulege dhooviriganiha dheewa, madhu ala egali vayuujiini vaaye. Aliwa enodha erumeedhiwe wa NABWIYA oonaga etoonyihedho ele vayuujiini va Aroni.

<sup>39</sup>“Osasanye mukanjo, leeso na mmuruni ni guwo ya nthoje nookwima. Osasanye muddiddi wooborodaariwa. <sup>40</sup>Wa ahima a Aroni waasanyedhele mikanjo dhoolapa, middiddi ni maleeso mmuruni wi ethithimihiyege ni oriyela.

<sup>o</sup> 28.30 Uriimi ni Tumiimi yaali makanga a mabwe ookohedhelana efunelo ya Mulugu.

<sup>p</sup> 28.33 Dhiroma dhaali furuuta dhinafwanyeya dhipaddi dhimohi dha elabo elena.

<sup>q</sup> 28.36 Dhoosakuleliwa Nabwiya enamwaaga musogoleli a anamakutha teto mulogo wa Ezarayeli, ni dhego dhaatedhene dha mmusasani.

<sup>41</sup>“Omuwarihe ddibilo Aroni ni anaaye; waamiminele makura,<sup>r</sup> ni waasakulela mabasa, waweelihe wi egilabege wona anamakutha. <sup>42</sup>Waasasanyedhele akabuddula wi yaawarege, olapa wiwa evenyenge mmwiinuni egomelege waaddamela mmakutani. <sup>43</sup>Aroni ni anaaye, yaavolowaga mmusasani woogumanamo teto yaadhowaga okutha mukutho omburoni woweela, ewarege guwo dhedhi. Ndala ehigithegele wi ehikwe. Ndda nlamulo noohumala wa oliye ni anaaye a musogolo”.

### Osakuleliwa onamakutha

(*Levitiku 8.1-33*)

**29** <sup>1</sup>“Wiirena ndala waasakulelaga ale enaagilabege anamakutha aaga: Omuthukule nakoro a ng'ombe eng'onong'ono ni anakoro abiili a mabila oohukanna yoohaleela. <sup>2</sup>Osasanye ni tirigu apama mikaa-the dhoohuheliwa emela, mabolu oohuheliwa emela ootaganyihedhiwa ni makura, ni mabulaxa oohuheliwa emela ooheliwa makura. <sup>3</sup>Ohele mmuddangani, ogidheelena teto ogidheelena ng'ombe ni mabila meenddi.

<sup>4</sup>“Vevale ogidheelena Aroni ni anaaye vamavolowelo va musasa woogumanamo, waahabihe ni mahinje. <sup>5</sup>Othukule dhoowara, omuwarihe Aroni mukanjo, maleya oolapa a efodi, ni efodi, yoowara ya omurimani; ommagelele efodi ni muddiddi wooborodaari. <sup>6</sup>Omuwarihe leeso na mmuruni, ohelevo madhu ale oosakuleliwa Nabwiya.<sup>s</sup> <sup>7</sup>Othukule makura, ommiminele vamuru vaaye, ndala onakala oosakuleliwa mabasa. <sup>8</sup>Ogidheelena teto ahima a Aroni, waawarihe mikanjo dhoolapa. <sup>9</sup>Waamagelele aliwa middiddi, waawarihe teto maleeso a mmuruni. Ndala waasakulele mabasa Aroni ni anaaye wi egilabege wona anamakutha malabo maatene.

<sup>10</sup>“Ogidheelena ng'ombe eng'onong'ono odhowena vamavolowelo va musasa woogumanamo. Aroni ni anaaye ehele madada eewa vamuru va ng'ombe. <sup>11</sup>Osije ng'ombe ele vameentoni va NABWIYA, vamavolowelo va musasa. <sup>12</sup>Onyethihe ni embuno yaawo mwazi wa ng'ombe ele, osigihe manyaga a niburo na mukutho dhoopaha; mwazi mmohi othathilele vati vamburoni na mukutho. <sup>13</sup>Othukule makura maatene enahuruwedha murubo, makura enamuhuruwedha nahaba, vamohi ni xo biili, ni maku-ra enahuruwedhela, opahe dhaatedhene nda vamburoni na mukutho. <sup>14</sup>Mbwenye nyamaya ni nikupaniwa vamohi ni opwetha, nda wapahe okwibi wa misasa dhaatedhene; bu mukutho wa dhoothega.

<sup>15</sup>“Omuthukule nakoro a nibila nimohi, Aroni ni anaaye ehele madada eewa vamuru va nibila. <sup>16</sup>Osije nibila ndde othukule mwaziya, omidhele vamburoni na mukutho ni mukwibi mwiwa. <sup>17</sup>Opadhanye nibila ndde piddula, waahuwe

<sup>r</sup> 28.41 *Waamiminele makura* Epaddi dhimohi eni othikitheliwa. <sup>s</sup> 29.6 Moone Okuma 28.36

maruboya ni mweddo dhiwa, ohele vamohi ni muru. <sup>18</sup>Weera ndo opahe nibila naatenene vamburoni na mukutho. Ola mukutho woopahiwa woonukwela pama wa NABWIYA, mukutho wa vamunddoni woovahiwa NABWIYA.

<sup>19</sup>“Othukule nibila nimohiniwa, Aroni ni anaaye ehele madada eewa vamuru va nibila ndde. <sup>20</sup>Osije nibila, othukule mwaziya oddondidhedhe otompini wa nibaru na omoononi wooja na Aroni teto oddondidhedhe mabaru a anaaye, oddondidhedhe teto dhimbuno dheewa dhuulubale dha moonoo wooja dha mmadani ni dha mmanyaloni. Mwazi mmohiwa woohala omidhele vamburoni na mukutho ni mukwibi mwiwa. <sup>21</sup>Veve othukule mwazi wa vamburoni na mukutho, ni makura oosakuleliwana mabasa, ommidhele Aroni ni dhoowara dhaaye, ni anaaye ni dhoowara dhiwa. Aatene ala ni dhoowara dhiwa-dhene ekale oosakuleliwa miyo.

<sup>22</sup>“Othukule makura a nibila, makura a mwiila, makura enahuruwedha marubo, makura a vanahabani, xo biili ni makuraya, ni thabala ya omoononi wooja. (Vowi ndda nibila noosakuleliwana.) <sup>23</sup>Othukule mukaathe mmohi, bolu noosasanyiwa ni makura ni bulaxa dhili mmuddangani wa mikaathe dhoohuheliwa emela ole oli vameentoni va NABWIYA. <sup>24</sup>Dhego dhaatedhene nda ohele mmadani mwa Aroni ni wa anaaye, eteededhele wa NABWIYA, eli yoovaha yootededhela yeewa. <sup>25</sup>Egamalile wiirana elena, othukulemo mmadani mweewa, opahe vamburoni na mukutho, okale yoovaha yoopaha yoonukwela pama wa NABWIYA. Ela yoovaha, yoosasanyeliwa NABWIYA vamunddoni.

<sup>26</sup>“Othukule ciddale ya nibila nenddo noosakuleliwana Aroni, otedeedhele wa NABWIYA; ela eneere ekale epaddi yeenyu. <sup>27</sup>Ciddale ni thabala nde dhootededheliwa NABWIYA dhikalege dha Aroni ni anaaye. <sup>28</sup>Ndda nnaakale nlamulo: dhipaddi nda dhinaadheegena aEzarayeli dhikalege dhaaye ni anaaye malabo maatene. Dhinaakale dhoosokela dhoolamuleliwa wiirana wa dhooveleela dha wa Nabwiya, dhipaddi nda dhookamihedha dheewa wa anamakutha.

<sup>29</sup>“Musogolo, dhoowara dhooweelihiwa dha Aroni dhihalege ni mwaanaye mmohi, amimineliswa ni osakuleliwa mabasa<sup>t</sup> awarege dhedho. <sup>30</sup>Muthu oyene onaakale muliba mukutho mumburoni na Aroni, aadhaaga wambeela olaba mmusasani woogumanamo Mburo Woweela, awarege dhoowara nda malabo matanu nameenddi.”

<sup>31</sup>“Othukulege nibila noosakuleliwana, opiye nyamaya vamburoni noweela. <sup>32</sup>Aroni ni anaaye etakunege nyama ya nibila ni mikaathe dhedho dhili mmuddangani waaddamela vamulago va musasa woogumanamo. <sup>33</sup>Aliwa eje dhego dhedho dhiveleeliwe wi dhikurumuveliwe dhoothega dheewa, dhego dhiveleeliwe ni osakuleliwa mabasa eewa.

---

<sup>t</sup> 29.29 *Osakuleliwa mabasa* Athu amohi eneera othikitheliwa. <sup>u</sup> 29.30 Nda dhinatapulela wi osakuleliwa musogoleli a anamakutha woologela malabo matanu ni meenddi.

Muthu bure kaje vowi soweela. <sup>34</sup>Yahala nyama yoovaha voosakuleli-wa naari mikaathe ofiyedha omenseloni wiwa, opahe ni munddo eyene ehalile. Ehijiwe vowi soweela. <sup>35</sup>Omwiirele dhedho guulamuleliimi Aroni ni anaaye. Waasakulele mabasa eewa ofiyedha malabo maatene matanu nameenddi.

<sup>36</sup>“Nlabo ni nlabo omveelelege nakoro a ng'ombe emohi wi dhikurumuveliwe dhoothega dha athu. Mweelihe niburo na mukutho ni dhooveleela wi dhikurumuveliwe dhoothega. Omiminele makura niburo ndde wi nisakuleleye, nikale noweela. <sup>37</sup>Wiirena ela malabo matanu nameenddi weelihaga niburo na mukutho ni dhooveleela nda wi nisakuleleye nikale noweela. Ndala nnoodha nikale noweelesesa teto yego enaakahinyege vevale enaakalege yoweela”.

### Dhoovaha dha malabo maatene

*(Numero 28.1-8)*

<sup>38</sup>“Vano nlabo ni nlabo vamburoni na mukutho oovahegevo mabila meenddi a yaaka emohi. <sup>39</sup>Nibila nimohi osasanyege bebehi, nimohi osasanyege omadhowelo nduwa. <sup>40</sup>Ni nibila nowambeela, ovahege kilu biili dha saambale napama, nootaganyihedhiwa ni niituru nimohi na makura azeeti. Okuthulelevo teto niituru nimohi na vinyu. <sup>41</sup>Ociguwoni, wiirena emodha-modhave ni nibila nimohi, vamohi ni saambale, makura ni vinyu. Ekale yoovaha yoonukwela pama ya vamunddoni va NABWIYA.

<sup>42</sup>“Ela yiireyege malabo maatene wa nyoovo ni aniinyu a musogolo, mukuthege mukutho ola vamavolowelo wa musasa woogumanamo, vameentoni va NABWIYA. Vevale gineerigiimi gigumanegevo ni nyo wi giwogege ni weevo. <sup>43</sup>Vevale gineerigiimi gigumanegevo ni aEzarayeli. Nthithimiho naaga nnoodha nsakulele mburo ole. <sup>44</sup>Ginoodha geelihe teto musasa woogumanamo vamohi ni niburo na mukutho. Ginoodha gimweelihe Aroni ni anaaye wi egihiddelege mabasa oonamakutha. <sup>45</sup>Ginoodha gimage mwa aEzarayeli, ginoodha gikale Mulugu eewa. <sup>46</sup>Enoodha enone wi miyo gili NABWIYA Mulugu eewa, gaavenyihile mwiilaboni ya wEgubuddu wi gimage mwa aliwa. Miyo gili NABWIYA, Mulugu eewa”.

### Niburo na mukutho wa libani

**30** <sup>1</sup>“Osasanye ni mithanko dha akaasiya niburo na mukutho voo-paha libani. <sup>2</sup>Dhipaddi dhaatedhene dhifwanafwanege, meya meeturu; otaama wiwa okale meeturu nimohi. Matabwaya omagomelowa etogoliwe manyagaya. <sup>3</sup>Ohuruwedhe niburo naatenene oro apama, vadhulu, ni dhipaddi dhaatedhene, ni manyagaya. Otope waapelelihe ni oro. <sup>4</sup>Osasanyedhe teto mangoosa meenddi a oro, ohele dhipaddi biili, muddibani mootopiwa wi dhiviregemo dhimiri dhoothebana. <sup>5</sup>Osasanyedhele dhimiri dha akaasiya, ohuruwedhe ni oro.

<sup>6</sup>“Niburo nddo ohele osogolo wa guwo yoogawa, osogolo wa kaxa ya nipangano no waandana ni yookuneelavoya, wewo gineerigiimi gigu-manegewo ni weevo. <sup>7</sup>Aroni apahegevo libani obebehini ni obebehini, mudhidhi oneerigiye awomihedhege panti, apahege libani.” <sup>8</sup>Aroni ci-guwo aahiddihaga panti, apahege libani vevale. Ekale yoovaha ya libani vameentoni va NABWIYA mudhidhi dhaatedhene ni anamabaliwelamo eenyu. <sup>9</sup>Ahivahegevo libani nimohi, naari mukutho woopaha, naari wa dhooja, naari ahithathilelegevo vinyu. <sup>10</sup>Vayaakani, nlabo nimohi Aroni, ahelege mwazi mmanyagani a niburo na mukutho wa libani ndde wi dhikurumuveliwege dhoothega. Niburo nddo thoweelesesa na NABWIYA”.

### Korowa dhowiyoolana

<sup>11</sup>NABWIYA ahiwogaga ni Mozezi, wiira: <sup>12</sup>“Waalebelaga alobwana aEzarayeli, voweelengiwa mmohi ni mmohi epelekege yowoobola wa NABWIYA wi ekale yowiyoolana. Ndala kunaadheelee mulili voweelengiwa. <sup>13</sup>Oyene oneelengiwe apeleke ndala: garama tanu da parata. Garama tanu nda dhikalege dhooveleela wa NABWIYA. <sup>14</sup>Enaalebeliwege baale yinna yaaka makumi meenddi odhowa osogolo, epelekege yooveleela ela wa NABWIYA. <sup>15</sup>Moobolaga egumi yeenyu, ooreela kipelekege mookwaranya mpimo ola, naari oorabula kipelekege dhooyeva wa NABWIYA. <sup>16</sup>Othukule korowa ndho dhowawoobola aEzarayeli, ovahe dhihiddiwegenana mabasa mmusasani woogumanamo. Enaakale yowuubusedha vameentoni va NABWIYA wi moobolege dhigumi dheenyu”.

### Basiya

<sup>17</sup>NABWIYA ahiwogaga ni Mozezi, wiira: <sup>18</sup>“Osasanye teto basiya noohabamo na mukuwa ni nthiwa niwa teto na mukuwa. Ohele vaari ni vaari va musasa woogumanamo ni niburo na mukutho, basiya nddo ohelemo mahinje. <sup>19</sup>Aroni ni anaaye ehabegego madada ni ohuwamo manyalo eewa. <sup>20</sup>Yaavolowaga mmusasani woogumanamo, ehabegego ni mahinje wi ehikwe. Teto yaaddamelaga niburo na mukutho wa libani wi elabe mabasa oopaha libani wona yooveleela yoosasanyedhiwa vaimunddoni wa NABWIYA, <sup>21</sup>ehabegego ni ohuwamo manyalo wi ehikwe. Nenddi nikale nlamulo noohumala wa aliwa ni anamabaliwelamo eewa”.

### Makura oosakuleliwana mabasa

<sup>22</sup>NABWIYA ahiwogaga ni Mozezi, wiira: <sup>23</sup>“Othukule dhoonukwela dhapama nda: kilu tanu ni emohi dha mira apama, kilu thaaru dha

---

▼ 30.7 Niburo na mukutho wa libani ni niburo na mukutho woopaha yaali maburo oogumanavo ni Mulugu, vowaalobeleva athu amohi, mburo woolobavo oleveleliwa. Moone Mamwene Owambeela 8.22-54; Luka 1.8-23; Ovuhulela 8.3-4.

kaneela, kilu thaaru dha muhale, <sup>24</sup>ni kilu tanu ni emohi dha todo dha kaneela. Otaganyihedhe dhaatedhene nda ni makura azeeti maniituru maraaru ni meya. <sup>25</sup>Ni dhedhi osasanye makura oonukwela pama oosakuleliwana mabasa a Mulugu, esasanyedhiwe ni orandda. Eneere ekale makura oosakuleliwa ohiddana mabasa oweela.

<sup>26</sup>“Ni alena ohele nda: musasa woogumanamo, kaxa ya nipangano no waandana, <sup>27</sup>meeza ni dhaatedhene dhinakamihedhavo, extanti voohela panti ni yookamihedhaya, niburo na mukutho wa libani, <sup>28</sup>niburo na mukutho woopaha ni dhookamihedhavo, vamohi ni basiya ni nthiwana. <sup>29</sup>Ndala nda dhinoosakuleliwa, dhaatedhene dhinokala dhoweelesesa; dhego dhinakahinyege dhego dhedho dhoosakuleliwa, dhinaakalege dhoweela.

<sup>30</sup>“Ommiminele makura Aroni ni anaaye, waweelihe wi egihiddelege mabasa oonamakutha. <sup>31</sup>Wawaaddele aEzarayeli, wiiraga: ‘Malabo maatene makura aaga ala eneere ekale oweelihiwa oosakuleliwana mabasa aaga. <sup>32</sup>Ahikalevo muthu onedholihe makura alena naari osasanya yego yoofwanafwaniha. Makura ala boweela, pole-pole. <sup>33</sup>Oyene oneere asasanye makura wona alena naari omuhela muthu ohuli nama-kutha, onoodha eegariwe vaari va mulogo waaye’ ”.

### Libani

(Okuma 37.29)

<sup>34</sup>NABWIYA ahiwogaga ni Mozezi, wiira: “Othukule dhoonukwela dhapama nda: manddela a balisamu, oonika, manddela a galibani, ni manddela a munyawa. Wiinjiva wiwa okale wumohive. <sup>35</sup>Osasanye ni dhedhi libani, noonukwela, noosasanyedhiwa mwa orandda, otaganyihedhe ni mwiinyu wi nikale napama ni noweela. <sup>36</sup>Nthubuliwe nifyedhe okala nthubi, vano ohele osogolo wa kaxa ya nipangano no waandana mmusasani woogumanamo, munakumeleligiimi wa weevo. Mwaatene mukameelege libani nddo wona yego yowelesesa. <sup>37</sup>Kamusasanye libani nimohi neenyu noofwanafwaniha nenddi. Thoweela, pole-pole, mwiinya di NABWIYA. <sup>38</sup>Oyene oneere asasanye libani wona nendda wi anukwelege, oyo onoodha eegariwe vaari va mulogo waaye”.

### Ameesili ehidhaalihwiwa Muneba wa Mulugu

(Okuma 35.10-19; 35.30 ofiyedha 36.1)

**31** <sup>1</sup>NABWIYA ahiwoga ni Mozezi; <sup>2</sup>“Gihimusakula Bezaleli, mwaana a Uri, oli mwaana a Huri, a nihimo na Zhuda. <sup>3</sup>Gihimudhaalihwi ni Muneba waaga<sup>w</sup>wi akalena tthottho, ononelamo, ni orandda wa mabasa maatene, <sup>4</sup>asasanyege dhoohadhihela dha omeesili ni oro, parata ni mukuwa. <sup>5</sup>Teto akalena orandda woolaba ni mabwe ni mithanko, oorandda oosasanya mabasa maatene a omeesili. <sup>6</sup>Teto

<sup>w</sup> 31.3 Muneba waaga Naari wi: Muneba wa Mulugu.

gihimwinka oomukamihedha aaye Oholiyabi, mwaana a Ahisamake a nihimo na Dani. Teto gihaavaha omeesili aatene orandda wi egisasanyele mabasa ayene guurumiliimi: <sup>7</sup>musasa woogumanamo, kaxa ya nipa-ngano no waandana, yookuneelanaya, dhaatedhene dhili mba mwemu, <sup>8</sup>meeza vamohi ni dhookamihedhavo, extanti ya oro yapama ele voo-hela panti ni yookamihedhavoya, ni niburo na mukutho wa libani, <sup>9</sup>ni niburo na mukutho dhoopaha ni dhookamihedhavo dhaatedhene, basiya ni nthiwana, <sup>10</sup>dhoowara dhooriyesesa dhooweelihiwa dha namakutha Aroni, ni dhoowara dha anaaye wi ehiddegena mabasa a onamakutha, <sup>11</sup>makura oosakuleliwana mabasa, ni libani noonukwela pama na Mburo Woweela. Alobwana ayo esasanye dhego dhaatedhene ndo mooligana guurumiliimi”.

### Mulugu ohurumiha nlabo noovuma

(Okuma 35.1-3)

<sup>12</sup>NABWIYA ahiwoga ni Mozezi: <sup>13</sup>“Owoge ni aEzarayeli, wiiraga: ‘Mwa ebaribari muubuwelege malabo aaga oovuma, vovi eli etoonyihedho yaaga vaari va miyo ni nyooovo ni wa aniinyu a musogolo wi munone wi miyo gili NABWIYA onoweeliani. <sup>14</sup>Mowindala mulogolelege nlabo noovuma, vovi thoweela mwa nyo. Oyene onanyemule onookwa ebaribareene, vano oyene onalaba mabasa aaye nlabo nendda onoodha eegariwe vaari va mulogo waaye. <sup>15</sup>Malabo matanu nammohi muhiddege mabasa eenyu, mbwenye nlabo na neetanu nabiili thi nlabo noovumesesa, nili noweela wa NABWIYA. Oyene oneere ahidde mabasa bure ebaribari oneere apiwe. <sup>16</sup>AEzarayeli ni aniiwa ekameelege nlabo noovuma wona opangana woohumala. <sup>17</sup>Ela etoonyihedho yoohumala vaari va miyo ni a aEzarayeli, vovi mwa malabo matanu nammohi NABWIYA ahisasanya odhulu ni elabo ya vati, mbwenye na neetanu nabiili ahimaala, ovumaga’ ”.

<sup>18</sup>OMwaangoni Sinayi, NABWIYA vamaaliliye owoga ni Mozezi, ahi-mwinkaga mabwe meenddi a nipangano no waandana, oolebiwa ni mwiinyeene Mulugu.

### Nakoro mung'onong'ono a ng'ombe oosasanyiwa ni oro

(Deteronomiyo 9.6-29)

**32** <sup>1</sup>Athu vooniligiwa wi Mozezi onoribeliwawo omwaangoni, yahimurijaga Aroni, yiiraga: “Venya, onisasanyedhe amilugu oonisogolela, vovi mulobwana ole Mozezi, onivenyihile wEgubuddu, kaninonile yego emwiireyele”.

<sup>2</sup>Aroni ahiiraga wa aliwa: “Mukuguule birinku dha oro dhinawari-wa mmabaruni ahiyana eenyu ni aniinyu anaahiyana ni anaalobwana, mugidheelena”. <sup>3</sup>Ndala athu aatene yahikuguulaga birinku dha oro mmabaruni, oveleela wa Aroni. <sup>4</sup>Vaakeliligiye mmadani mwaaye, ahi-

musasanya nakoro mung'onong'ono a ng'ombe a oro woonyungulusa oohaniwa ni mugogo. Vevale yahiiiraga: “Ee, aEzarayeli, baalena amilugu ayene yoovenyihileni elabo ya wEgubuddu”.

<sup>5</sup>Aroni vooniligiye, ahisasanyaga niburo na mukutho vakukuuve va ng'ombe elene vano ahilaleyelaga, wiira: “Menselo onookala mathanga a NABWIYA!” <sup>6</sup>Omenseloni wiwa yahibehedhaga okutha mukutho, odhana dhoovelela dhoopahiwa ni dha murenddele. Athu yahikaraatigi, oja, ong'wa, vano yahithabaga.

### NABWIYA onowoga ni Mozezi

<sup>7</sup>Nuwindo NABWIYA ahiiwogaga ni Mozezi, wiira: “Odhowe, okitele muddibani, vovi mulogo waawo oyene wakumihiliimi wEgubuddu, ohubwanyuwa. <sup>8</sup>Mowaagava ehihiya dila eyene gaathongeliimi; ehiiisanyedha nakoro mung'onong'ono a ng'ombe a oro woonyungulusa, othithimihaga eyene ni okuthela mukutho, yiiraga: ‘Ee, aEzarayeli, ba alena amilugu ayene yanivenyihile elabo ya wEgubuddu’”. <sup>9</sup>Ahiwogaga NABWIYA ni Mozezi, wiira: “Gihawoona athu alena wi addiyamaru. <sup>10</sup>Dhiinova ogihiye wi oludduwa waaga waanyanyuwele, gaatolose. Vano ginoodha gisasanye mulogo mulubale mwa weevo”.

<sup>11</sup>Vevale Mozezi ahilobaga wa NABWIYA, Mulugu aaye ni ohidda meddo, eeraga: “Mwaha bwaddi NABWIYA, oludduwa weenyu onyahuweliwa wa mulogo weenyu oyene mwavenyihiliinyu elabo ya wEgubuddu ni moonno weenyu wakopolo wowaakwana? <sup>12</sup>Kamwaavaha aEgubuddu mpatha wi yiirege, ‘Mootakala ohaavenyiha wEgubuddu, afunaga waapela omwaangoni ni waatolosa mwiilaboni?’ Mmaalihe oludduwa weenyu, muhiye yootakala yuubuweleliinyu wa mulogo weenyu. <sup>13</sup>Muubuwelele dha Abarhamu, Ezaaki ni Ezarayeli, anamalaba eenyu, ayene mwaalibeleliinyu mwaanyeene, mwiiraga: ‘Ginoodha gaweenjedhedhe aniinyu wi ekale wona ttendderi dha odhulu. Elabo yaatene elena guuroromelihiimi, ginoodha gaavahe aniinyu wi ekale yeewa malabo maatene’”.<sup>x</sup> <sup>14</sup>Vevale NABWIYA ahiihiya yootakala eyene yoobuweleliye wawiiirela athu.

### Okita wa Mozezi omwaangoni

<sup>15</sup>Mozezi ahikitaga vamwaangoni agathukulile mmadani mwaaye mabwe meenddi ootopiwa a nipangano no waandana; oolebiwa dhipaddi dhaabiilidhene, osogolo ni mundduli. <sup>16</sup>Mabwe ala yaali mabasa a Mulugu; Mulugu mwiinyeene daalebile.

<sup>17</sup>Zhozuwe veewiligiiye nthapa na athu enyagulaga, ahiiiraga wa Mozezi: “Ohukala nthapa na koddo omisasani” <sup>18</sup>Ahimwaakulaga Mozezi, eeraga: “Kahuwo nthapa na athu oowodha naari oowodhiwa, mbwenye nthapa nowiiba gineewiimi”.

<sup>x</sup> 32.13 Moone Wambeela 22.16-17



<sup>19</sup>Mozezi agaaddamele omisasani, ahimoonaga nakoro a ng'ombe ole ni wiina wa athu. Ndala oludduwa waaye wahinyahuwa, ahaathathilaga mabwe yaaligi mmadani mwaaye otweya seresere ya omwaangoni. <sup>20</sup>Ahithukulaga ng'ombe yasanyiligiiwa, ovokedha veeko. Ahisilaga, osadduwa nthubi. Nenddo ahilengusa ni mahinje, waang'wiha aEzarayeli. <sup>21</sup>Vevale teto, Mozezi ahimukohaga Aroni, eeraga: "Athu ala wawiirele ddi wi waadhiihele yoothega yuulubalene elena?"

<sup>22</sup>Ahaakulaga Aroni, eeraga: "Ee, nabwiya, muhutakaleliwe ni miyo. Nyoovo muhunona wi athu ala boowiira dhootakala. <sup>23</sup>Ndala yahiira wa miyo: 'Onisanyedhe amilugu oonisogolela, mbwenye mulobwana ole, Mozezi, onivenyihile wEgubuddu, kaninonile yego emwiireyele'. <sup>24</sup>Teto gahawaaddela wi winna oro akuguule. Yaginkiliwa, gahivokedha veeko, okumavo teto nakoro ole a ng'ombe".

<sup>25</sup>Vooniliye Mozezi wi Aroni ahaahiya athu oholowa wi amwiiddani eewa yaateyege, <sup>26</sup>Mozezi ahiimelaga odila, wawiithana, wiira: "Ee! Olene oli a NABWIYA adhe wuno!" Vevale yahitugumana wa oliye aLeevi aatene. <sup>27</sup>Mozezi ahawaaddelaga aliwa, wiira: "NABWIYA, Mulugu aEzarayeli dinawoga wi: 'Kadda muthu asasanye mwaalago waaye. Mvire, vano muwelele teto ovira misasa dhaatedhene, kadda muthu ampege ddibile, mukwaaye ni mwaaddamani aaye' ". <sup>28</sup>ALeevi yahiiiragana wona Mozezi mwawogeligiye. Nlabo nendde yahikwaga mwa mulogo alobwana macikwi maraaru. <sup>29</sup>Vevale Mozezi ahiiraga: "Peeno veva mwihirana mabasa a NABWIYA, vovi kadda muthu kamwihiyile mwaanaye naari ddibile. Ndala NABWIYA ohuuvahani peeno mareliho".

<sup>30</sup>Omenseloni wiwa Mozezi ahiwogaga ni mulogo, wiira: "Nyoovo mwihirana yoothega yuulubalene. Dhiinova, ginoogwela odhowa wa NABWIYA, ginoodha gilobe okurumuveliwa<sup>y</sup> yoothega yeenyu". <sup>31</sup>Mozezi ahiwelelaga wa NABWIYA, eeraga: "Ee! Ebaribareene mulogo ola ohiirana yoothega yuulubalene, wiisasanyedha weekiwa amilugu eewa a oro. <sup>32</sup>Vano, mwaakurumuwele<sup>z</sup> athu eenyu. Dhahikala ndala, ginowuulobani, mugithimihe muniivuru mweenyu mugilebiliinyu".

<sup>33</sup>Vevale NABWIYA ahiwogaga ni Mozezi, wiira: "Ginoodha gimuthimihe muniivuruni mwaaga muthu oyene onagithegela. <sup>34</sup>Vano, dhowa, osogolele mulogo wewo guwaaddeliimi. Mungero aaga onoodha akale osogolo waawo. Mbwenye wafiya mudhidhi, ginoodha gawoonihe goyi mwaha wa yoothega yeewa".

<sup>35</sup>NABWIYA ahidhiiha mulili wa mulogo vovi wahimuthongela Aroni omusasanya nakoro a ng'ombe ya oro.

### Mulugu onowaalamula a aEzarayeli wi edhowege

**33** <sup>1</sup>NABWIYA ahiwogaga ni Mozezi, wiira: "Dhowa, wasogolelege mulogo oyene othukuliliwe mwiilaboni ya wEgubuddu, odhowe-

<sup>y</sup> 32.30 Okurumuveliwa Naari wi: *oleveleliwa*. <sup>z</sup> 32.32 Mwaakurumuwele Naari wi: *mwaavelelele*.

gena elabo eyene gamulibeleliimi Abarahamu, Ezaaki ni Yakobo. Giwoga ni aliwa, giira: ‘Ginoodha gaavahedhe elabo elena anamabaliwelamo aawo’.<sup>2</sup> Ginoodha guurumihedhe mungero aaga osogolo waawo, vano ginoodha gawiiwarewo aKani, aAmori, aHeti, aPerezi, aHevi ni aZhebusi. <sup>3</sup> Omaruwe odhowege elabo eyene yowiiinjivesa mukaka ni enwi wona mihinje. Mbwenye miyo kaginakala vaari veenyu, vowi nyoovo muli addiyamaru. Gahaadhowe ni nyoovo gowuutolosani mundila”.

<sup>4</sup> Mulogo veewiligiwa madhu alena oowaawa, yahambeelaga okubanya, vevale kaalivo mmohi awarilege dhooriya.<sup>a</sup> <sup>5</sup> Sowi NABWIYA ahimwaaddelaga Mozezi, eeraga: “Wawaaddele aEzarayeli wiire: ‘Muli addiyamaru. Gaheere guuharani vang’ono, gowuutolosani. Ndala, muku-guule dhooriya dheenyu, ovenya vevo ginonona yowuwiirelani’ ”. <sup>6</sup> Vevale mulogo wahikuguulaga dhooriya dheewa oMwaangoni Horebi.<sup>b</sup>

### Nabwiya onowoga ni Mozezi kove ni kove

<sup>7</sup> Mozezi ahiimesaga musasa okwibi wa sanjala, woolapelana ni mulogo. Othwa ndina na musasa woogumanamo. Kadda muthu afunaga omukoha NABWIYA, oodhowaga musasa olene waali okwibi wa sanjala nde. <sup>8</sup> Mozezi avenya aadhowaga ovolowa musasa olene, mulogo waatene wowiimela mmilagoni mwiwa, omusugwaga ofiyedha ovolowa waaye. <sup>9</sup> Agali mba, murabo woolapa wookita, wiimela vamulagova, mwemule NABWIYA owogaga ni Mozezi. <sup>10</sup> Mulogo waatene woonaga murabo ogeemelile vamulago va musasa, woovenya waatene mmilagoni mwa misasa dheewa omutamaalaga Mulugu. <sup>11</sup> Mwemule NABWIYA ahiwogaga ni Mozezi kove ni kove wona muthu onawogeliye ni mukwaaye. Vevale Mozezi oowelega osanjala, mbwenye muzombwe Zhouwe, mwaana a Nuni, namalaba a Mozezi, kaavenyavo vamusasani vale.

### NABWIYA onowooniha nthithimiho naaye

<sup>12</sup> Mozezi ahiwogaga ni NABWIYA, wiira: “Munogirelesa: ‘Muthukule mulogo ola mudhowegena’. Mbwenye kamugaaddele baani muneeriinyu mmurume wi athaananege ni miyo. Munowiira: ‘Gihinona pama ndina naawo, ohukanna mahala ni miyo’. <sup>13</sup> Vano, gakalana mahala ni nyoovo, mugisuuzihe dila yeenyu wi guunoneni wi gikalegenaave mahala ni nyoovo. Muubuwelele wi mulogo ola mulogo weenyu”.

<sup>14</sup> NABWIYA ahaakulaga, wiira: “Okalavo waaga onoodha wuuveleleni, ginoodha guuvaheni withaala”. <sup>15</sup> Vevale Mozezi ahaakulaga, wiira: “Okalavo weenyu waahinivelelave, kamunivenyihe veva. <sup>16</sup> Enaanoniwe addi wi miyo vamohi ni mulogo weenyu nihikanna mahala ni nyoovo? Onivelelave onoonihedha wi miyo ni mulogo waaye oli woohiyana ni malogo mamohi a elabo ya vati”.

<sup>a</sup> 33.4 *Dhooriya* enatapulela dhowiiriyihana: birinku, purusera, pethe, mugufu ni dhimohi.

<sup>b</sup> 33.6 *Horebi* thi ndina nimohi na Mwaango Sinayi.

<sup>17</sup>NABWIYA ahiwogaga ni Mozezi, wiira: “Ginoodha giirena eyene elobiliwe, vovi ohukanna mahala ni miyo, mowindala gihinona pama ndina naawo”.

<sup>18</sup>Mozezi ahiiraga: “Ginowuulobani wi mugoonihe nthithimiho neenyu”. <sup>19</sup>NABWIYA ahimwaakulaga, wiira: “Ginoodha giirena opama waaga waatene givire vameentoni vaawo, ginoodha givuwihwe ndina na NABWIYA<sup>c</sup> vameentoni vaawo. Ginoodha gimwiirele ya mahala oyene ginamfuniimi omwiirela mahala, gimweeddiwele thagaraga oyene ginamfuniimi omweeddiwela thagaraga”. <sup>20</sup>NABWIYA ahiwelelaga owoga eeraga: “Ohoone kove yaaga vovi muthu oyene onoona kove yaaga kana-kalawo”. <sup>21</sup>NABWIYA ahiwogaga, eeraga: “Nihikalavo niburo vakukuuve vaaga; weevo okale vanibweni va. <sup>22</sup>Naviraga nthithimiho naaga, ginoodha guuvolosihe okunguni wa nibwe nenddi, ndada naaga nuukuneele ofiyedha givire. <sup>23</sup>Gaviraga, fineeriimi givenyihevo ndada naaga, weevo onadha woone dduli yaaga baahi, kove yaaga kudha wona”.

#### NABWIYA onomulamula Mozezi wi awelele omwaangoni

**34** <sup>1</sup>NABWIYA ahiwogaga ni Mozezi, wiira: “Waparule mabwe meenddi wona alene owambeela vano ginoodha gilebevo madhu mamohive alene yaaligi vamabweni owambeela waapwesiliwe. <sup>2</sup>Wiisasanyedhe wi menselo bebehi ogwele oMwaangoni Sinayi, ogijejihege vadhulu va mwaangoni vevo. <sup>3</sup>Kakalevo oneere agwele ni weevo, kakalevo teto oneere aaddamele mwaango naari kakalevo oneere ajihewo mabila naari ng’ombe”. <sup>4</sup>Nuwindo Mozezi ahaaparulaga mabwe meenddi owi aalene owambeela. Vavenyiligiye bebeheene, ahigwelaga oMwaangoni Sinayi, wona NABWIYA mwamulamuleliye, agathukulile mundadani naaye mabwe meenddi owaaparula.

#### Mulugu onowoga ni Mozezi omwaangoni

<sup>5</sup>NABWIYA ahikitaga mmuraboni, wiimela vevale ni Mozezi vano ahivuwihaga ndina naaye wi di NABWIYA. <sup>6</sup>NABWIYA ahiviraga vakukuuve vaaligi Mozezi, akuwaga, eeraga: “Gili NABWIYA, gili NABWIYA; gili Mulugu a thagaraga, a mahala, oohaaguva otakaleliwa, oodhivelesesa ni ooromeleya. <sup>7</sup>Odhivela waaga onoofiyedha wa anamabaliwelamo macikwi ni macikwi. Ginowaakurumuwele oopahuwa, oohiwelela ni dhoothega, mbwenye ginowaalaga oothega. Ginowaalaga alene ofiyedha wa aniiwa, ni aniiwa teto”.

<sup>8</sup>Mowaaguva Mozezi ahikokoraga omuthithimihaga NABWIYA, <sup>9</sup>eeraga: “Nabwiya, gakalana mahala ni nyo, munisogolele. Naari mulogo ola ogali wooddiyamaru, mukurumuwele opahula weehu ni othega weehu, munithukule nikale mulogo weenyu”.

<sup>c</sup> 33.19 *Givuwihwe ndina na NABWIYA* nnatapulela wooniha makalelo a NABWIYA.

**Mulugu onowelela nipangano no waandana waaye**  
(*Deteronomiyo 7.1-5*)

<sup>10</sup>NABWIYA ahiiraga: “Woone ginosasanya nipangano no waandana vaari va mulogo waawo waatene. Ginoodha giirena dhootikiniha dhihi-naabihege wiireya elabo yaatene ya vati, naari mwa malogo maatene. Athu aatene enakaliwena munodha moone mabasa a NABWIYA, vovi ginoodha giirena dhowoopiha ni weevo. <sup>11</sup>Wiiwelele dhedho ginoolamuleliimi peeno. Veva ginoodha gawiigare osogolo waawo aAmori, aKanani, aHeti, aPerezi, aHevi ni aZhebusi. <sup>12</sup>Pole-pole kusasanye nipangano no waandana ni malogo alene a elabo eyene onadhowiwe wi ohumorele mukogweni mweewa. <sup>13</sup>Mpwese maburo eewa a mukutho, mwaapwese amilugu oosemiwa, mwaakakathe abodho a Axera mulugu eewa.<sup>d</sup> <sup>14</sup>Ohunaalaba amilugu amohi, vovi NABWIYA winna ndina na ‘Aje’, di Mulugu a aje, kanaarumeedha amilugu amohi. <sup>15</sup>Pole-pole kusasanye nipangano no waandana ni malogo a elabo eyene. Weerena ndo, mwa mudhidhi aliwa vinararuwigiiwa ni amilugu eewa, okutha mukutho wa aliwa, athu ala enoodha yuwiithaneni, nyo munoodha mudhowe mwaje dha mukutho dheewa. <sup>16</sup>Nyo munoodha mwaatelihege azombwe eenyu anamwali eewa. Anamwali eewa yeeragana mararuwo ni amilugu eewa teto enowawiirha azombwe eenyu wi eraruwege ni amilugu alena. <sup>17</sup>Mwihiisasanyedhe amilugu oohaniwa.

**Mathanga malubale ni malamulo mamohi**  
(*Okuma 23.14-19; Levitiku 23.4-21; Deteronomiyo 16.1-17*)

<sup>18</sup>“Mwiiregena Mathanga a Mikaathe dhoohuhela emela. Malabo matanu nameenddi ojege mikaathe dhoohuheliwa emela wona guuthongeliimi. Mwiiregena mweeri wowambeela vovi bu oyene wakumiliwe wEgubuddu.

<sup>19</sup>“Dhowambeela obaliwa dhaatedhene dhapogo saaga: athu, ng'ombe, ni mabila. <sup>20</sup>Oneerege omoobola buuru owambeela obaliwa ni nibila. Waahifunaga omoobola ompege. Wawoobolege teto anaawo anaalobwana aatene owambeela obaliwa.

“Kakalevo oneere adheege wa miyo ahithukulile yego”.

<sup>21</sup>“Malabo matanu nammohi onoodha olaba mabasa aawo, mbwenye nlabo na neetanu nameenddi ovume, naari ogali mudhidhi wa olima, naari mudhidhi woohadda ovume.

<sup>22</sup>“Mwiiregena Mathanga a Namulibu a tirigu, mwiiregena teto Mathanga a Dhoohadda omamalelo wa yaaka.

<sup>23</sup>“Dila dhenda thaaruu vayaakani anaalobwana eenyu aatene yooneyegelege wa NABWIYA, mwiinya a dhaatedhene, Mulugu aEzarayeli. <sup>24</sup>Vovi ginoo-

<sup>d</sup> 34.13 *Abodho* yaali maburo mwamweebedhiwa mulugu amwihiyana eeriwa Axera.

dha gawiigare malogo osogolo waawo wi gunnuwihe elabo yaawo. Mudhidhi oyene munaagweligiinyu vameentoni va NABWIYA Mulugu eenyu, dila dhenda thaaruu vayaakani, kadha akalavo oofuna oliga elabo yeenyu.

<sup>25</sup>“Waakuthaga mukutho wa mwazi ohudhegena mikaathe dhinna emela. Naari ohuhalege mukutho wa Paxkwa mahiyu maatene ofiyedha obebehini wiwa.

<sup>26</sup>“Odhegena mu nyuba ya NABWIYA Mulugu aawo namulibu a dhoo-hadda dha mwiilaboni.

“Ohumpiyege mwaana mbuzi ni mukaka wa amaaye”.

<sup>27</sup>NABWIYA ahiwogaga teto ni Mozezi, wiira: “Olebe madhu alena, vovi mwa alena gihisasanya nipangano no waandana ni weevo, vamohi ni aEzarayeli”. <sup>28</sup>Mozezi ahikalaga ni NABWIYA malabo makumi manna-yi mahiyu ni mutana, Mozezi kaaja, naari ong'wa. Ahilebaga vamabweni owaaparula madhu a nipangano no waandana eli malamulo kumi.

### Kove ya Mozezi enowaara

<sup>29</sup>Akitaga Mozezi oMwaangoni Sinayi, aganna mundadani naaye mabwe meenddi a nipangano no waandana, oliye kaanonilege wi kove yaaye yoowaraga mwaha wa owoga ni NABWIYA. <sup>30</sup>Aroni ni aEzarayeli yegi omoona Mozezi, kove yaaye yaaraga, vano yoomoovaga omwaadda-mela. <sup>31</sup>Ndala Mozezi ahimwiithanaga Aroni ni apogo aatene a mulogo odha wa oliye, ahiwogaga ni aliwa. <sup>32</sup>Vevale yahidhaaga aEzarayeli aate-ne, vano Mozezi ahaalamulelaga dhaatedhene NABWIYA dhawogiliye oMwaangoni Sinayi. <sup>33</sup>Aamaalagave Mozezi owogaga ni aliwa, owiiku-neelesa ni guwo kove yaaye. <sup>34</sup>Mbwenye Mozezi aavolowagave owoga ni NABWIYA, oovenyihawo guwo. Aakumagave owawaaddela aEzarayeli dhedho dhalamuleliwiye. <sup>35</sup>AEzarayeli yegi omoona Mozezi aganna kove yowaara. Oowelega wiikuneela ofiyedha teto owoga ni NABWIYA.

### Nlabo noovuma

**35** <sup>1</sup>Mozezi ahaatugumanyaga aEzarayeli aatene, ahiwogaga ni aliwa, wiira: “Ala bi madhu ayene NABWIYA yaalamuliliye wi yawiiregena: <sup>2</sup>Mulabege malabo matanu nammohi, na neetanu nameenddi nneere nikalege wa nyoovo nlabo noweela, nlabo noovuma nowaakwanela mwa NABWIYA. Oyene oneere alabe onoodha apiwe. <sup>3</sup>Nlabo noovuma muhuturaanyege munddo mmavade mweenyu”.

### Dhoovaha mmusasani mwa Mulugu

(Okuma 25.1-7)

<sup>4</sup>Mozezi ahiwogaga ni aEzarayeli aatene, wiira: “Ala bi madhu a NABWIYA yoolamuliliyeni, eeraga: <sup>5</sup>‘Oddoddele mvahi wa NABWIYA. Aatene ayene enarumeedha ni murima weewa edhena dhoovelela

dhiwa: oro, parata, ni mukuwa, <sup>6</sup>osalu wamataakuru, waroxa, ni woofiila, osalu wa nthoje nookwima, ni mooya a mbuzi; <sup>7</sup>makupa a mabila ookathiwa wi ekale oofiila, makupa a aneenyama amwinko, ni mithanko dhoosema dha akaasiya, <sup>8</sup>makura a panti ni dhoonukwela pama dhootaganyihedhana makura oosakuleliwana mabasa, dhoonukwela pama dha libani; <sup>9</sup>mabwe oofuneya eneethaniwa onikisi, ni mabwe a misawo-misawo teto oosemiwa oowomihana yoowara ya anamakutha: efodi yoowara ya omurimani.

**Woobiwa wa ameesili**  
(Okuma 31.6-10; 39.32-43)

<sup>10</sup>“ ‘Edhe ameesili aatene oononelamo a mwa nyoovo, esasanye mabasa maatene wona NABWIYA mwaalamuleliye, eeraga: <sup>11</sup>musasa woothukuliwa, dhookuneelana dhiwa, dthingowodha, abodhoya, mapagoya, dhimiridha, mathiwaya, <sup>12</sup>kaxa ni dhimiri dhoothebana, yookuneelana ya kaxa ela ni guwo yoogawa, <sup>13</sup>meeza ni dhimiri dhoothebana, dhego dhookamihedhana dhaatedhene ni mikaathe dha vameentoni va NABWIYA, <sup>14</sup>extanti ni panti dhiwa ni dhookamihedhana, vamohi ni makuraya, <sup>15</sup>niburo na mukutho wa libani ni dhimiridha, makura oosakuleliwana mabasa, libani noonukwelesa, ni guwo yoothiithihedha ya vamavolowelo va musasa, <sup>16</sup>niburo na mukutho dhoopaha ni olalo wa mukuwa, dhimiri, dhoobo dhaatedhene, basiya ni nthiwa, <sup>17</sup>guwo dha cinga, abodho ni mathiwa, guwo yoogawa vamavolowelo, <sup>18</sup>dhikomelo dha musasa, dhikomelo dha cinga, ni mingoyi dhiwa, <sup>19</sup>dhoowara dhoolabana vamburoni woweela, dhoowara dhooweelihiwa dha namakutha Aroni, ni dhoowara dha anaaye wi elabegena wona anamakutha’ ”.

**Dhoovaha dha mulogo**

<sup>20</sup>Vevale mulogo waatene wa aEzarayeli wahimwaadheyaga vaaligii-su ni Mozezi, odhowa mumburoni mweewa. <sup>21</sup>Alene yarumeedhelaga ni mirima dheewa, alene muneba weewa wafuna yahidhaaga, edhaagana dhoovaha wa NABWIYA wi dhihiddiwena mabasa a musasa woogumanamo, dhookamihedhana, dhoowara dhooweelihiwa. <sup>22</sup>Aatene yannaga mirima dhoorumeedhela yahidhaaga, alobwana ni ahiyana. Yoodhaagana dhowiiriyihana dha misawo-misawo dha oro: Dha mukohi, dha mmabaruni, dha mmoononi ni dha mwimbunoni. Aatene alene yadhiilege, yahitedeedhelaga wa NABWIYA dhoovaha dhiwa dha oro. <sup>23</sup>Yoodhaagana teto osalu wamataakuru, waroxa ni woofiila, ya nthoje nookwima, mooya a mbuzi, makupa a mabila ookathiwa wi ekale oofiila, makupa a aneenyama amwinko. <sup>24</sup>Aatene alene yannaga parata ni mukuwa yoodhaagana, omvaha NABWIYA. Oyene annaga mithanko dha akaasiya dhoolabana mabasa alene, yoodhaagana. <sup>25</sup>Ameesili aatene

aahiyana yoosasanyaga osalu ni madada eewa, odhana, osalu wamaataakuru, waroxa, woofiila, ni osalu wa nthoje. <sup>26</sup>Ameesili aahiyana ayene yarumeedhelaga ni mirima dheewa yoodhaagana osalu wasasanyiiwa ni mooya a mbuzi. <sup>27</sup>Asogoleli yoodhaagana mabwe a onikisi, ni mabwe oofuneya oosasanyedhiwana efodi ni yoowara ya omurimani ya namakutha. <sup>28</sup>Yoodhaagana teto dhoonukwela, makura a panti, makura oosakuleliwana mabasa, makura oosasanyiwana libani.

<sup>29</sup>AEzarayeli aatene, alobwana ni ahiyana, ayene yarumeedhelaga ni mirima dheewa, yoodhaagana dhoovaha wa NABWIYA moofuna wi ehiddena mabasa ayene Mulugu yamurumiliye Mozezi.

### Mulugu onowaasasanyedha ameesili oomaga musasa

<sup>30</sup>Mozezi ahiwogaga ni aEzarayeli, wiira: “NABWIYA ahimusakula Bezaleli, mwaana a Uri, oli mwaana a Huri, a nihimo na Zhuda, <sup>31</sup>omudhaalaha Muneba wa Mulugu ni tthotho, ononelamo, ni orandda wa mabasa maatene, <sup>32</sup>asasanyeye dhoohadhihela dha omeesili ni oro, parata ni mukuwa. <sup>33</sup>Teto akalena orandda woolaba ni mabwe ni mithanko, orandda woosasanyedhela ni osasanya mabasa maatene omeesili. <sup>34</sup>Teto ahimvaha Bezaleli murima wosuuziha, vamohi ni meesili Oholiyabi, mwaana a Ahisamake, a nihimo na Dani. <sup>35</sup>NABWIYA ahaadhaalaha onona ohidda mabasa maatene omeesili teto wi ekale anamasasanyedhela teto onona dhoolaba ni osalu wamataakuru, waroxa, woofiila, ni wa nthoje nookwima”.

**36** <sup>1</sup>“Nuwindo, Bezaleli ni Oholiyabi ni ameesili aatene, ayene Mulugu yaavahiliye onona ohidda mabasa maatene a musasa, enafuneya wi ehiddege mabasa ala wona NABWIYA mwalamuleliye”.

<sup>2</sup>Mozezi ahawiithanaga Bezaleli, Oholiyabi ni ameesili aatene, ayene NABWIYA yaavahiliye onona, ayene yarumeedhela ni mirima dheewa odha ohidda mabasa alene. <sup>3</sup>Alena yahaakela ni Mozezi dhoovaha dhaatedhene dhendo aEzarayeli yadhiiligiiwana wi ehiddena mabasa oosasanyedhiwana musasa. Bebehi ni bebehi mulogo woodhaaganaave dhoovaha dhiwa moofuna. <sup>4</sup>Ndala ameesili aatene yahidhaagana omabasani a musasa, <sup>5</sup>owoga ni Mozezi, yiiraga: “Mulogo onoodhana mookwaranyiha dhafuneya wa mabasa alena NABWIYA yanilamuleliye wi ehiddiwege”. <sup>6</sup>Vevale Mozezi ahaaddelihaga mulogo, mmisasani mweewa, eeraga: “Kakalevo mulobwana naari mwihiyana oneere adheegena dhoovaha dha musasa”. Ndala athu yahihiihiwaga odhana <sup>7</sup>vowi dhoovaha dheewa dhahaakwana ohiddana mabasa maatene, ofiyedha ohala.

### Masasanyedho a musasa wa Mulugu

(Okuma 26.1-31)

<sup>8</sup>Ndala ameesili aatene yahisasanya musasa wa Mulugu ni guwo kumi dha nthoje na mutheengo wookwima, dhisasanyiwe ni osalu wamataaku-

ru, waroxa ni woofiila. Otopa dhoopaddusiwa dha odhulu dha mompelo, oosasanyedhiwa ni orandda. <sup>9</sup>Olapa wiwa wa yookuneela ni yookuneela waali meeturu kumi ni mannayi ni meya (14,5m). Orambalala wiwa waali meeturu meenddi (2m). Dhookuneela kumi ni emohi dhoofwanafwana. <sup>10</sup>Guwo tanu dhahiluddeleliwa ni dhikwaaye teto dhimohi tanu dhahiluddeleliwa ni dhikwaaye. <sup>11</sup>Mmagomelo moolapa mwa guwo tanu ni tanu dhahiheliwamo makaando a guwo yamataakuru. <sup>12</sup>Yahisasanya makaando makumi matanu (50) ohela omagomelo wa guwo emohi, osasanya teto makaando makumi matanu (50) ohela omagomelo wa guwo emohiwa, makaando ala yoosugwana nimohi ni nikwaaye. <sup>13</sup>Yahisasanyedhela teto dhingowo makumi matanu (50) dha oro ogu-manihena guwo ndo ni dhingowo. Ndala dhaatedhene dhahifiedha okala musasa mmohi.

<sup>14</sup>Yahiluwa dhookuneela kumi nammohi dha mooya a mbuzi dhookuneelana musasa. <sup>15</sup>Olapa wiwa wa yookuneelana ni yookuneelana waali meeturu kumi ni matanu (15m). Orambalala wiwa waali meeturu meenddi (2m). Dhaatedhene dhoofwanafwana. <sup>16</sup>Yahiluddelela vamohi tanu teto oluddelela dhimohi tanu nammohi dhahalile. <sup>17</sup>Yahisasanyedhela makaando makumi matanu (50), ohela makaanduya omagomelo wa guwo teto yahisasanyedhela makaando makumi matanu (50) ohela guwo emohi. <sup>18</sup>Yahisasanya dhingowo makumi matanu (50) dha mukuwa dhoongowana makaando ale, ndala guwo dhaatedhene dhahifiedha okala musasa mmohi.

<sup>19</sup>Yahisasanya yookuneelana ya musasa ole ni makupa ookathiwa a mabila wi ekale oofiila, vadhulu viwa yahikuneelavo ni makupa a aneenyama a mwinko.

<sup>20</sup>Yahisema teto mithanko dha akaasiya, okala abodho owiimesana musasa ole. <sup>21</sup>Olapa wiwa bodho ni bodho waali meeturu matanu (5m), orambalala wiwa waali masentimeeturu makumi matanu nameenddi ni matanu (75cm). <sup>22</sup>Bodho ni bodho ahikalana dhoohiddeelana dhiwa biili, dhoogumanihana abodho aatene a musasa. <sup>23</sup>Ndala yahisasanyedhela abodho a musasa makumi meenddi: epaddi ya wewo onadheela pevo ya murubi. <sup>24</sup>Yahisasanyedhela mathiwa a parata makumi mannayi, bodho ni bodho vativiwa vakala mathiwa meenddi. <sup>25</sup>Epaddi ya wewo onadhowa pevo ya murubi yaaliwo teto abodho makumi meenddi, <sup>26</sup>ni mathiwa a parata makumi mannayi, bodho ni bodho vativiwa vakala mathiwa meenddi. <sup>27</sup>Odduli wa musasa, wewo onadhowela nduwa, yahaasanyedhela abodho atanu nammohi, <sup>28</sup>teto yahaasanyedhela abodho abiili a mmwenddoni. <sup>29</sup>Alena abiili yalibihwiwa ni mithanko dhimohi vano yahimagiwa ni mapago odhulu ni vati. <sup>30</sup>Ndala yaali abodho atanu natharu, ni mathiwaya a parata kumi ni matanu nammohi, bodho ni bodho vativiwa vanna mathiwa meenddi.



<sup>31</sup>Yahisasanyedhela mapago matanu a mithanko dha akaasiya, yaahiddeele abodho a nikukuru na musasa, <sup>32</sup>teto mapago matanu wi ehiddeelege bodho a musasa vapusuni amohiwa teto matanu wi ehiddeelege bodho a musasa avapusuni epaddi, onadhowela nduwa. <sup>33</sup>Yahisasanyedhela nipago na vaari oviriha ofiya omakuthulo wa abodho. <sup>34</sup>Yahaahuruwedha abodho ni oro, yahisasanyedhela mangoosa ni oro wi ehiddeelege mapago. Mapagoya yahaahuruwedha teto ni oro.

<sup>35</sup>Yahisasanyedhela teto guwo yoogawa ni osalu wamataakuru, waroxa, woofiila, ni osalu wa nthoje nookwima. Yahiborodaarivo dhoopaddusiwa dha odhulu dha mompelo oosasanyedhiwa ni orandda. <sup>36</sup>Yahisasanyedhela abodho annayi a akaasiya wi etomeyegevo guwo ele, yahihuruwedhana ni oro teto yahisasanyedhela vaabodhoni viwa dthingowo dha oro, yahihana mathiwa mannayi a parata. <sup>37</sup>Yahisasanyedhela teto guwo ya vamavolowelo wa musasa, ni osalu wamataakuru, waroxa ni woofiila ni osalu wa nthoje nookwima, mabasa a namaborodaari oorandda. <sup>38</sup>Yahisasanyedhela abodho atanu, ohuruwedha vadhuluviwa ni dhoolibihana dhiwa ni oro, mbwenye mathiwiiwa matanu yaali a mukuwa.

### Masasanyedho a kaxa

*(Okuma 25.10-15)*

**37** <sup>1</sup>Bezaleli ni ameesili amohi yahisasanya kaxa, ya mithanko dha akaasiya; olapa wiwa yaali meeturu nimohi ni meya (1,5m), orambalala wiwa yaali masentimeeturu makumi matanu nameenddi ni matanu (75cm), otaama wiwa yaali yooligana. <sup>2</sup>Yahihuruwedha ni oro apama ode ni muwari, yahisasanyedhela kara yootopiwa ya oro mowaapeeleliha. <sup>3</sup>Yahinyungulusa mangoosa mannayi a oro, yahihela mmondndoni mwa kaxa, mangoosa meenddi epaddi ya kaxa meenddi teto epaddi emohi. <sup>4</sup>Yahisasanyedhela dhimiri dha akaasiya, ohuruwedha ni oro. <sup>5</sup>Yahivolosihamo dhimiri muwari mwa mangoosa a kaxa wi evenyihegena.

<sup>6</sup>Yahisasanya teto yookuneelanaavoya ni oro apama, olapa wiwa yaali meeturu nimohi ni meya (1,5m), orambalala wiwa waali vaari ni vaari va mpimo.<sup>e</sup> <sup>7</sup>Ni oro oohaniwa yahisasanya dhoopaddusiwa biili dha odhulu dha mompelo, yahihela mmagomelo wa yookuneelana ele. <sup>8</sup>Mmohi yamuhelile omagomelo wula teto mmohi omagomelo wumohi. <sup>9</sup>Dhoopaddusiwa dha odhulu nde, dhahitapulela mompelo eewa, vadhulu vayookuneelana yaatene, osugwanaga mmohi ni mukwaaye, egaworomihedhe kove dheewa vayookuneelana ele.

### Masasanyedho a meeza

*(Okuma 25.23-30)*

<sup>10</sup>Yahisasanyedhela teto meeza ni mithanko dha akaasiya; eyene olapa wiwa yaali meeturu nimohi, orambalala wiwa waali meya ya meetu-

<sup>e</sup> 37.6 Naari wi: masentimeeturu matanu (75cm).

ru, otaama wiwa waali masentimeeturu makumi matanu nameenddi ni matanu (75cm). <sup>11</sup>Yahihuruwedha yaatene ni oro apama, yahisasanyedhela kara yootopiwa ya oro mowaapeleliha mwiwa. <sup>12</sup>Yahisasanyedhela mowaapeleliha mukaleloya wa masentimeeturu matanu ni meenddi (7cm). Yahisasanyedhela kara ya mukalelo wootopiwa. <sup>13</sup>Yahinyungulusa mangoorza mannayi, waahela mwemo munamelela meddo dhiwa. <sup>14</sup>Waaddamela kara vahikala nikungu moovirihamo dhimiri dhoothebana. <sup>15</sup>Dhimiri ndo dhoothebana meeza dhasasanyiwe ni mithanko dha akaasiya oohuruwedhiwa ni oro. <sup>16</sup>Yahisasanya dhego dha vameeza ni oro apama: miziwo dhiwa, anamusaniya, milinga ni mihadha dhoohelamo dhoovaha dhookuthula.

### **Masasanyedho a extanti voohela panti**

*(Okuma 25.31-40)*

<sup>17</sup>Yahisasanyedhela teto extanti voohela panti ni oro apama oohaniwa, winna nthiwa, mulongothi, kopo, dhiwuduburu ni tododhiwa, dhaatedhene dhasasanyedhiwe yego emohive eyene. <sup>18</sup>Dhahikalana mijindda mitanu ni mmohi, miraaru dhakumile kukuru ela, miraaru teto kukuru emohi. <sup>19</sup>Mujindda ni mujindda wahikalana kopo thaaru ni mukalelo wona dhiwuduburu ni todo dha amendowa. <sup>20</sup>Vamulongothini wa extanti elena dhahikalavo kopo nnayi dha mukalelo wona dhiwuduburu ni todo dha amendowa. <sup>21</sup>Vahikala dhikopo thaaru mwamelela mapura a mijindda miinddi. <sup>22</sup>Mijindda ni dhiwuduburu dhasasanyedhiwe yego emohive eyene, extanti yaatene yahaniwe wa yego emohive eyene ni oro apama. <sup>23</sup>Yahisasanyedhela teto panti tanu nabiili ni dhoohiddihana ni dhoothimihana dhiwa dha oro apama. <sup>24</sup>Yahisasanyedhela extanti yaatene ni dhookamihedha dhiwa dhalabiwena kilu makumi maraaru dha oro apama.

### **Masasanyedho a niburo na mukutho wa libani**

*(Okuma 30.1-10)*

<sup>25</sup>Yahisasanyedhela niburo na mukutho wa libani ni mithanko dha akaasiya, eyene dhipaddi dhaatedhene dhoofwanafwana, meya meeturu. Otaama wiwa waali meeturu nimohi. Yahitogoliwa matabwaya wona manyaga mannayi mmagomelo mwiwa. <sup>26</sup>Yahihuruwedha niburo naatenene ni oro apama: vadhulu, mbararuni ni manyagaya. Yahitopa wapeeleliha ni oro. <sup>27</sup>Yahisasanya teto mangoorza meenddi a oro, waahela mbararuni, muddibani mootopiwa mwavira dhimiri dhoothebana. <sup>28</sup>Yahisasanyedhela dhimiri dha akaasiya, dhahuruwedhiwe ni oro.

### **Masasanyedho a makura ni libani**

*(Okuma 30.22-38)*

<sup>29</sup>Yahisasanyedhela makura wi esakuleliwegera mabasa a Mulugu, ni libani noonukwela, dhoosasanyiwa ni orandda.

### Masasanyedho a niburo na mukutho dhoopaha

(Okuma 27.1-8)

**38** <sup>1</sup>Bezaleli ni ameesili amohi yahisasanyedhela niburo na mukutho dhoopaha ni mithanko dha akaasiya. Olapa wiwa ni orambalala wiwa woofwanafwana, meeturu meenddi ni meya (2,5m). Otaama wiwa waali meeturu nimohi ni meya (1,5m). <sup>2</sup>Yahitogola mithanko dhiwa wona manyaga mannayi mmagomelo mwiwa, ohuruwedhiwa ni mukuwa. <sup>3</sup>Yahisasanyedhela dhookamihedhana dhiwa dhaatedhene ni mukuwa, biya dhoohelamo nddoora, apaya, mabasiya, magaarufu oolapa ni biya dhoohelamo makala. <sup>4</sup>Yahisasanyedhela olalo ni mukuwa, othukuthedha vaari va odhulu ni vati vamburoni na mukutho dhoopaha. <sup>5</sup>Yahinyungulusa mangooza mannayi a mukuwa mmondtoni mwiwa, ohela mmagomelo mwa olalo wi evirihagemo dhimiri dhoothebana. <sup>6</sup>Yahisasanyedhela dhimiri dha akaasiya, ohuruwedha ni mukuwa. <sup>7</sup>Yahivolosihamo dhimiri mmangoozani mule wi ethukuliwegena. Niburo na mukutho dhoopaha dhasasanyiwe mbararuni mwiwa ni matabwa vano muwari mwiwa mwaali nikungunene.

### Masasanyedho a basiya

(Okuma 30.17-21)

<sup>8</sup>Yahisasanyedhela basiya nuulubale na mukuwa, ni nthiwa niwa na mukuwa. Mukuwa ola wavenyihwiwa mmasupeeloni a ahiana yalaba vamavolowelo wa musasa woogumanamo.

### Masasanyedho a cinga

(Okuma 27.9-19)

<sup>9</sup>Yahisasanyedhela cinga na musasa wa Mulugu. Epaddi ya wewo onakuma pevo ya murubi, yahihelawo guwo yowiimela ya nthoje na mutheengo wookwima, olapa wiwa meeturu makumi matanu (50m). <sup>10</sup>Yahisasanyedhela abodho eewa makumi meenddi, ni mathiwaya makumi meenddi a mukuwa. Dhingowo ni dhoolibihana dha abodho dhaali dha parata. <sup>11</sup>Yaali teto emodha-modhave, epaddi ya wewo onadhowela pevo ya murubi. Olapa wiwa wa guwo waali meeturu makumi matanu (50m). Abodhoya makumi meenddi ni mathiwaya makumi meenddi yaali a mukuwa. Dhingowo ni dhoolibihana dha abodho dhaali dha parata. <sup>12</sup>Epaddi ya wewo onadhowela nduwa, wahikala guwo dha meeturu makumi meenddi ni matanu (25m), ni abodhoya kumi ni mathiwaya kumi. Dhingowo ni dhoolibihana dha abodho dhaali dha parata. <sup>13</sup>Epaddi ya wewo onakuma nduwa, cinga nanna meeturu makumi meenddi ni matanu (25m). <sup>14</sup>Vamavolowelo nikukuru na moonoo wooja, guwo yaali

meeturu matanu nameenddi ni meya (7,5m) ni abodhoya araaru ni mathiwaya maraaru. <sup>15</sup>Yaali ndala nikukuru nimohiniwa, guwo yowiimela yaanna meeturu matanu ni meenddi ni meya (7,5m); abodhoya yaali araaru ni mathiwaya maraaru <sup>16</sup>Guwo dhaatedhene dha cinga dhaali dha nthoje nookwima. <sup>17</sup>Mathiwa maatene a abodhoya yaali a mukuwa. Dhingowo ni dhoolibihana dha abodho dhaali dha parata, vadhulu viwa teto yahuruweliwe ni parata. Abodho a cinga naatenene yahikanna dhoolibihana dha parata. <sup>18</sup>Vamavolowelo vahikala guwo dha nthoje nookwima yooborodaariwa ni osalu wamataakuru, waroxa ni woofiila, esasanyedhiwe ni namaborodaari oorandda. Olapa wiwa waali meeturu kumi (10m), otaama wiwa waali wona guwo dhimohi dha cinga, meeturu meenddi ni meya (2,5m). <sup>19</sup>Guwo ela ya vamavolowelo yanna abodho annayi ni mathiwaya mannayi a mukuwa. Dhingowo ni dhoolibihana dha abodho dhaali dha parata, vadhulu viwa teto yahuruweliwe ni parata. <sup>20</sup>Dhikomelo dhaatedhene dha musasa ni cinga dhaali dha mukuwa.

### Wiinjiva wa dhooveleela

<sup>21</sup>Wula weelengiwa wa dhooveleela dhalabile musasa wa onamoona. Dhalebiwe ni aLeevi, esogoleliwaga ni Etamari, mwaana a namakutha Aroni, yahiirana wona Mozezi mwalamuleliye.

<sup>22</sup>Bezaleli, mwaana a Uri, oli mwaana a Huri, a nihimo na Zhuda, ahisasanya dhaatedhene dhendo NABWIYA dhamulamuleliye Mozezi. <sup>23</sup>Bezaleli ahihidda mabasa ni Oholiyabi, mwaana a Ahisamake, a nihimo na Dani, aali oorandda, namasasanyedhela ni namaborodaari ni osalu wamataakuru, waroxa, ni woofiila ni dha nthoje nookwima.

<sup>24</sup>Wiinjiva wiwa wa oro ahiddile mabasa a niburo noweela, oyene aveleeliwe wa NABWIYA wona yoovaha, aali kilu mazana matanu na mannayi, ni makumi matanu nammohi ni kilu tanu (965kg).

<sup>25</sup>Parata yaveleeliwe mu mudhidhi woolebeliwa, wiinjiva wiwa okwaranya kilu macikwi maraaru ni kilu mazana maraaru (3.300kg). <sup>26</sup>Alobwana yalebeliwa eganna yaaka makumi meenddi odhowa osogolo, wiinjiva wiwa waali macikwi mazana matanu nammohi, ni macikwi maraaru, ni athu mazana matanu ni athu makumi matanu (603.550). Mmohi ni mmohi ahivaha garama tanu dha parata. <sup>27</sup>Ni parata ela, yasa-sanyedhela mathiwa zana (100) a niburo noweela ni a guwo yoogawa. Nthiwa ni nthiwa nakalana kilu makumi maraaru ni kilu thaaru (33kg), ndala parata a mathiwa maatene aali kilu macikwi maraaru ni kilu mazana maraaru (3.300kg). <sup>28</sup>Ni parata yahalile yahisasanyedhela dhingowo ni dhoolibihana dha abodho teto ohuruwedhana vadhulu va abodho.

<sup>29</sup>Mukuwa wavahiwe NABWIYA wona yoovaha waakwanile kilu macikwi meenddi ni kilu mazana maraaru (2.300kg). <sup>30</sup>Ni olena yahisasanyedhela mathiwa omavolowelo wa musasa woogumanamo, niburo

na mukutho dhoopaha, olaloya ni dhookamihedha dhiwa dhaatedhene, <sup>31</sup>mathiwa a cinga naatene, mathiwa a vamavolowelo va cinga ni dhikomelo dhoohiddana musasa ni cinga.

### Masasanyedho a dhoowara dha anamakutha

*(Okuma 28.1-43)*

**39** <sup>1</sup>Ni osalu wamataakuru, waroxa, ni woofiila, yahisasanyedhela dhoowara dhapama, dhooluwa, dhoolabana mmusasani wa Mulugu; dhoowara dhoosakuleliwana wa NABWIYA, dhaali dha Aroni wona mwemo NABWIYA mwamulamuleliye Mozezi. <sup>2</sup>Yahisasanyedhela efodi ni osalu wa oro, wamataakuru, waroxa, woofiila, ni nthoje nookwima. <sup>3</sup>Yahihana oro, ozhazhaaliha, ogwadda okala osalu, wooluwana, ni osalu wamataakuru, waroxa, woofiila, vamohi ni nthoje nookwima, mabasa ooranda. <sup>4</sup>Yahisasanyedhela mingoyi dhiwa miinddi dhoomagana mmafuddini. <sup>5</sup>Muddiddi wasoneliwe efodi wasasanyiwe ni oranda, guwiiwa yaali emohive, ya osalu wa oro, wamataakuru, waroxa, woofiila, ni nthoje nookwima, wona mwemo NABWIYA mwamulamuleliye Mozezi.

<sup>6</sup>Yahisasanyedhela mabwe a onikisi wapeeleliha oro mmagomelo mwiwa, otopavo mandina a ahima a Ezarayeli. <sup>7</sup>Yahimagelela mabwe ale mmingoyini dha mmafuddini wi ekale yowuubusedha ya aEzarayeli, wona mwemo NABWIYA mwamulamuleliye Mozezi.

<sup>8</sup>Yahisasanyedhela yoowara ya omurimani yoosoniwa ni oranda, yooligana ni efodi, ni osalu wa oro, wamataakuru, waroxa, woofiila, ni nthoje nookwima. <sup>9</sup>Mpimoya wakala, ndada nimohi mmagomelo mwaatemwene yakuniwa. <sup>10</sup>Yahitadamo mabwe oofuneyesesa mizele minnayi. Muzele wowambeela mwaali rubi, topaziyu ni ezhimiralida. <sup>11</sup>Muzele, wa nabiili mwaali mabwe a turekesa, safira ni diyamanti. <sup>12</sup>Muzele wa neethaaruu wahikalana zhasintu, agata ni ametixta. <sup>13</sup>Muzele wa nennayi mwaali kirisolitu, onikisi, ni zhaxipe. Mabwe alena maatene yaapeelelihiwe ni ohiddeliwa ni oro. <sup>14</sup>Mabwe ala yaali kumi nameenddi wona mandina a ahima aEzarayeli. Yahaatopa mandinaya wona olebiwa wa karimbu, wa mulogo kumi ni miinddi dha aEzarayeli kadda mulogo ndina neewa.

<sup>15</sup>Yahisasanya kurenti ya oro apama osonela va yoowara ya omurimani. <sup>16</sup>Yahisasanyedhavo teto pethe biili dha oro omagela omwaango mmagomelo mwa yoowara ya omurimani. <sup>17</sup>Yahimagelelamo makurenti meenddi a oro mpetheni biili mmagomelo mwa yoowara ya omurimani. <sup>18</sup>Yahimagelela makurenti mmagomelo mwa dhingowo biili, mmafuddini mwa efodi.

<sup>19</sup>Yahisasanya pethe biili dha oro, ohela mmagomelo mwa yoowara ya omurimani. <sup>20</sup>Yahisasanya pethe dhimohi biili dha oro, omagelela

muddibani mwa yoowara waaddamela ni musono vadhulu va muddiddi wa efodi. <sup>21</sup>Yahigumaniha yoowara ya omurimani ni pethe dha efodi ya onamakutha vadhulu viwa yahikalana mungoyi wamataakuru waali vadhulu vamuddiddini wa efodi ya onamakutha; ndala yoowara ya omurimani kayahiya efodi ya onamakutha, wona mwemo NABWIYA mwamulamuleliye Mozezi.

<sup>22</sup>Yahisona maleya oolapa a efodi, ni guwo yamataakuru yaatene, mabasa a anamaluwa. <sup>23</sup>Vaari va maleya ale vahikala paga voovirihavo muru, yoopideliwa ni osalu wooliba wi ehitaleye voowara. <sup>24</sup>Mowaapeleliha maleya dhipaddi ya vati, yahihelavo dhiroma ni orandda ni osalu wamataakuru, waroxa, woofiila, ni nthoje nookwima, <sup>25</sup>vamohi teto ni dhooruma dha oro apama. Dhiroma ni dhooruma dhiwa dhoothawana emohi ni ekwaaye. <sup>26</sup>Va maleyani oolapa a namakutha ole vahaapelelihiwa dhiroma ni dhooruma, wona mwemo NABWIYA mwamulamuleliye Mozezi.

<sup>27</sup>Aliwa yahimusasanyedhela Aroni ni anaaye mikanjo, maleeso a mmuruni ni guwo ya nthoje nookwima. Yahisasanya middiddi dhooborodaariwa, <sup>28</sup>maleeso a mmuruni ni akabuddula ni nthoje nookwima. <sup>29</sup>Middiddi dhahisasanyiwa ni orandda ni nthoje nookwima, dhooborodaariwa ni osalu wamataakuru, waroxa, ni woofiila, wona mwemo NABWIYA mwamulamuleliye Mozezi.

<sup>30</sup>Ni oro apama yahisasanyedhela ecapa ya kara yoweelihiwa otopavo madhu owi: “Dhoosakuleliwa NABWIYA” wona olebiwa wa karimbu. <sup>31</sup>Yahimagelela ni osalu wamataakuru osogolo wa leeso na mmuruni, wona mwemo NABWIYA mwamulamuleliye Mozezi.

### AEzarayeli enomariha omaga musasa wa Mulugu (Okuma 35.10-19)

<sup>32</sup>Ndala yahimariha mabasa maatene a musasa woogumanamo ni Mulugu. AEzarayeli ebaribareene yahirana dhaatedhene NABWIYA dhulamuleliye Mozezi, yahirana ndo. <sup>33</sup>Ndala yahidhana wa Mozezi dhaatedhene dha musasa wa Mulugu, dhingowo, abodhoya, mapagoya, dhimiri dhiwa ni mathiwaya; <sup>34</sup>dhookuneelana dha makupa a mabila ookathiwa wi ekale oofiila, dhookuneelana dha makupa aneenyama amwinko, ni guwo yoogawa; <sup>35</sup>kaxa ya nipangano no waandana, ni dhimiri dhiwa ni yookuneelanaya; <sup>36</sup>meeza ni dhookamihedha dhiwa dhaatedhene ni mikaathe dha vameentoni va NABWIYA; <sup>37</sup>extanti ya oro ni panti dhiwa ni dhookamihedha dhiwa dhaatedhene ni makura oohiddihana; <sup>38</sup>niburo na mukutho na oro na libani, makura oosakuleliwana mabasa, libani noonukwelesa, ni guwo yoothiithihedha ya vamavolowelo va musasa; <sup>39</sup>niburo na mukutho dhoopaha ni olalo wa mukuwa, dhimiri, dhoobo dhaatedhene; basiya ni nthiwa, <sup>40</sup>Guwo dha cinga, abodho

ni mathiwa, ni guwo yoogawa vamavolowelo, mingoyi ni dhikomelo dhiwa, dhoobo dhaatedhene dhoolabana mmusasani woogumanamo; <sup>41</sup>dhoowara dhoolabana vamburoni woweela, dhoowara dhooweelihiwa dha namakutha Aroni, ni dhoowara dha anaaye wi elabegena wona anamakutha.

<sup>42</sup>AEzarayeli yahiiiragana mabasa maatene ndala wona mwemo NABWIYA mwamulamuleliye Mozezi. <sup>43</sup>Vwoona Mozezi mabasa maatene, ahoonaga wi ebaribareene esasanyiwe ndale wona NABWIYA mwamulamuleliye; vevale Mozezi ahaareelihaga aEzarayeli.

### Mulugu onomulamula Mozezi wiimese musasa

**40** <sup>1</sup>NABWIYA ahiwogaga ni Mozezi, wiira: <sup>2</sup>“Nlabo nowambeela na mweeri wowambeela, wiimese musasa, oli musasa woogumanamo ni Mulugu. <sup>3</sup>Ohelemo kaxa ya nipangano no waandana, othiithihedhe ni guwo yoogawa. <sup>4</sup>Odhena meeza, osasanyedhevo ni dhego dhaatedhene dhinakala vevale; odhena teto extanti voohela panti, osasanyedhe dhookamihedha dhiwa. <sup>5</sup>Ohelemo niburo na mukutho na oro ya libani osogolo wa kaxa ya nipangano no waandana. Omagelele guwo vamavolowelo va musasa. <sup>6</sup>Osogolo wa vamavolowelo va musasa woogumanamo ohelemo niburo na mukutho dhoopaha. <sup>7</sup>Vaari va musasa woogumanamo ni niburo na mukutho dhoopaha viheliwe basiya nuulubale, ohelemo mahinje. <sup>8</sup>Wiimese cinga mowapeelela musasa ole, omagelelevo guwo vamavolowelo.

<sup>9</sup>“Othukule makura oosakuleliwana mabasa, okuthulele musasa ni dhaatedhene dhili mwemo ni dhookamihedha dhiwa dhaatedhene. Dhinoodha dhikale dhoosakuleliwela NABWIYA. <sup>10</sup>Okuthulele teto niburo na mukutho dhoopaha ni dhookamihedha dhiwa dhaatedhene. Niburo na mukutho nddo nnoodha nikale noweelesesa noosakuleliwa NABWIYA. <sup>11</sup>Okuthulele teto basiya ni nthiwa niwa. Dhinoodha dhikale dhoosakuleliwa Mulugu.

<sup>12</sup>“Omudhena vamavolowelo va musasa woogumanamo, Aroni ni anaaye, waahabihe ni mahinje. <sup>13</sup>Omuwarihe Aroni dhoowara dhoosakuliwa, omukuthulele makura oosakuleliwana mabasa. Onoodha akale oosakuleliwa mabasa a onamakutha. <sup>14</sup>Waadhena teto anaaye, waawarihe maleya oolapa. <sup>15</sup>Waakuthulele wona teto wamukuthuleliiwe Aroni wi egihiddelege mabasa a onamakutha. Osakuliwa weewa oneere okale omohive ni anamabaliwelamo eewa a musogolo, malabo maatene”.

### Wiimesiwa wa musasa wa Mulugu

<sup>16</sup>Mozezi ahiiragana dhaatedhene nda wona mwemo NABWIYA mwamulamuleligiye. <sup>17</sup>Nlabo nowambeela na mweeri wowambeela wa yaaka ya nabiiili, musasa wa Mulugu wahiimesiwaga. <sup>18</sup>Mozezi ahiimesaga musasa:

ahikaraatihaga mathiwaya, ahaatandaanyihedhaga abodhoya, waamagiha mapagoya. <sup>19</sup>Ahikuneelaga musasa ole ni guwo, odhulu wiwa ahithulelaga ni makupa, wona mwemo NABWIYA mwamulamuleliye Mozezi.

<sup>20</sup>Ahithukulaga mabwe ootopiwa a nipangano no waandana, ohela mu kaxani, ovirihamo dhimiri dhoothukulana, ahihelagavo yookuneelana vadhulu va kaxa. <sup>21</sup>Ahidhaagana kaxa ele mba, ahimagelelagavo guwo yoogawa yoothiithihedha kaxa ya nipangano no waandana, wona mwemo NABWIYA mwamulamuleliye Mozezi. <sup>22</sup>Ahaahelaga teto meeza mmusasani woogumanamo, ode wa guwo yoothiithihedha, epaddi dha wewo onadhowela pevo ya murubi. <sup>23</sup>Vameeza vevale ahihelagavo mikaathe dha vameentoni va NABWIYA, wona mwemo NABWIYA mwamulamuleliye Mozezi.

<sup>24</sup>Ahihelaga teto extanti voohela panti mmusasani woogumanamo osogolo wa meeza, epaddi wewo onakuma pevo ya murubi. <sup>25</sup>Ahihelaga panti vameentoni va NABWIYA, wona mwemo NABWIYA mwamulamuleliye Mozezi.

<sup>26</sup>Ahihelaga teto mmusasani woogumanamo niburo na mukutho na oro, waaddamela guwo yoogawa. <sup>27</sup>Ahipahagavo libani noonukwelesa, wona mwemo NABWIYA mwamulamuleliye Mozezi.

<sup>28</sup>Ahimagelelagavo teto guwo vamavolowelo va musasa ole. <sup>29</sup>Waaddamela vamavolowelo va musasa woogumanamo, ahihelagavo niburo na mukutho dhoopaha. Vevale ahikuthagavo mukutho woopaha ni mukutho wa dhilo, wona mwemo NABWIYA mwamulamuleliye Mozezi.

<sup>30</sup>Vaari va musasa woogumanamo ni niburo na mukutho dhoopaha, ahihelagavo basiya nuulubale, ohelamo mahinje oohabamo. <sup>31</sup>Mozezi, Aroni ni anaaye yoohabagamo madada ni ohuwamo manyalo eewa, <sup>32</sup>yaa-funaga ovolowa mmusasani woogumanamo teto yoohabagamo yaafunaga opaha mukutho, wona mwemo NABWIYA mwamulamuleliye Mozezi.

<sup>33</sup>Ahiimesagavo cinga mowaapeleliha musasa ni niburo na mukutho dhoopaha, vano ahimagelelagavo guwo vamavolowelo wa cinga. Ndala Mozezi ahaakwanihaga mabasa.

#### **Nthithimiho na NABWIYA nnodhaala mmusasani**

<sup>34</sup>Vevale murabo wahihuruwedhaga musasa woogumanamo ole, nthithimiho na NABWIYA nahidhaalagamo mmusasani. <sup>35</sup>Mozezi kaakwanihaga ovolowa mmusasani woogumanamo, vowi murabo kawavenyilegemo, nthithimiho na NABWIYA nahidhaalagamo mmusasani. <sup>36</sup>Murabo vavenyiligiiwamo, okala odhulu, vevale aEzarayeli feeddigiwiwa edhowaga, moolenddo eewa maatene. <sup>37</sup>Murabo waahivenyavo, kayeeddaga ofiyedha nlabo nendde murabo waavenyiiwavo. <sup>38</sup>Mutana murabo wa NABWIYA wakaraati vadhulu va musasa, mahiyu wasadduwa munddo. Mulogo wa aEzarayeli wowoonawo moolenddo eewa maatene.